

Metiu

Yesu yatayatanama waḡewaḡedima isedima
(Lk 3:23-38)

1 ¹Yesu Keriso tauna guyau Deivid na damma nopone ya tubuḡana, be guyau Deivid tauna Eibraham na damma nopone ya tubuḡana. ²Be Eibraham natunama Aisik, be Aisik natunama Jeikob. Be Jeikob natunatunama taudi Juda be tasitasinama. ³Be Juda natunatunama taudi Peres be Sera, be tinedima tauna Tamar. Be Peres natunama Hesron, be Hesron natunama Ram, ⁴be Ram natunama Aminadap, be Aminadap natunama Nason, be Nason natunama Salmon ⁵be Salmon natunama Boas, be Boas tinanama Reiheb. Be Boas natunama Obed, be Obed tinanama Rut. Be Obed natunama Jesi. ⁶Be Jesi natunama guyau Deivid. Be Deivid natunama Solomon be Solomon tinanama Uria na waivima. ⁷Be Solomon natunama Rehoboam, be Rehoboam natunama Abaija, be Abaija natunama Asa. ⁸Be Asa natunama Jehosafet, be Jehosafet natunama Joram, be Joram natunama Usaia. ⁹Be Usaia natunama Jotam, be Jotam natunama Eihās, be Eihās natunama Hesekaia. ¹⁰Be Hesekaia natunama Manase, be Manase natunama Amon, be Amon natunama Josaia. ¹¹Be Josaia natunama Jehoiakin be tasitasinama. Taudi adi raḡanine Israel banegidima matabudi a nawedina Babilonma be dabudine a miana.

¹²Be Babilon a mianana murine Jehoiakin natunama Sealtiel ya tubuḡana. Be Sealtiel natunama Serubabel. ¹³Be Serubabel natunama Abiut, be Abiut natunama Elaiakim, be Elaiakim natunama Asor. ¹⁴Be Asor natunama Sadok, be Sadok natunama Akim, be Akim natunama Eliut. ¹⁵Be Eliut natunama Eleasar, be Eleasar natunama Matan, be Matan natunama Jeikob. ¹⁶Be Jeikob natunama Jousep. Be Jousep tauna Meri na badama. Be Meri, tauna vutuna Yesu Tauwai yawasana ya tikana.

¹⁷Yodi tà kita da Eibraham ḡarone be ya naḡo da guyau Deivid ḡarone ya tavana, kimta matabudi 14. Be guyau Deivid ḡarone da ya naḡo da Babilon na raḡanie ya tavana, kimta matabudi 14. Be Babilonma raḡanine be ya naḡo da Keriso na raḡanie ya tavana, kimta matabudi 14.

Keriso na kaba tubuḡama
(Lk 2:1-7)

¹⁸Yesu Keriso muriḡa da ya tubuḡana noḡone, kaua umanama ya tubuḡana, Yesu tinanama Meri tauna Jousep na ḡoapaparama. Taudi muriḡa da sibo ai naḡi be ai rawateḡeina, Meri mayanama ya paḡo da kaiteka ya bogana Arua Babaue. ¹⁹Be Meri na badama Jousep tauna didimana baneginama. Vutuna aubainama raḡanine kaua nama ya kitakitana tauna nam i ḡoeḡoena da patara matedie sibo Meri ya gose be ya kawa tunimayaḡi. Vutuna aubainama tauna ya ḡoeḡoena da moisirie sibo Meri ya gosena.

²⁰Jousep inam kaudima yawai nuanogonoḡotedina maika, Bada na aneama raubonie Jousep ḡarone ya maḡatara be ya riuna, “Jousep, guyau Deivid natunama, nam kwa naira, Meri kwa paḡo da tam am waivima be nam kwa gose pore, baninama Meri Arua Babau na rewapanae gomana ya bogena. ²¹Tauna tokare gomana tauḡominama e tika be tam kwai isana Yesu, baninama tauna tokare na banagama adi gewagewae ei yawasanidina.”

²²Uma kaudima matabudi Bada boni peroveta ḡarone ya giugiuenta ruvane, nama a tubuḡana. ²³Peroveta boni umanama ya riuna,

“Tokare Matatapu e boga be gomana tauḡominama e tikana, be taudi inam gomeninama tai isana Imanuel.”

Isa Imanuel inam baninama “Mamaitua tauda ḡarode.”

²⁴Jousep ya kenakena midisuḡuna murine, aba Bada na aneama ya riuriuena nama ya voiena, tauna Meri ya paḡo da naumeki na waivima. ²⁵Be Jousep Meri mate nam tunidima ti rawateḡei rubudina naumeki da Meri gomana tauḡomina ya tikana. Dabudine Jousep inam gomeninama yai isana “Yesu”.

Nuauyauya banegidima Yesu a vakitana

2 ¹Guyau Herod na raḡanie, Yesu Judia nopone Betliem meagaina ya tubutubuḡana murine, nuauyauya banegidima suara na kaba tavama yawwane nama be a verauna Jerusalemma. ²Be taudi guyau ai taravirena, “Gomana ḡaubonama deḡo dobudine ya tubuḡa, Jius adi guyauma? Tauma suara na kaba tavae gomana na kiporama kè kita be kè verauna rauduneenama aubainama.”

³Raḡanine guyau Herod inam giunama nama ya vaivaiena, nuanama ya rovona. Be banaga matabudi Jerusalem nopone, taudi mate nuedima ya rovona. ⁴Inam raḡanine tauna pirisi babadidima be tarawatu tauwai katakataidima matabudi ya rawateḡeidina be, Tauwai yawasana deḡo dabudine e tubuḡana vutuna yai taraviredina. ⁵Be taudi a paribee be a riuna, “Tauwai yawasana tokare Judia nopone Betliem meagaina e tubuḡana, baninama peroveta ya giruma be umanama ya riuna,

6 “Tam Betliem Judia provins nopone, tam nam meagai yababa Judia guyaguyaudima ġarodie.

Ibewa, baninama tam nopome tokare guyau dosinama e tubuġa be tauna yau banagama Israel banegidima e rabedina.”

7 Dabudine Herod nuauyauya banegidima moisirie ya rawateġeidi be yai taravira yaġeyaġedina da taudi aba raġanine kipora ya maġatara be a kita. 8 Naumeki da guyau nuauyauya banegidima ya riupore nawedi Betliemma be umanama ya riuedina, “Koi wanawana kaua da inam gomeninama ko banavina. Be gomeninama ko kitana raġanine, ko verau munaġa da taugu ko riuegu be taugu mate yà naġo da gomeninama yà rauduneena.”

9 Naumeki da guyau na giuma a vaie ya kovikovina murine, taudi naġo ai karena. Be kiporinama a kitakitana vutuna a kita watani be a vawatanina, naumeki da deġo gomana ya tubutubuġana debane kipora ya midi kwasana. 10 Be taudi nama a kitakitana, taudi ai nuavere kauana. 11 Raġanine vadæ a tavatavana, taudi gomana a kitana, tinanama Meri mate. Naumeki da taudi tuapikedie a raupari be gomana a rauduneena. Dabudine taudi adi puyoma a kaiporaġa be gomana a puyona, gold, piupiu be kai bodinama ġabuġabunama maesinama dosinama isanama ‘Mera’. 12 Inam kauinama murine Mamaitua raubonie nuauyauya banegidima nuedima ya boru be ya riuedina da nam sibo a munaġa Herod ġarone. Vutuna aubainama taudi wari keda a paġo da a munaġana adi dobue.

Jousep be Meri gomana a tika be naira Ijptma a naġona

13 Nuauyauya banegidima a naġonaġona muridie, Bada na aneama Jousep ġarone raubonie ya maġatara be umanama ya riuen, “Kwa midisuġu, gomana kwa tika be tinanama mate naira ko naġona Ijptma. Be dobudine ko miana naumeki da taugu yà riuem da ko verau munaġana, baninama guyau Herod tauna gomana e wanewanena ei gurina aubainama.” 14 Naumeki da Jousep ya midisuġu, da gomana ya tika be tinanama mate yai dokedi da kupie meagai a gose da a naġona Ijptma. 15 Be taudi Ijptma a miana naumeki da Herod e gurina. Uma kaidima inam peroveta aba boni yawai perovetaena nama yodi a tubuġana. Peroveta umanama ya riuna, “Natuguma Ijptma ya miamiana be è riue da ya dobina.”

16 Be raġanine guyau Herod ya kita da nuauyauya banegidima tauna ġarone nam ti tava munaġana, vutuna aubainama tauna nuanama yai medi kauana. Inam raġanine tauna nuauyauya banegidima aba a giugiuena ya noġota wairuvedi be na tauġarama ya riuporedi be ya riuna, “Ko naġo Betliem meagain, be Diane meagaidima mate nopodie be seda tautauġomidima adi suarama rabui be uma ya yovo munaġana

matabudi koi guri rovodina.” Tauna nuauyauya banegidima adi giuma ya noḡota wairuvedi be nama ya giuna. ¹⁷Be inam peroveta Jeremaia boni aba ya giugiuena nama ya tubuḡana. Tauna umanama ya riuna,

¹⁸“Banaga ḡaba be nuaboya dosinama a vaiena Rama meagainama nopone.

Reichel na sedama ya ḡabegābedina, be taudi nam tenetenēgina da sibo a riuwai nuasubasuba, baninama na sedama matabudi a guri rovona.”

Jousep, Meri be adi gomana mate a munaḡana Israelma

¹⁹Raḡanine Herod ya gurigurina murine, Bada na aneama raubonie Jousep ḡarone Ijptma ya maḡatara ²⁰be umanama ya riuena, “Kwa midisuḡu, gomana be tinanama mate kwai dokedi be ko munaḡana Israelma. Baninama taudi aitaḡa gomana waigurinama a riuriuena, inam banegidima yodi a gurina.”

²¹Naumeki da Jousep ya midisuḡu be gomana be tinanama mate yai dokedi be a munaḡana Israelma. ²²Be tauna e vaiena, be Herod natunama Arikelas tamanama gabunama ya paḡo be Judia provins nopone yai badana. Vutuna aubainama Jousep dabudi naḡonama ya nairana. Be anea raubonie Jousep ya riue be tauna ya naḡona Galili provins nopone. ²³Naumeki da taudi a naḡona Nasaret meagaina be dabudine a miana. Be inam aba peroperoveta boni a giugiuena nama ya tubuḡana. Peroperoveta umanama a riuna: “Banaga tokare Yesu tai isana Nasaret baneginama.”

Jon tauwai babataito Yesu na kedama ya sepana

(Mk 1:1-8; Lk 3:1-18; Jn 1:19-28)

3 ¹Inam raḡandie Jon tauwai babataito Judia provins nopone ya tava be dobu kavakavane ya rarau guguyana. ²Be tauna umanama ya riuriuna, “Noḡota vitara ko paḡo be ami noḡotama ko vitaredina, baninama Mamaitua na waiguyauma kaiteka maida e tavatavana.” ³Jon tauwai babataito tauna vutuna peroveta Aisaia ya giugiuena. Aisaia umanama ya riuna,

“Banaga dobu kavakavane e yokoyokona,

Bada na kedama ko sepa, be keda ko kawa didimanidina na kaba verauma aubainama.”

⁴Jon na garama kamel vuvuḡinama voivoienama ya kotekotena. Be musara kopinama kwarikwarinama yai boretaiena, be tauna na kanima inam kapau be iwavi. ⁵Banaga toitoi Jerusalemḡa, Judia provinsne be upa Jodan banegidima matabudi Jon ḡarone a tavana. ⁶Dabudine taudi adi gewagewama matabudi a kuvesidi be tauna yai babataitodina upa Jodan nopone.

⁷Raġanine tauna e kitana be Parisi be Sadisi banegidima toitoi a veraverauna ġarone deġo banaga yawai babataitodie, dabudi Jon taudi umanama ya riuedina, “Taumi maika mota sarama natunatudima! Taumi aitau ya riuemi da tokare Mamaitua na kovoġama ko vora pore? ⁸Ami yawasanama ko vitaredi be yawasana veredima banidima koi maġataridi da banaga ta kitedina, ⁹be nam ko noġoti be ko riuna, ‘Tauda Eibraham natunatunama, aubainama nam tokare aba gewagewanama ġarode e tubuġa.’ Yà riuriuemina, deġoda Mamaitua sibo i ġoena, tauna tokare teneteneġinama kaua yekudie seda yai tubuġidina Eibraham aubainama. ¹⁰Bada tamiyoko kaite kai bogane ya boruna, be deġo kaidima banidima nam veredi, matabudi tokare e taraġa be e gabu gorudina.

¹¹“Taugu upa kavakavae yàwai babataitomina, ami noġotama ko vitaredina aubainama. Be banaga murigue e veraverauna, tauna banaga wairewapana vavasaġinama nam maika taugu. Be taugu nam veregu da na kaġasumama yà ragaudi. Tauna tokare Arua Babaue be kaie ei babataitomina. ¹²Tauna banaga veredi be gewegewedima e daridariġedina maika raisi. Tauna raisi e tutu, be sive nopone e ġini be sive mui e suve da ġavoe e naġonaġona, be banidima ġavoe ta dobidobina. Be tauna raisi banidima e ragaudi be na vadae e biribiridina. Be muinama kai karakaratine ei poraġa be ta kara nonoġedina.”

Jon Yesu yai babataitona

(Mk 1:9-11; Lk 3:21-22; Jn 1:29-34)

¹³Naumeki da Yesu Galilima be ya verauna upa Jodanma, da Jon sibo tauna yai babataitona. ¹⁴Be Jon ya riutuagaie be ya riuna, “Tam aba aubainama taugu ġarogue kuya verau? Tam sibo taugu kuyai babataitoguna.” ¹⁵Be Yesu ya paribee be ya riuna, “Ibewa, inam naumeki. Uma inam Mamaitua na ġoanama naumeki da tà voiena.” Inam raġanine Jon yai aninana.

¹⁶Naumeki da Yesu ya babataito ya kovi da tauna upae be ya tavatavana raġanine, mara ya nuaporaġa be tauna Arua Babau ya kitana ya yovoyovona ġarone kiu gabubu maika. ¹⁷Be marae bona yadobi be ya riuna, “Inam tauna taugu natuguma nuaguma e paġopaġona, be taugu yàwai nuaverena tauna ġarone.”

Yesu na raurubuma

(Mk 1:12-13; Lk 4:1-13)

4 ¹Dabudine Arua Babau Yesu yai doka nawena dobu kavakavane da Diaboro sibo Yesu ya raurubuna. ²Yesu dabudine ya widinana, kupi da suara raġan 40 a kovikovina, murine tauna kani ya kara kauena. ³Inam raġanine tauraurubu Yesu ġarone ya tava be ya riuna, “Deġoda tam Mamaitua Natunama, naumeki da uma yekudima kwa riuedi da tai

rawaburedi.”⁴ Be Yesu ya paribee be ya riuna, “Girugiruminama porane girugiruminama umanama ya riuna,

‘Banaga nam tokare burediḡa na yawasanae tà mia, ibewa da Mamaitua riunama matabuna na yawasanae tà miana.’”

⁵ Dabudine Diaboro Yesu yai doka nawena Jerusalemma meagai babaune be Tempol debane a midi be ya riuna, ⁶ “Deḡoda tam Mamaitua Natunama, naumeki da uma dobudine kwa kuruva, baninama Girugiruminama porane girugiruminama umanama ya riuna,

‘Mamaitua na aneama e riuporedi da tam ta rabemna. Be nimedie ta kaisuḡum da nam yekue kaḡamma kwai riḡedi.’”

⁷ Be Yesu ya paribee be ya riuna, “Be girugiruminama porane girugiruminama mate umanama ya riuna,

‘Bada, am Mamaituama nam kwa raurubu.’”

⁸ Dabudine Diaboro Yesu yai doka nawena oya daudau kwatikwatinama debane, be dobu na waiguyauma waimata veraveraudima matabudi Yesu yai katai ⁹ be ya riuna, “Deḡoda tam kwa rauduneeguna, uma yabedima matabudi tam yà utemna.”

¹⁰ Be Yesu ya paribee be ya riuna, “Kwa naḡo ḡavoe, Seitan. Baninama girugiruminama porane girugiruminama umanama ya riuna,

‘Bada, am Mamaituama taunaḡa kwa raudunee be ḡarone kwa noyana.’”

¹¹ Dabudine Diaboro Yesu ya gose be anea a dobi da Yesu a saguna.

Yesu na noyama yai karena

(Mk 1:14-15; Lk 4:14-15)

¹² Raḡanine Jon dibure a boru be varinama Yesu ya vaivaiena, tauna ya munaḡana Galilima. ¹³ Naumeki da tauna Nasaret ya gose be ya naḡona Kapeniamma ya miana. Kapeniam inam yawawa dosinama diane, dobu Sebulun be Naptali nopodie. ¹⁴ Uma kauinama peroveta Aisaia aba ya riuriuena, nama ya tubuḡana. Tauna umanama ya riuna,

¹⁵ “Dobu Sebulun be Naptali yawawa diane, upa Jodan murine.

Tam dobumma tawai isamna Galili, be inam dabudi banaga ta miamiana taudi eteni, nam Jius.

¹⁶ Banaga aitaḡa kupie a miamiana, taudi yana dosinama a kitana.

Taudi aitaḡa guri na waikupikupie a miamiana, yodi yana raḡan maika e senesenerina a kitana.”

¹⁷ Inam raḡanine be nokoi ya naḡona Yesu rauguguya yai kare be ya riuna, “Noḡota vitara ko paḡo be ami noḡotama ko vitaredi, baninama Mamaitua na waiguyauma kaiteka maida e tavatavana.”

Yesu na tauwai muriwatanama 4 ya vine dokedina
(*Mk 1:16-20; Lk 5:1-11*)

¹⁸ Yesu Galili yawawinama dianağa ya nağonağo rağanine, tauna tautauğoma rabui ya kitedina, Saemon awai isana Pita be tasinama Endru. Taudi tauwai sagida, aubainama adi sagidama topae a poraporağana iyana vunūğidima aubainama. ¹⁹ Dabudine Yesu ya riuedina, “Ko verau koi muriwatanegu be taugu ya voiemida taumi banaga ko konedina.” ²⁰ Inam rağanine taudi waigapa adi sagidama a gosağa be Yesu ai muriwatanena.

²¹ Naumeki da nağo yai kare munağe be ya nağonağo da tautauğoma ġesaudima rabui ya kitedina, Jeims be tasinama Jon taudi Sebedi natunatunama. Taudi wagae a miamiana tamedima Sebedi mate be adi sagidama a kawakawa batebatedina. Be Yesu taudi ya riuedina, “Ko verau be koi muriwatanegu.” ²² Inam rağanine taudi waigapa waga be tamedima a gosedi be Yesu ai muriwatanena.

Yesu banaga sidesidedima yawai yawasanidina
(*Mk 1:32-39; Lk 4:40-44*)

²³ Yesu Galili noponağa ya babara nağo be sinagog nopodiğa yawai katakatai, be Mamaitua na waiguyauma varinama verenama ya rarau guguyena. Be tauna banaga adi sidama tabu be tabu a ragaragaudina yawai yawasanidina. ²⁴ Be Yesu varinama Siria nopone ya daberara be banaga adi sidama tabu be tabu a verauğedina Yesu ġarone. Banaga ġesaudima muya dosidima ragaragaudima, ġesaudima penama kokukokudima be banaga ġağarua kokukokudima, be ġesaudima tuera ragaragaudima, matabudi yai yawasanidina. ²⁵ Be patara dosinama Galiliğa veraveraudima, Dekapolisğa, Jerusalemğa, Judiağa be upa Jodanma noağo nevane dobunama banegidima mate Yesu awai muriwatanena.

Yesu oya debane ya rauguguyana
(*Lk 6:20-23*)

5 ¹ Rağanine Yesu patara nama ya kitakitana, tauna ya sağa ya nağona oya debane be ya miana. Dabudine na tauwai muriwatanama ġarone a tava ² be Yesu patara waikatakataidima yai kare be ya riuna,

³ “Taumi nuemima e verena, aitauga nuemima tabutabune Mamaitua na saguma ko goeğona, baninama taumi tokare Mamaitua na waiguyauma ko pağona.

⁴ Taumi nuemima e verena, aitauga ami gewagewama aubaidima ko ġabağabana, baninama taumi tokare Mamaitua ei nuasubemina.

⁵ Taumi nuemima e verena, aitauga voyağota banegimima, baninama taumi tokare dobu matabuna koi buderiena.

- 6 Taumi nuemima e verena, aitauga Mamaitua matane didimana ko goeḡoe be ko wanewane guratena, baninama taumi tokare ami goanama Mamaitua e utemina.
- 7 Taumi nuemima e verena, aitauga banaga taurau nuatoiedima, baninama taumi tokare Mamaitua e raunuatoiemina.
- 8 Taumi nuemima e verena, aitauga nopomima didimanidima be nam mira mate, baninama taumi tokare Mamaitua ko kitana.
- 9 Taumi nuemima e verena, aitauga suba tauvoienama, baninama taumi tokare Mamaitua ei kawa natunemina.
- 10 Taumi nuemima e verena, aitauga banaga ta raraukivi gewegewemina ami yawasana didimanidima aubaidima, baninama taumi tokare Mamaitua na waiguyauma ko paḡona.
- 11 “Taumi nuemima e verena, deḡoda banaga ta kunuremi, ta raraukivi gewegewemi be giu tabu be tabu kaikaiyovudie tai wavumina, baninama taumi taugu kowai muriwataneguna aubainama. ¹² Raḡanine inam kaidima nama ḡaromie ta tubutubuḡana, taumi koi nuavere be ko taukaina, baninama ami maesama dosinama marae e kenakenana. Banaga ḡesaudima boni peroveta ḡarodie inam kaidima teneḡidima nama a voivoiedina.

Buta be yana wainasidima

(Mk 9:50; Lk 14:34-35)

¹³ “Banaga adi butama inam taumi. Be deḡoda buta^a dininama e gewagewana, nema kwa voia bake da e dini munaḡa? Inam butanama kaite ya gewagewana, be banaga tokare inam butanama ta porekaiyati be ta vagudagudana.

(Mk 4:21; Lk 11:33)

¹⁴ “Banaga adi kodamma inam taumi. Be uma ko noḡoti, meagai oya debane nam ei moisiri be teneteneḡina, ¹⁵ be banaga nam kodam ei rageti be gurewa dibune e boru ibewa, tauna kodam ḡavoe e boru da vada nopone banaga matabudi ei yanedina. ¹⁶ Inam kauinama teneḡinama nama, taumi banaga ḡarodie nama sibo koya yanana. Inam raḡanine taudi ami voiama veredima ta kitedi, be Tamemima marae isanama ta kawa saḡena.

Tarawatu na giuma

¹⁷ “Taugu è verauna nam ko noḡoti da Mousis na tarawatuma be peroveta adi waikatakataima ya kawa gewegewedi, ibewa. Taugu nam yabedima kawa gewegewedima aubaidima è verauna, ibewa. Taugu è

^a 5.13 Buta inam soriti.

verauna tarawatu banidima yai maḡataridina aubainama. ¹⁸Yà riuriu kauemina da nam ai tarawatu tenaḡa maika e samoa yababa, ibewa da noḡone tarawatu aba ya giugiuedina, matabudi ta tubuḡana. Yodibe mara be dobu ta samoana. ¹⁹Tam aitau deḡoda tarawatu avedi da ḡaubo kokonama kwa kita tuatuaḡaie be kwawai kati kotovina, be inam kedane nama am banagama kwawai katakataidina, tam tokare Mamaitua na waiguyauma nopone ta kita poremna. Be tam aitau tarawatu kwa voteyeteyedi be inam kedane nama banaga kwawai katakataidina, tam tokare Mamaitua na waiguyauma nopone ta kita saḡemna. ²⁰Be yà riuriuemina, ami yawasanama Mamaitua matane ko kawa didimana kauedina, be taumi nam Parisi be tarawatu tauwai katakataidima maika ko voia. Taudi adi yawasanama tà kitekitedina da kabe banaga veredi be nopodima gewagewa ya moḡavu. Deḡoda taudi maika ko voiana, taumi tokare nam Mamaitua na waiguyauma nopone ko saḡa.

Rauvunuḡa na giuma

²¹“Taumi koya vaie da boni Mamaitua ya riuna, ‘Nam kwa rauvunuḡa. Be aitau da banaga ei gurina, tauna tokare ta etarena.’ ²²Be taugu yodi yà riuriuemina da tam aitau turamma ḡarone nuama ei medina tam tokare ta etaremna. Be tam aitau da turamma kuya riuwai gewana tam tokare etara dosine kwa midina. Be deḡoda tam aitau turamma kuyai tara tautauena, tam inam gienae kai matane naḡonama kwawai rabena.

²³“Vutuna aubainama tam deḡoda am puyoma oltae kuya verauḡena Mamaitua puyonama aubainama, be dabudine kuya noḡoti da turamma mate poumie gewagewa e kenakenana, ²⁴naumeki da am puyoma olta diane kwa gose, be kwa munaḡa da noḡone turamma mate inam gewagewanama ko kawa didimani dokena. Yodibe kwa verau munaḡa da am puyoma Mamaitua kwa utena. ²⁵Deḡoda banaga aitau tam e nawemna etara aubainama, naumeki da kedae dabudine am gewagewama kwa kawa didimana makaiena, da nam etara tauwai badenama nimane e borum. Baninama etara tauwai badenama tauna tokare porisiman nimane e borum be porisiman tauna tokare e nawemna dibure. ²⁶Be yà riuriu kauemna da tam dibure kwa miana, naumeki da mane damodamonama kwai maesa ḡavutina.

Monagemma debane nam mui kwa pore

²⁷“Taumi koya vaie da boni Mamaitua ya riuna, ‘Nam monagemma debane mui kwa pore.’ ²⁸Be taugu yodi yà riuriuemina, tam aitau da aba waivinama kuya kita waidinidinina, tam inam kaite nuamma nopone gewagewa kwa voivoiena, be monagemma debane mui kwa poreporena. ²⁹Deḡoda matamma kasaunama e kauem da gewagewa kwa voivoiena, naumeki da kwa kunavai be kwa porekaiyatina. Verenama da matamma

tenaḡa mate mara nopone kwa saḡana, be nam matamma rabui mate, da Mamaitua gienae e pore nawemna. ³⁰Be deḡoda nimamma kasaunama e kauem da gewagewa kwa voiena, naumeki da kwa tom pore be kwa porekaiyatina. Verenama da nimamma tenaḡa mate mara nopone kwa saḡana, be nam nimamma rabui mate, da Mamaitua gienae e pore nawemna.

Waigosaḡa na giuma

³¹“Taumi koya vaie da boni Mamaitua ya riuna, ‘Aitau na visarama gosenama e ḡoena, naumeki da tauna waigosaḡa pepanama na visarama sibo ya utena.’ ³²Be taugu yodi yà riuriuemina deḡoda tam aitau am visarama kwa gose yababena, avedi da tauna nam ai tauḡoma mate gewagewa ti voiena, tam inam am visarama kwa voivoiena da tauna tokare gewagewa ei tubuḡi, be tam debame mui e porena. Be tam aitau da inam waivinama gosegosenama kwa naḡina, tam inam kwa rarau waivina.

Saugawapa na giuma

³³“Be mate koya vaie da boni Mamaitua ya riuna, ‘Deḡoda Bada isane kuya sauga wapana, naumeki da kwa voiena.’ ³⁴Be taugu yodi yà riuriuemina, nam aiyaba isane ko sauga wapa. Nam mara isane, baninama inam Mamaitua na kaba miama, ³⁵be nam dobu isane, baninama inam Mamaitua na kaba waivutuḡama, be nam Jerusalem isane, baninama inam guyau dosinama na meagaima. ³⁶Be mate nam iwakidumie ko sauga wapa, baninama tam nam teneteneḡina da deba vuvuḡimma kwa kawa duba bo kwa kawa yaguni. ³⁷Vutuna aubainama tam deḡoda waianina, naumeki da kwai anina ḡomana. Be tam deḡoda tuaḡai, naumeki da kwa tuaḡai ḡomana. Be deḡoda giu ḡesaudima nama kitedima mate kwa vatodina, inam gewagewa baninama inam Seitan na voiamana.

Raubiwa na giuma

(Lk 6:27-36)

³⁸“Taumi koya vaie da boni Mamaitua ya riuna, ‘Deḡoda turamma matamma e kunavaina, naumeki da tam mate tauna matanama kwa kunavaina. Be turamma mokamma ei mia kotovina, naumeki da tam mate tauna mokaḡama kwai mia kotovina.’ ³⁹Be taugu yodi yà riuriuemina, gewagewa baneginama aba ḡarome ya voia waigewana, nam kwai ḡare. Deḡoda aitau nevakaumma e riḡana, kwa gose da nevakauma ḡesaunama mate e riḡana. ⁴⁰Deḡoda aitau e etaetarem be am kwamama e paḡona, naumeki da am rupuma mate kwa utena! ⁴¹Deḡoda aitau e segerim da na taragaima sibo kuya kiroḡa da koya naḡo deḡo

parata ya boruborue sibo kuya tavana,^b be tam inam paratinama ya boruboruna, kwai muri be tauna mate ko naḡo be wari madanie kwa gosena. ⁴²Aitau aiyaba ḡarome ei baḡena, naumeki da kwa utena be nam kwa riutuagāie.

Ami ḡaviama koi nuapaḡoedina

⁴³“Taumi koya vaie da boni Mamaitua ya riuna, ‘Turamma turamma nuamma e paḡona.’ Be banaga ḡesaudima a riuriuna, am ḡaviama kwa tuaḡaiena. ⁴⁴Be taugu yodi yà riuriuemina da ami ḡaviama mate nuemima e paḡona, be aitaḡa ta raraukivi gewegewemina aubaidima ko moiragina, ⁴⁵inam kedane taumi riukaua Tamemima marae natunatunama. Baninama tauna suara be kusana e riuriupore yovoḡena banaga veredi be gewegewedima matabudi aubaidima. ⁴⁶Deḡoda taumi aitaḡa tawai nuapaḡoemina taudiḡa koi nuapaḡoedina, tokare maesa ko banavi, bo? Ibewa, inam damone nam aba. Baninama gewagewa banegidima taudi mate nama ta voivoiana. ⁴⁷Be deḡoda am damma banegidima taudiḡa kwai kaiwedina, inam kwa voivoiena na verema aba? Banaga nam waisumegidi mate nama ta voivoiana. ⁴⁸Taumi ami yawasanama verene be didimanine ko miana maika tamemima marae.

Pairu na giuma

6 ¹“Ko kita kua da voia veredima ko voivoiedina, nam patara matedie ko voiedi da taudi sibo a kitemi. Deḡoda nama ko voiana, tokare nam maesa tamemima marae ḡarone ko paḡo. ²Vutuna aubainama deḡoda waikaruwaḡawaḡa baneginama ko pairuena, nam bogigi ko suve da banaga ta kataie be isamma ta kawa saḡe. Inam banaga kaikaiyovudima adi voiam, taudi sinagog nopodie be doḡae patara matedie nama ta voivoiana. Taugu yà riu kauemina da inam nama banegidima taudi adi maesama naumeki ta paḡopaḡona. ³Be tam deḡoda banaga waikaruwaḡawaḡanama kwa paipairuena, naumeki da nam aitau diame e kataie. ^c ⁴Be am pairuma moisirie kwa voiena. Inam raḡanine Tamamma marae e kitam da tam aba moisirie kwa voivoiena, naumeki da tauna tokare am maesama e utemna.

Moiragi na waikatakataima

(Lk 11:1-4)

⁵“Raḡanine kwa moimoiragina, nam banaga kaikaiyovudima maika kwa moiragi, baninama taudi adi ḡoana kauama inam sinagog nopodie

^b 5.41 Gurik bonane ya riuna: ‘One mile’ kwa gose be ‘two miles’ kwa paḡona.

^c 6.3 Gurik bonane ya riuna: Nimamma kasaunama e paipairuna, nima seninama nam e kataie da nima kasaunama aba e voivoiena.

ta midi bo keda poudie deḡo banaga toitoi adi kaba babare, dabudine ta midi be ta moimoiragina da banaga kabe ta kitedi. Taugu yà riu kauemina da inam nama banegidima taudi adi maesama naumeki ta paḡopaḡona. ⁶Be tam raḡanine moiragi kwa ḡoena, naumeki da kwa naḡo am vadae, matakeda kwa gudu be Tamamma Mamaitua miamia moisirinama ḡarone kwa moiragina. Inam raḡanine Tamamma Mamaitua aba moisirie kwa voivoiena e kitana, be tauna tokare am maesama e utemna.

⁷“Be ko moimoiragina raḡanine, nam giu kavekavedie ami moiragima debane koi poto yababedi, banaga nam waisumeḡidima adi voiamā maika. Taudi tawai noḡotana da kabe adi moiragie giu tai potodi be Mamaitua adi moiragima kabe e paḡo. ⁸Nam inam banegidima maika ko voia, baninama taumi Tamemima Mamaitua ami ḡoanama kaite ya katai dokedina, muriḡa da kowai baḡana.

⁹“Taumi sibo umanama koya moiragina:

Tamamaima marae miemienimma, dobu matabuna isamma babaunama sibo a vivirena.

¹⁰ Tam am waibadama sibo ya verau. Be kwa sagumai da am ḡoanama doḡue ka voie, maika marae ta voivoiana nama.

¹¹ Ama kanima raḡan patapatanama sibo kuya utemai.

¹² Be ama gewagewama kwa noḡota poredi, nema tauma ama banagama adi gewagewama kè noḡota poredina nama.

¹³ Be nam raurubue kwai dokemai. Tauma gewagewa nopone be tam kwai yawasanimaina.^d

¹⁴“Be deḡoda taumi ami banagama adi gewagewama ko noḡota poredina, naumeki da Tamemima marae taumi mate ami gewagewama e noḡota poredina. ¹⁵Be deḡoda taumi ami banagama adi gewagewama nam ko noḡota poredi, naumeki da Tamemima marae mate ami gewagewama nam e noḡota poredi.

Widina na giurma

¹⁶“Raḡanine ko widiwinana, nam banaga kaikaiyovudima maika ami widinama patare koi maḡataridi da banaga ta kitemi da taumi ko widiwinana. Taudi ta raugari be ta midimidi naḡona kabe banaga ta kitedi. Taugu yà riuriu kauemina da inam nama banegidima taudi adi maesama naumeki ta paḡopaḡona. ¹⁷Be taumi ko widiwinana raḡanine, ko sigu be noḡomima ko buyodi ¹⁸be ko voie da banaga matedie taumi kabe nam ko widiwinana. Be Tamemima miamia moisirinama taunaḡa e kitemi da taumi ko widiwinana. Inam raḡanine Tamemima Mamaitua

^d 6.13 Gurik baibol ḡesaudima nopodie umanama a girumina: Baninama tam vutuna ḡarome waiguyau, rewapana be neneḡara ta kena nonoḡana. Inam riukaua.

aba moisirie ko voivoiena e kitana, be tauna tokare ami maesama e utemina.

Marae sibo koyai taragaina

(Lk 12:33-34)

¹⁹“Nam ami taragaima dobue kowai damdi, baninama deḡoda kwarikwari ta kanidi, bo ta raubusabusaga bo banaga vadae ta sonaga ta saḡa be ta danenedina. ²⁰Vutuna aubainama marae koi taragaina, baninama inam dabudine tokare nam ami taragaima kwarikwari ta kanidi bo ta raubusabusaga bo banaga vadae ta sonaga ta saḡa be ta danenedi. ²¹Baninama ami taragaima deḡo dabudine ta kenakenana, taumi tokare ami noḡota be nuemima tabutabunama dabudine e kenana.

(Lk 11:34-36)

²²“Matamma inam tunimma na kodamma. Deḡoda matamma verenama, naumeki tunimma matabuna yanayanama. ²³Be deḡoda matamma e gewagewana, naumeki da tunimma matabuna ei kupikupina. Be deḡoda yana nopome ei kupikupina, o ebom, inam tadiwanawana ya moraba kauana.

²⁴“Nam aitau babada rabui ḡarodie ei yaraga. Deḡoda nama e voiana, naumeki da noḡone badanama e tuaḡaie be muriḡa badanama e ḡoena; bo noḡone badanama e ḡoe be muriḡa badanama e tuaḡaiena. Taumi nam mane be Mamaitua ḡarodie koi yaraga be teneteneḡina, ibewa!

Nam koi nuaboya

(Lk 12:22-31)

²⁵“Taugu ya riuriuemina da yawasana tubuḡe aubainama nam koi nuaboya da aba sibo koya kani bo koya tego. Be nam koi nuaboya da aba sibo koya kote tunimima aubainama. Baninama yawasana noḡotinama ya moraba vavasagana, nam maika kani. Be tunimima noḡotinama ya moraba vavasagana, nam maika gara. ²⁶Kiu gunume ta rovorovona ko noḡotidi! Taudi nam tima sipisipina, be nam kani timawai damna. Be yaḡoro tamemima marae ewai kanidina. Be taumi noḡotimima ya moraba vavasagana, nam maika kiu. ²⁷Taumi inam yabedima kowai nuaboyedina, tokare tai yawasanimi, bo?

²⁸“Aba aubainama gara kowai nuaboyedi? Nanari ko kitedi dobire ta gogogogona. Taudi nam tima noyanoyana, be gara nam tima voivoiedina. ²⁹Be taugu ya riuriuemina, avedi da guyau Solomon na garama veredima waimatakanikanidima, be nam ai gara tenaḡa i vere vavasagana maika nanari. ³⁰Mamaitua berana e voiedi be ta busobusona kitedima a vere kauana. Be inam beranidima pomai tokare kai e kara gorudina. Be taumi noḡotimima inam ya moraba kauana Mamaitua ḡarone, nam

maika berana. Vutuna aubainama Mamaitua tokare teneteneḡinama ei garemina, be taumi naumeki da koi sumaḡana be nam ami noḡotama e vobekubeku.

³¹“Be nam koi nuaboya be ko riuna, ‘Aiyaba tà kani?’, bo ‘Aiyaba tà tego?’, bo ‘Aiyaba tà kote?’ ³²Banaga nam waisumeḡidi taudi inam yabedima tawai nuaboya kauedina. Be taumi Tamemima marae ya kataie da inam yabedima ko ḡoēḡoedina. ³³Be taumi ko kita da noḡone Mamaitua na waiguyauma be didimana kededima ko wana dokedi. Yodibe tauna inam yabedima matabudi tokare e utemina. ³⁴Vutuna aubainama nam pomai na kauama yodi koi nuaboye. Pomai ko gose da taunaḡa ei nuaboya munaḡena. Raḡan tenatenaḡaḡa adi nuaboyama nama ta kenakenana.

Nam koi wavu

(Lk 6:37-42)

7 ¹“Nam turamma na yawasanama kwa kita wairuva be kwa riutuatuagaie da Mamaitua tokare teneḡinama nama ḡarome e voiena. ²Baninama tam nema banaga kwa kitakita wairuvana, teneḡinama nama Mamaitua tam tokare e kita wairuvamna. Tam aba ruvane turamma kwa ruvaruvana, ruvanama teneḡine Mamaitua tokare tam e ruvamna. ³Aba aubainama turamma matane vunavuna kwa kitakita be tam matame kaitupo nam kuma kitakita? ⁴Bo aba aubainama tam matame kaitupo nam ku kaipore, be turamma matane vunavuna kaiporenama kwa riuriue? ⁵Tam banaga kaikaiyovumma! Noḡone tam matame kaitupo kwa kaipore doke da kwai kita kaua, yodibe turamma matane vunavuna kwa kaiporena.

⁶“Yaba babaudima ḡaromie nam daḡadaḡasi ko utedi. Be ami posaruma nam bawa ko utedi, deḡoda taudi inam yabedima ta vagudegededi be tai tauvitaredi da taumi bogemie ta dawena.

Aba ko ḡoena, Mamaitua koi baḡana

(Lk 11:5-13)

⁷“Koi baḡa be e utemina, ko wane be ko banavina, ko raupewapewa be e kaiporena ḡaromie. ⁸Deḡoda aitau ewai baḡana, tokare e paḡona, be aitau e wanewanena, tokare e banavina, be aitau e rarau pewapewana, tokare ḡarone e kaiporena. ⁹Nam aitau tam natumma kani ewai baḡe be tokare yeku kwa ute. ¹⁰Be nam aitau tam natumma iyana ewai baḡe be tokare mota kwa ute. ¹¹Yodi avedi da taumi banaga gewegewemima, be yaḡoro yaba veredima natunatumima ko uteutedina. Naumeki da tamemima marae tauna teneteneḡinama taumi aitaḡa kowai baḡana, tokare yaba veredima e utemina. Baninama tauna kivinama ya vere vavasagaḡana, nam maika taumi.

¹²“Taumi aba ko ḡoeḡoena banaga sibo ḡaromie a voiena, nama taumi banaga ḡarodie ko voiana. Deḡoda nama ko voiana, taumi inam tarawatu be peroveta adi waikatakataima ko vovo teyetyedina.

Keda rabui

¹³“Keda matakedanama ḡuririne ko sonaḡana, baninama gewagewa kedanama inam nuasabunama be matakedanama dosinama, be banaga toitoi inam matakedane ta saḡa be kedanama ta watawatanina. ¹⁴Be yawasana kedanama ya ḡaubo be matakedanama ya ḡuriri kauana, be banaga raubisaḡa inam matakedanama ta banavi be ta watawatanina.

Peroveta kaikaiyovudima

(Lk 6:43-45)

¹⁵“Peroveta kaikaiyovudima ko kita kauedina. Taudi ḡaromie ta tavana kitedima kabe banaga vovoyaḡotidi, be ibewa da taudi nopodima inam tabei maika. ¹⁶Peroveta adi yawasanama ko kita wairuvedi da taudi peroveta veredi, bo gewegewedi. Baninama banaga nam tokare damaya votanama yaguru bogane e ragaudi be teneteneḡina. Be nam aitau mabeko votanama gedara bogane e ragaudi be teneteneḡina. ¹⁷Be teneḡinama nama kai verenama votanama inam verenama, be kai gewagewanama votanama inam gewagewanama. ¹⁸Kai verenama votanama nam gewegewedi, be kai gewagewanama votanama nam veredi. ¹⁹Be ai kaiḡa banidima nam veredi, taudi matabudi tokare Mamaitua e taraḡa be e gabu gorudina. ²⁰Inam kauinama teneḡine peroveta adi yawasanama ko kita wairuvedi be ko kataiedi da taudi peroveta veredi bo peroveta kaikaiyovudi.

(Lk 6:46-49)

²¹“Banaga toitoi ta riuriueguna, ‘Bada, Bada’, be nam tokare matabudi Mamaitua na waiguyaue ta saḡa. Ibewa da aitaḡa Tamaguma marae na ḡoanama ta voivoiena, taudi vutudi tokare Mamaitua na waiguyaue ta saḡana. ²²Inam raḡanine banaga toitoi tokare ta riueguna, ‘Bada, tauma tam isame kè rarau guguya, be tam isame penama kè tavutavu dobiḡedi be mataira dosidima toitoi kè voivoiedina.’ ²³Be taugu tokare yà riuedina, ‘Taugu taumi nam airaḡan e kataiemina. Taumi tarawatu tauwai katikotovidima, ko naḡo ḡavoe.’

Vada taukeridima rabui

(Lk 6:47-49)

²⁴Vutuna aubainama, deḡoda aitau e verau be riuguma e vaie be e voivoiena, tauna noḡota kaua baneginama maika. Tauna na vadama kerinama aubainama dom ya keru gurate da yeku debane na tuatua

yai midiri, be na vadama ya kerina. ²⁵Be kusana dosinama kabaita mate a dobidobina raḡanine, gimori a karuedina, be sive dosinama ya suve da vada ya riḡa rereḡe, be vada nam i bekuna, baninama tuatua a yovo guratana, yeku debane aubainama. ²⁶Be aita da e verau be riuguma e vaivaiena, be nam ima voivoiena, tauna banaga buabuanama maika. Tauna na vadama kerinama aubainama nam dom i keru guratana, tauna na tuatua gimori debane yai midiridi be na vadama ya kerina. ²⁷Be kusana dosinama kabaita mate a dobidobina raḡanine, gimori a karuedina, be sive dosinama ya suve da vada ya riḡarigana, yai mia kamoḡi be ya nuarikarikana.”

²⁸Yesu na giuma ya kovikovina raḡanine, patara Yesu na waikatakataima a base kauena, ²⁹baninama taudi mayanama a paḡo da tauna rewapana mate yawai katakataidina, nam tarawatu tauwai katakataidima maika.

Yesu tauḡoma kito paḡopaḡonama yai yawasanina
(Mk 1:40-45; Lk 5:12-16)

8 ¹Raḡanine Yesu oya debane be ya yovoyovo munaḡana, patara dosinama ai muriwatanena. ²Dabudine tauḡoma tenaḡa kito paḡopaḡonama ya verau Yesu noḡone da tuapikane ya raupari be ya riuna, “Bada deḡoda kwa ḡoena, naumeki da kwai yawasaniguna.”

³Naumeki da Yesu nimanama yai yoyo, da tauḡoma ya taukoni be ya riuna, “Naumeki, ya ḡoeḡoena, kwa yawasanana.” Be inam dabudine yai raḡantenaga da tauḡoma kito paḡopaḡonama ya yawasanana. ⁴Dabudine Yesu inam tauḡominama ya riuna, “Aba ḡarome ya tubuḡana, nam aita kwa riue, be kwa naḡo piriḡarone da tauna e kaiviramna. Yodibe Mamaitua kwa puyona, Mousis na tarawatuma e riuriuna nama. Dabudine banaga ta kitam be ta kataie da tam kuya yawasanana.”

Yesu tori matanama na taunoyama yai yawasanina
(Lk 7:1-10)

⁵Be Yesu raḡanine Kapeniamma ya tavatavana, dabudine tori matanama Yesu ḡarone ya tava da yai baḡa be ya riuna, ⁶“Bada, yau taunoyama vadae e kenakenana be tauna tuninama ai kaukudukudu be muya dosinama e kenakenana.” ⁷Be Yesu tauna ya riuna, “Taugu mate ta naḡo be yai yawasanina.” ⁸Be dabudi tori matanama Yesu ya paribee be ya riuna, “Bada taugu nam veragu da tam yau vadae sibo kuya verau. Be bonamḡa kwa riu da yau taunoyama e yawasanana. ⁹Taugu mate waibada dibudie ya miamiana, be mate banaga iḡeiḡeridima yau waibadama dibune ta miamiana. Be raḡanine tauḡara ya riuna, ‘Kwa naḡo’, be tauna e naḡonaḡona. Be ya riuna, ‘Kwa verau’, be tauna e veraverauna. Be yau taunoyama ya riuna, ‘Uma kwa voie’, be tauna e voivoiena.”

¹⁰Raḡanine Yesu nama ya vaivaiena, tauna tori matanama ya basena, be dabudine yai tautinamuri da patara awai muriwatanena ya riuedina, “Yà riuriu kauemina, taugu nam airaḡan Israelma umanama baneginama na waisumaḡama dosinama deḡo e banavi rubuna. ¹¹Taugu yà riuemi, tokare banaga toitoi dobu matabuna nopone ta verauna, Mamaitua na waiguyauma nopone. Dabudine taudi Eibraham, Aisik be Jeikob mate ta mia be ta soi tenaḡana. ¹²Be banaga aitauga noḡone Mamaitua ya vinedina da na waiguyauma nopone sibo a saḡana, be tokare inam banegidima ei poraḡa dobiḡedina tadiwanawana nopone. Be inam dabudine taudi tokare ta yakei be gadigadidima ta sanadididina.”

¹³Dabudine Yesu tori matanama ya riuenana, “Naumeki kwa naḡo, be am waisumaḡama ruwane nama e tubuḡana.” Inam nama ya riuriuna, tori matanama na taunoyama ya yawasana munaḡana.

Yesu banaga toitoi yai yawasanidina

(Mk 1:29-34; Lk 4:38-41)

¹⁴Raḡanine Yesu Pita na vadae ya saḡasaḡana, dabudine Pita rawanama sida poyapoya ya paḡo be ya kenakenana ya kitana.

¹⁵Naumeki da Yesu Pita rawanama nimanama ya taukoni ḡome be poyapoya yai kavena, be waivinama ya midisuḡu be adi kanima ya vokaukauedina.

¹⁶Be ravi ya tavatavana raḡanine, banaga toitoi penama kokukokudima a verauḡedina Yesu ḡarone, be tauna bonane inam aruidima gewegewedima ya tavu dobiḡedina, be banaga sidesidedima mate matabudi yai yawasanidina. ¹⁷Uma kaudima Bada boni peroveta Aisaia ḡarone ya giugiuena ruwane nama ya tubuḡana. Peroveta boni umanama ya riuna, “Tauna dā nuaboyama ya ragaudi be dā sidama matabudi vitanama ya kiroḡidina.”

Yesu waimuriwatanenama na piripirima

(Lk 9:57-62)

¹⁸Yesu patara dosinama ya kitekitedina, tauna na tauwai muriwatanama ya riuedina da wagaе sibo yawawa a davu be noaḡo nevane a naḡona. ¹⁹Dabudine tarawatu tauwai katakainama tenaḡa Yesu ḡarone ya tava be ya riuenana, “Tauwai katakatai, tam deḡo kwa naḡona taugu yà muriwatanemna.” ²⁰Be Yesu ya paribeena, “Inam naumeki be kwa noḡoti da, kiudobo^e adi gabuma gaure ta miamiana, be kiu adi gabuma noḡie ta miamiana, be Banaga Natunama nam deḡo na gabu da tauna e kena.”

^e 8.20 Yesu ya riuna: ‘Fox’. Tauna dobara muserinama be gaure ta miamiana maika kiudobo.

²¹Dabudine Yesu na tauwai muriwatanama ḡesau ya tava be ya riuna, “Bada, taugu yài muriwatanemna, be noḡone kwa gosegu da yà naḡo tamagama yà dobo dokena.” ²²Be Yesu ya paribeena, “Tam taugu kwai muriwataneguna, be banaga guriguridima kwa gosedi da taudiga adi gurima ta dobodina.”

Yesu kaibitibiti ewai badena

(Mk 4:35-41; Lk 8:22-25)

²³Dabudine Yesu na tauwai muriwatanama mate wagae a saḡa da a naḡona, ²⁴be yawawa pouna yai raḡantenage da kaibitibiti dosinama ya tavana. Be rabama dosidima waga a riḡa be upa waga nopone a saḡasaḡana. Be Yesu tauna ya kenakenana. ²⁵Dabudine na tauwai muriwatanama Yesu a rawaḡosori be a riuna, “Bada kwai yawasanimai, kaiteka tà monuna.” ²⁶Be tauna ya paribeedi be ya riuna, “Aba aubainama ko nainaira? Ami waisumagama ya ḡaubo ḡaḡa.” Dabudine tauna ya midisuḡu da sive be rabama ya riutuagaiedi be daumora ya kena munagana. ²⁷Inam raḡanine taudi Yesu a base be a riuna, “Uma ai banaga nama kitana? Tauna sive be rabama ta vovo teyeteyena.”

Yesu banaga rabui penama kokukokudima yai yawasanidina

(Mk 5:1-20; Lk 8:26-39)

²⁸Raḡanine taudi noaḡo nevane Gerasi banegidima adi dobue a tavatavana, banaga rabui penama kokukokudima, taudi kokoagae be Yesu ḡarone a dobina. Taudi ai nuanainaira kauana. ²⁹Be taudi bonedima dosine Yesu a riuna, “Mamaitua Natunama! Tam aba ḡaromaie kwa ḡoḡoḡo? Kovoḡa na raḡanima tokare e tavana, be tam uma dabudine kuya verauna kwa kovoḡa dokemai, bo?”

³⁰Taudi deḡo a midimidina diedie bawa netarinama dosinama a yabayabana. ³¹Naumeki da penama Yesu ai baḡa be a riuna, “Deḡoda kwa tavu dobiḡemaini, naumeki da kwa riupore nawemaina bawa nopodie.” ³²Dabudine Yesu penama ya riuedina, “Ko dobi ko naḡo!” Dabudine penama tautauḡoma a dobi poredi da a naḡona bawa nopodie. Be bawa matabudi oya boganaḡa a manini yovo be yawawa nopone a naḡo, be dabudine upa nopone a tonedi be a gurina. ³³Be bawa tauyosidima taudi naira a naḡo meagaie a tava, be dabudine yaba matabuna a tubutubuḡana adi banagama a riuedina. ³⁴Naumeki be banaga matabudi inam meagaini miemienidima a dobi a naḡona Yesu ḡarone, be taudi Yesu a riu vavasagena da tauna inam dobonama sibo ya gose be ya naḡona.

Yesu banaga tuera paḡopaḡonama yai yawasanina

(Mk 2:1-12; Lk 5:16-26)

9 ¹Naumeki be Yesu waga nopone ya saḡa munaḡa da yawawa ya davu be noaḡo nevane ya naḡona Kapeniamma, na kaba miae. ²Be dabudine

tautaugōma ḡesaudima turedima tuera paḡopaḡonama ma ratiratina a kiroḡa verauḡena Yesu ḡarone. Be raḡanine Yesu inam tautauḡomidima adi waisumaḡama nama ya kitakitana, tauna tauḡoma tuera paḡopaḡonama ya riuena, “Taukui, nam kwai nuaboya, am gewagewama taugu è noḡota porena.”

³Raḡanine tarawatu tauwai katakataidima inam riunama nama a vaivaiena, taudi nuedie ai nuanoḡonoḡota be a riuna, “Uma baneginama Mamaitua ewai dibōḡina.” ⁴Be Yesu inam banegidima aba awai nuanoḡonoḡotedina, ya kataiena, aubainama ya riuedina, “Aba aubainama inam noḡotidima gewegewedima nopomie ta saḡasaḡa? ⁵Aba riunama ya tekateka, ‘Am gewagewama è noḡota porena’, bo ‘Kwa midisuḡu be kwa naḡo’? ⁶Yodi tokare yài kataimi be ko kataie da dobue Banaga Natunama ḡarone rewapanana e kenakenana da gewagewa e noḡota poredina.” Naumeki da Yesu inam tauḡominama tuera paḡopaḡonama ya riuena, “Kwa midisuḡu, am gunima kwa paḡo be kwa naḡona am vadae.”

⁷Inam raḡanine tauḡoma ya midisuḡu be ya munaḡana na vadae. ⁸Dabudine patara inam kauinama a kitakitana, taudi a basena, baninama Mamaitua inam nama rewapaninama banaga ya utena, vutuna aubainama taudi Mamaitua isanama a kaisuḡusuḡuna.

Yesu Metiu ya vinena
(*Mk 2:13-17; Lk 5:27-32*)

⁹Yesu inam gabunama ya gose da ya naḡonaḡo be tauḡoma isanama Metiu ya kitana. Metiu tauna teks na kaba tamima gabune ya miamiana. Be Yesu tauna ya riuena, “Kwai muriwatanegu!” Dabudine Metiu ya midisuḡu be Yesu yai muriwatanena.

¹⁰Naumeki da inam kupine Yesu na tauwai muriwatanama mate a naḡona Metiu na vadae kani aubainama. Be inam vadane gewagewa banegidi be teks tautaminama toitoi a tava be matabudi a kani tenaḡana. ¹¹Dabudine Parisi ta kitana be Yesu gewagewa banegidima mate a kanikanina, naumeki da taudi Yesu na tauwai muriwatanama a riuedina, “Aba aubainama ami tauwai katakataima teks tautamidima be gewagewa banegidima mate ta kanikani tenaḡa?”

¹²Raḡanine Yesu nama ya vaivaiena, tauna ya riuna, “Banaga yawayawasanidima taudi nam dogeta tima ḡoēḡoena, be banaga sidesidedima taudi dogeta ta ḡoēḡoena. ¹³Be ko naḡo da giu uma baninama ko wanena aba ya giue, ‘Taugu raunuatoi kitanama yà ḡoēḡoena, be taumi musare ko tipatipana taugu nam ama ḡoēḡoena.’ Baninama taugu è yovona banaga gewegewedima waiyawasanidima aubainama. Be aitauga ta noḡonoḡoti da taudi banaga veredima, taugu nam taudi aubaidima e yovona.”

Widina waitaraviranama
(*Mk 2:18-22; Lk 5:33-39*)

¹⁴Raḡan tenaḡa Jon tauwai babataito na tauwai muriwatanama Yesu ḡarone a tava be a riuena, “Aba aubainama tauma be Parisi

ka widiwidina, be tam am tauwai muriwatanama nam tima widiwidinana?” ¹⁵Be Yesu ya paribeedi be ya riuedina, “Raḡanine naḡivau tauḡominama yaḡoro naḡi soine e miamiana, nam ko voie da na banagama ta widina yababa. Be raḡan e tavana da naḡivau tauḡominama ta nawena. Inam raḡanine na banagama tokare tai nuaboya be ta widinana.”

¹⁶Nam aitau gara vaunama e paḡo be e naḡo gara poranama mate e popo tenaḡedi. Baninama gara vaunama tokare gara poranama e sorusika be e kawa gewagewana. ¹⁷Be mate banaga nam tokare waen vaunama ta paḡo, be waen kougounama porane ta ḡini. Deḡoda nama ta voiana, waen vaunama tokare kougou poranama e surasari be waen e rauḡinina. Be waen kougounama tokare e gewagewana. Waen vaunama tauna naumeki da waen kougounama vaune ta ḡinina. Inam raḡanine waen vauna be waen kougounama vaunama tokare veredima nama ta kenana.

Yesu gomana waivinama gurigurinama yai yawasanina
(*Mk 5:21-43; Lk 8:40-56*)

¹⁸Yesu inam yabedima ya giugiuedina maika, sinagog tauwai badenama tenaḡa ya verauna tauna ḡarone. Tauna ya verau Yesu noḡone be tuapikane doḡae ya raupari be ya riuna, “Taugu natuguma waivinama yodi ya gurina. Vutuna aubainama tam sibo kuya verau da nimamma tauna debane kuya boru be tauna ya yawasana munaḡana.” ¹⁹Naumeki da Yesu na tauwai muriwatanama mate a midisuḡu be inam tauḡominama mate a naḡona tauna na vadae.

²⁰⁻²¹Taudi a naḡonaḡo kedae be waivi waikosinavutuvutu paḡopaḡonama Yesu murine ya tava be Yesu na garama ya taukoni be yai nuanoḡonoḡota be ya riuna, “Deḡoda Yesu na garaḡama isunaḡa ya taukonina, taugu tokare ya yawasana munaḡana.” Uma waivinama tauna waikosinavutuvutu ya paḡona, naumeki da modi 12 a kovina. ²²Dabudine Yesu yai tauvitare da waivinama ya kita be ya riuena, “Moumou, nam kwai nuaboya, am waisumaḡama yai yawasanimna.” Naumeki da inam dabudine waivinama ya yawasanana. ²³Be raḡanine Yesu sinagog tauwai badenama na vadae ya saḡasaḡana, dabudine banaga saree a ḡabaḡaba nuanuaina, be patara dosinama ya kitedina.

²⁴Be Yesu ya riuedina, “Ko dobi doḡae matabumi. Gomana nam i gurina, tauna e kenakena ḡomana.” Dabudine patara nama a vaivaiana, taudi Yesu ai kwatekwatevena. ²⁵Be raḡanine ya riuedi da doḡae a dobidobi rovona murine, Yesu ya saḡa vada nopone da gomana nimane ya paḡo be gomana ya midisuḡuna. ²⁶Inam kauinama ya tubutubuḡana, varinama ya daberara be inam dobunama matabuna ya paḡo rovona.

**Yesu banaga matapotepotedima rabui be gumgum
tenağa yai yawasanidina**

(Mk 8:22-26; 10:46-52; Lk 18:35-43)

²⁷Naumeki da Yesu inam vadanama ya gose pore da ya nağonağō be tautauğōma rabui matapotepotedima tauna ai muriwatane, a yogo be a riuriuna, “Guyau Deivid natunama, kwa raunuatōiemai!” ²⁸Rağanine Yesu ya nağō vada nopone ya sağasağana, inam tautauğōmidima mate a sağana. Dabudine Yesu yai taraviredina, “Taumi naumeki kowai sumağa bo, da taugu tokare yà voiemī da koi kita munağa?” Be taudi a paribee be a riuna, “Bada, tauma kawai sumağana.” ²⁹Naumeki da Yesu inam tautauğōmidima matedima ya taukonidi be ya riuna, “Taumi ami waisumağama ruvane, yodi tokare koi kitana.” ³⁰Inam rağanine taudi ai kitana. Be Yesu ya riu vavasağedi be ya riuna, “Aba ġaromie yodi ya tubuğana nam aita ko riue!” ³¹Be you, taudi yağoro a nağō be Yesu varinama inam dobunama matabuna nopone ai daberarina.

³²Rağanine inam tautauğōmidima Yesu a gose be a nağonağōna maika, banaga ġesaudima tauğōma penama kokukokunama ai doke tavaitena Yesu ġarone, be inam tauğōminama tauna gumgum. ³³Be rağanine Yesu inam tauğōminama nopone penama ya tavutavu dobiğena murine, tauğōma ġiu yai kare munağena. Be patara dabudine inam kauinama a kitakitana, taudi a base be a riuna, “Uma kauinama Israel nopone nam nama dā kaba kita, be yodi tē kitana.” ³⁴Be Parisi a riuna, “Inam penama adi badama tauna rewapana Yesu ya utena. Vutuna aubainama tauna penama e tavutavu dobiğedina.”

Taunoya a rabuina

³⁵Yesu ya nağō taoniğa, be meagai matabudi nopodiğa banaga adi sinagogma nopodie, be Mamaitua na waiguyauma varinama verenama ya rarau guguye be banaga yawai katakataidina. Be mate banaga adi sidama tabu be tabu a veraverauğedina tauna ġarone, be matabudi yawai yawasanidina.

³⁶Be rağanine Yesu patara nama ya kitekitedina, tauna ya raunuatōi kaudina. Baninama taudi adi nuaboyama inam a toi rereğena be nam ti kataiena aikedae sibo a nağō be sagu a pağō. Taudi inam maika kabe sipu nam taurabedima mate ti miamia. ³⁷Dabudine Yesu na tauwai muriwatanama ya riuedina, “Sipi nopone maura dosinama ya nonoğa be e kenakenana, be taunoya a rabuina. ³⁸Vutuna aubainama Bada, tauna vutuna sipi taupakinama koi bağa da taunoya e riuporağa be tauna na sipie ta noyana.”

Yesu na apasolma 12 ya riuporedina

(Mk 3:13-19; Lk 6:12-16)

10 ¹Inam rağanine Yesu na tauwai muriwatanama 12 ya rawateğedi be rewapana ya utedina da taudi arua gewegewedima ta tavu

dobiḡedi be sida tabu be tabu tai yawasanidina. ² Apasol 12 isedima inam umanama,

Saemon, tauna vutuna ya vine dokena, awai isana ‘Pita’,

be tasinama Endru,

da Jeims, Sebedi natunama

be tasinama Jon,

³ da Pilip

be Batolomiu,

da Tomas

be Metiu teks tautaminama,

da Jeims, tauna Alpius natunama,

be Tadeas,

⁴ da Saemon tauna awai isana ‘Selot’,

be Judas Iskariot, tauna vutuna Yesu tauboru dobiḡenama.

⁵⁻⁶ Inam tautauḡomidima 12 Yesu ya riuporedi be umanama ya riuedina, “Israel banegidima ḡarodiḡa ko naḡona, baninama taudi sipu kwakokwakodima maika ta miamiana. Be nam banaga ḡesaudima ḡarodie ko naḡo maika Samaria adi meagaie, bo dobu ḡesaudie. ⁷ Ko naḡonaḡona raḡanine taumi uma varinama ko rauguguyena, ‘Mamaitua na waiguyauma kaiteka maida.’ ⁸ Be banaga sidesidedima koi yawasanidi, guriguridima ko kawa midisuḡudi, banaga kito ragaragaudima koi yawasanidi, be penama banaga a kokukokudina ko tavu dobiḡedina. Uma rewapanidima yà uteute yababemina, aubainama taumi banaga koi yawasana yababedina. ⁹ Ami vaḡaie nam mane ko paḡo, ¹⁰ nam tana, nam rupu ḡesau mate ko paḡo, nam kaḡasuma, be nam diḡona. Taumi yau taunoyama aubainama banaga tokare yaba matabudi ta voidina aubaimima.

¹¹ “Raḡanine taumi meagaie ko tavatavana, dabudine ko kita da banaga kua ḡarone ko miana, naumeki da inam meagainama ko gosena. ¹² Raḡanine taumi vadae ko saḡana, koi kaiwa be ko riuna, ‘Suba ḡaromie e kenana’. ¹³ Be banaga dabudine tai aninemina, naumeki da ami subama ḡarodie e kenana. Be deḡoda ibewa, ami subama ko paḡo munaḡena. ¹⁴ Be deḡoda banaga nam tai aninemi be ami giuma nam ta vaie, naumeki da kaḡemima popokaudima ko rawakurukuruvidi be inam vadana bo meagainama ko gosena. ¹⁵ Taugu yà riuriu kauemina da maraetara raḡanine Mamaitua tokare inam banegidima e kovoḡa vavasagedina, nam maika Sodom be Gomora.

Piripiri raḡandie ami waisumaḡe ko midi da bagibaginaḡa

(Mk 13:9-13; Lk 21:12-17)

¹⁶ “Taugu yà riuriupore nawemina maika sipu, musara ḡasiḡasidima nopodie. Vutuna aubainama ko vora kua da gewagewa nam e taukonimi

be mate ko voyagōta kaua da yawasan miremiredima nam ko voidi. ¹⁷Be banaga ko kita kauedina, baninama taudi tokare tauetara nimedie ta biri nawemi be sinagog nopodie ta kwapumina. ¹⁸Taudi tokare ta soru nawemina gabegabeman be guyaguyau dosidima noḡodie taugu kau taiye. Be dabudine taudi ḡarodie be banaga matabudi ḡarodie taumi taugu aubaiguma koi matamatana. ¹⁹Be ta panimina raḡanine, nam koi nuaboya da nema sibo koya giu bako. Mamaitua tauna tokare giu ei kataimi da nema ko giu bakona. ²⁰Baninama inam raḡanine tokare nam taumi ko giu, ibewa da Tamemima marae Aruinama tauna giu e utemi be ko giuna.

²¹“Inam raḡanine tautauḡoma tasitasidima bo tuatuaḡedima ta biri dobiḡedi da banaga taudi tai guridina, be dosi kauinama teneḡinama adi sedama ḡarodie ta kauena, be seda nama adi dosima tai ḡaviedi be ta voidi da gurie ta biridina. ²²Be banaga matabudi ta tuaḡaiemina, baninama taumi taugu kowai sumaḡeguna aubainama. Be aitauna waisumaḡe e midu bagibagi be e raudamoena, tauna tokare e yawasanana. ²³Deḡo meagaine ta raukivi gewegewemina, naumeki da inam meagainama ko gose, be wari meagaie ko naḡona. Be yà riuriu kauemina da taumi muriḡa da sibo Israel meagaidima nopodie ami noyama sibo koyai kovina, be Banaga Natunama tokare e verauna.

²⁴“Banaga aitaḡa ta girugirumana nam adi tauwai katakataima ta saḡa pore, be nama taunoya na badama nam e saḡa pore. ²⁵Be banaga girugiruminama na tauwai katakataima e ruvana, inam naumeki. Be kauinama teneḡinama nama taunoya, tauna na badama e ruvana, inam naumeki. Vutuna aubainama, deḡoda banaga vada taupakinama tai wavu be ta riuna da tauna penama adi guyauma Belsebul, naumeki da taumi vadanama banegimima tokare inam riunama teneḡinama nama ta riuemina. ²⁶Be inam banegidima nam ko nairedi. Be raḡan e veraverauna e tavana raḡanine, yaba matabudi semosemodina tokare ta maḡatarana. Be yaba waimoisirie kenekenedima matabudi tokare patare tai maḡataridina. ²⁷Be aiyaba kupie yà riuriuemina, taumi tokare suare ko giuedina, be taugu aiyaba waimoisirie beemie yà kasavena, tokare bonemima dosine patare ko giue be banaga matabudi ta vaiena.

²⁸“Banaga tubuḡa taunaḡa tauwai gurinama nam ko nairedi, baninama taudi tokare nam teneteneḡina da aruimima tai guridi. Mamaitua tauna vutuna ko nairina, baninama tauna deḡoda e ḡoena, tokare teneḡinama da tubuḡimima be aruimima ei guri tenaḡedina gienae. ²⁹Uma ko noḡoti, kiu ḡauḡaubodima rabui maesidima 10 Toea, be Tamemima Mamaitua tokare nam ai kiu tenaḡa e kitapore be e guri yababa. ³⁰Be taumi deba vuvuḡimima mate e siasiava waibatena. ³¹Vutuna aubainama nam ko naira, baninama taumi noḡotimima ya moraba kauana, nam kiu ḡauḡaubodima maika.

³²“Aitau taugu isaguma banaga matedie e kawa saḡena, naumeki da taugu tauna isanama tokare Tamaguma marae ḡarone yà kawa saḡena. ³³Be aitau taugu e bovieguna banaga matedie, naumeki da taugu tauna tokare Tamaguma marae ḡarone yà boviēna. ³⁴Nam ko noḡoti da taugu dobue suba è verauḡena, ibewa. Taugu kea e verauḡena. ³⁵Taugu è yovona, yà voiemī da tauḡoma natunama tauḡominama mate tai saḡasaḡana, be gomana waivinama tinanama mate tai saḡasaḡana, be visara rawanama mate tai saḡasaḡana. ³⁶Taumi ami ḡaviama tokare ami vadae ta tubuḡana.

³⁷“Tam aitau da taugu kwawai nuapaḡoeguna, be yaḡoro tam tamamma be tinamma kwawai nuapaḡo guratedina, naumeki da tam nam teneteneḡina da taugu yau tauwai muriwatana. Be tam aitau da taugu kwawai nuapaḡoeguna, be am sedama kwawai nuapaḡo guratedina, naumeki da tam nam teneteneḡina da taugu yau tauwai muriwatana. ³⁸Be deḡoda aitau nam na korosima e kiroḡi^f be ei muriwatanegu, tauna nam teneteneḡina da taugu yau tauwai muriwatana. ³⁹Tam aitau tame am yawasanama kwa kaididi be kwa raberabena, tam tokare am yawasanama kwa kawa gewagewana, be tam aitau da taugu kautaiye am yawasanama kuyai utaena, am yawasanama tokare kwa banavina.

⁴⁰“Aitau da taumi ewai aninemina, taugu mate ewai anineguna. Be aitau da taugu ewai anineguna, tauriuporeguma mate ewai aninena. ⁴¹Tam aitau da peroveta kuyai aninena, baninama tauna peroveta aubainama, tam tokare peroveta adi maesama ta paḡopaḡona ruvanama, nama tam kwa paḡona. Be tam aitau da didimana baneginama kuyai aninena, baninama tauna didimana baneginama aubainama, tam tokare didimana banegidima adi maesama ta paḡopaḡona ruvanama, nama tam kwa paḡona. ⁴²Be aitau da umanama banegidima taudi banaga yabayababa, be upa kwa ute be e tegona, baninama tauna yau tauwai muriwatanama, taugu yà riuriu kauemna da tam tokare am maesama kwa paḡona.”

Yesu be Jon tauwai babataito

(Lk 7:18-35)

11 ¹Raḡanine Yesu na tauwai muriwatanama 12 yawai katakatai kovidina, murine tauna inam dobunama ya gose be ya naḡona Galili meagaidima nopodie waikatakatai be rauguguya aubaidima. ²Be Jon tauna dibure ya miamia be Yesu yaba ya voivoiedina varidima ya vaivaiena, naumeki be tauna na tauwai muriwatanama ya riuporedi ³da

^f 10.38 Korosi kiroḡinama inam kwai nuatoitoina, maika Yesu korosie yai nuatoitoina nama.

Yesu umanama sibo a riuenā, “Tam vutuna Tauwai yawasana a riuriuemna kuya tava bo banaga ḡesau ka rabe?” Be Yesu ya paribeedi be ya riuna, “Ko munaḡa be aba koya vaivaiedi be koya kitekitedina, vutudi Jon koi varina.

⁴“Banaga matapotepotedima tawai kita munaḡana, be banaga tuera ragaragaudima ta naḡonaḡo munaḡana, be banaga kito ragaragaudima ta verevere munaḡana, ⁵be banaga beapoteptotedima tawai beavaia munaḡana, be banaga guriguridima ta midimidisuḡu munaḡana, be banaga waikaruwagewagēdima vari verenama ta vaivaiena. ⁶Be nuavere tauna aitaū nam ḡarogue ima noḡonoḡota bekubekuna.”

⁷Taudi a munamunaḡana raḡanine, Yesu patara nopone Jon na kauama ya giuedina, “Boni dobu kavakavane koya naḡona Jon ḡarone, be aiyaba koya noḡonoḡotina sibo koya kita? Banaga na waisumaḡama gwaḡanama maika vagara sive ya kwadikwadiena, vutuna kitanama aubainama koya naḡo? ⁸Bo aiyaba koya noḡonoḡotina sibo koya kita? Banaga gara verenama kotekotenama sibo koya kita? Ibewa, banaga gara veredima kotekotedima taudi guyau na vadae ta miamiana. ⁹Bo aiyaba koya noḡonoḡotina sibo koya kita? Peroveta, bo? Ee, be yà riuriuemina, taumi peroveta dosinama koya kitana, nam peroveta ḡesaudima maika. ¹⁰Tauna vutuna girugiruminama porane girugiruminama umanama ya riuna,

‘Taugu yau taunoyama yà riupore doke da am kedama e sepana, be muriḡa tam.’

¹¹“Yà riuriu kauemina da doḡue nam aitaū tenaḡa Jon e saḡa pore. Be banaga aitaū Mamaitua na waiguyauma nopone e miamiana, avedi da tauna banaga yababa, be yaḡoro tauna Jon ya saḡa porena. ¹²Jon tauwai babataito na raḡanie da yodi, banaga Mamaitua na waiguyauma awai ḡaviena. Be taudi a rarau rubuna da taudi adi rewapanae Mamaitua na waiguyauma sibo ai badena. ¹³Peroveta be Mosis na tarawatuma taudi matabudi awai perovetana naumeki da Jon na raḡanima ya tavana. ¹⁴Be Elaija tè raberabena, tauna vutuna yodi Jon ya tavana. ¹⁵Deḡoda beemima ta kenana, naumeki da koi beavaiana.

¹⁶“Naumeki da, uma kimtinama yodi nema yà ruvaruva bakedi? Taudi aiyaba maika? Taudi seda debadebae tawai digirina maika. Be taudi adi banagama mate tawai riusingāḡaya be ta riuriuna, ¹⁷‘Tauma naḡi sarenama kè sare be taumi nam ko bigana, be tauma guri ḡabanama kè ḡaba sinasinayona, be taumi nam ko ḡabana.’ ¹⁸Be banaga raḡan matabuna teneḡinama nama a riuriu tuatuaḡaiena. Raḡanine Jon ya tavana, banaga kauinama teneḡinama a voivoiena. Tauna kani ya widiwidinedi be waen nam i tegotegona raḡanine, banaga a riuriuna, ‘Tauna nopone penama e miamiana.’ ¹⁹Be Banaga Natunama ya tava be ya kanikani, be ya tegotegona raḡanine, banaga a riuriuna, ‘Ko kita, tauna banaga kanikani doḡidobinama be waen tegotego doḡidobinama. Be teks tautamidima, be gewagewa tauvoiedima tauna ewai turanedina.’

“Mamaitua na noyama didimanidie tà kita be tai kawa riukaue da na nuauyauyama inam riukaua.”

Banaga nam waisumeḡidi, taudi tokare kovoḡa dosinama ta banavina
(Lk 10:13-16)

²⁰Meagai ḡesaudie Yesu mataira dosidima ya voidina be yaḡoro banaga adi noḡotama nam ti vitaredina. Vutuna aubainama Yesu inam meagaidima banegidima ya riuvireviredi be ya riuna, ²¹“Korasin be Betsaida meagaimima, ko kita kauana! Baninama taugu ḡaromie mataira dosidima è voidina, be taumi nam koi sumaḡana. Deḡoda taugu sibo meagai Taia be Saidon nopodie uma matairidima nama dosidima sibo è voidina, naumeki da taudi bonika sibo noḡota viravira a paḡo, be adi gewagewama nuaboyanama sibo a moguredina. ²²Taugu yà riu kauemina da mara etara raḡanine Taia be Saidon tokare kovoḡa ta paḡona, be taumi tokare kovoḡa dosi vavasaḡinama ko paḡona. ²³Be taumi Kapeniam banegimima ko noḡonoḡotina tokare ko naḡo marae, bo? Ibewa, taumi tokare Mamaitua gienae e kidipore nawemina, baninama taugu ḡaromie mataira dosidima è voidina be taumi nam koi sumaḡana. Deḡoda taugu Sodom meagainama nopone uma matairidima nama dosidima sibo è voidina, taudi tokare noḡota viravira a paḡona, inam yodi Sodom yaḡoro sibo ya kenakenana. ²⁴Taugu yà riu kauemina da mara etara raḡanine Sodom banegidima tokare kovoḡa ta paḡona, be taumi tokare kovoḡa dosi vavasaḡinama ko paḡona.”

Ko verau ḡarogue be ko siperena
(Lk 10:21-22)

²⁵Inam raḡanine Yesu ya riuna, “Mamai, tam mara be dobu Badanama, yà kaisuḡusuḡumna baninama tam uma kaidima banaga aitaḡa ta noḡonoḡotina da taudi kabe nuauyauya be katai banegidi, taudi ḡarodie nam kui maḡataridina. Be tam banaga koekoedima kitedima seda maika ḡarodie kuyai maḡataridina. ²⁶Naumeki Mamai, inam vutuna tam am ḡoanama.

²⁷“Tamaguma yaba matabuna ya uteguna. Be nam aitu Mamaitua Natunama i kataiena, be Tamanama taunaḡa ya kataiena. Be nam aitu Tamanama i kataiena be natunama taunaḡa Tamanama ya kataiena. Be natunama aitaḡa ya vinevinedina, taudi ḡarodie ewai maḡatarana da Tamanama aitu.

²⁸“Taumi matabumi aitaḡa nuaboya be vita ko kirokiroḡana, ko verau ḡarogue be ko siperena. ²⁹Yau kewama isune ko kiroḡi be yau kedama ko kataiena, baninama taugu voyaḡota be ḡaubo munaḡa banegiguma. Vutuna aubainama taugu ḡarogue tokare sipere ko banavi, be yài nuasubemina. ³⁰Baninama yau kewama inam tekatekanama, be yau vitama nam i morabana.”

Yesu tauna Sabat ewai badena

(Mk 2:23–3:6; Lk 6:1-11)

12 ¹Sabat tenaḡa Yesu na tauwai muriwatanama mate yaḡoda sipinama nopodiḡa a naḡonaḡona. Be na tauwai muriwatanama kani ya karatidi be taudi yaḡoda a ragaudina be a kanidina. ²Be Parisi nama a kitakitana, taudi Yesu a riuena, “Yodi kuya kita, uma yabedima Sabat nopone nam sibo koya voivoiedi, be tam am tauwai muriwatanama ta voivoiedi.” ³Be Yesu ya paribeedi be ya riuna, “Guyau Deivid na banagama mate kani ya karatidi, be aba Deivid ya voivoiena, vutuna taumi koya sievi bo ibewa? ⁴Tauna Mamaitua na vadae ya naḡo be buredi waiaianidima ya ragaudi be na banagama mate a kanidina. Be tarawatu e riuriuna da inam buredidima pirisi taudiḡa sibo a kanikanina. ⁵Be mate taumi tarawatu koya sievi bo ibewa da Sabat raḡanine pirisi tempol nopone Sabat na tarawatuma tawai kati kotovina,⁸ be inam nam gewagewa ti voivoiena. ⁶Taugu ya riuriuemina banaga tenaḡa uma nopode tauna ya saḡa vavasagana, nam maika tempol. ⁷Mamaitua boni umanama ya riuna,

‘Taugu raunuatoi kitanama ya ḡoēgoena, be taumi musare ko tipatipana taugu nam ama ḡoēgoena.’

Taumi deḡoda inam giudima banidima ko kataiedina, taumi didimana banegidima tokare nam koyai wavu yababedi. ⁸Banaga Natunama tauna Sabat ewai badena.”

⁹Yesu naḡo yai kare munaḡe be banaga adi sinagogma tenaḡa nopone ya saḡana. ¹⁰Be dabudine tauḡoma nimanama tuera paḡopaḡonama ya miamiana ya kitana. Be inam dabudine Parisi taudi Yesu waiwavunama kedanama a wanewanena da aiyabae tauna sibo Yesu ai wavuna. Vutuna aubainama taudi Yesu ai taravire be a riuna, “Tarawatu nema e riuriu bako? Sabat raḡanine banaga kwai yawasanina tokare naumeki bo ibewa?” ¹¹Be Yesu ya paribeedi be ya riuna, “Deḡoda tam aitaḡa tenaḡa am sipuma Sabat raḡanine dome i bekuna, tam tokare nam kuya naḡo be kuya tika tavaite, bo? ¹²Be banaga tauna noḡotinama ya moraba kauana, nam maika sipu. Vutuna aubainama Sabat raḡanine naumeki da vere ta voiena.”

¹³Dabudine Yesu inam tauḡominama ya riuena, “Nimamma kwa kawa didimani.” Naumeki da tauḡoma nimanama ya kawa didimani be nimanama ya vere munaḡana, nimanama ḡesau maika. ¹⁴Be Parisi a dobi a naḡo be Yesu kana kasirama a tomtomna da sibo ai gurina.

Yesu tauna Mamaitua na taunoyama vinevinenama

(Mk 3:7-12; Lk 6:17-19)

¹⁵Be Yesu ya kataie da Parisi taudi aba a voivoiena, vutuna aubainama tauna inam gabunama ya gose be wari kedae ya naḡona. Be banaga

⁸ 12.5 Pirisi taudi Sabat na tarawatuma tawai kati kotovina, baninama taudi Sabat raḡanine tempol nopone ta noyanoyana.

toitoi Yesu ai muriwatane be tauna banaga sidesidedima matabudi yai yawasanidina ¹⁶ be ya riu vavasaḡedina da taudi nam aitu sibo a riu da tauna aba banegina. ¹⁷ Uma kaudima matabudi Bada boni peroveta Aisaia ḡarone aba ya giugiuedina, ruvane nama a tubuḡana.

Aisaia boni umanama ya riuna,

¹⁸ “Uma tauna inam taugu yau taunoyama, vutuna è vinena.

Tauna vutuna nuaguma e paḡopaḡona, be taugu yàwai nuaverena tauna ḡarone.

Taugu Aruiguma nopone yà boru be tauna tokare yau waitarapirima banaga matabuna ḡarodie e rauguguyena.

¹⁹ Tauna tokare nam aitu mate tai saḡasaḡa be e rasedi. Tauna nam tokare kedaḡa e yogoyogo babara be bonanama ta vaie.

²⁰ Be vagara viriviri kusewinama nam tokare e kotova pore. Be kai punanama nopone e rarau karakaratana, tauna tokare nam ei tiriri gaba. Tauna nama e voiana naumeki da raḡan damone dobu matabuna nopone banaga e kawa didimana rovodina.

²¹ Inam raḡanine banaga dobu matabuna taudi tokare adi waisumaḡama tauna ḡarone ta boruna.”

Penama adi guyauma be Yesu
(*Mk 3:20-30; Lk 11:14-23; 12:10*)

²² Dabudine tauḡoma penama kokukokunama a verauḡena Yesu ḡarone. Inam tauḡominama tauna gungum be matapotapotanama. Be Yesu inam tauḡominama yai yawasani be tauna matanama yai kita be giu yai karena. ²³ Be banaga matabudi Yesu a base be a riuna, “Agunai uma tauna guyau Deivid natuna, bo?”

²⁴ Raḡanine Parisi umanama a vaivaiena, taudi a riuna, “Inam penama adi guyauma isanama Belsebul, tauna Yesu ya koku be na rewapanama Yesu ya ute da penama ḡesaudima e tavutavu dobiḡedina.” ²⁵ Be Yesu taudi adi noḡotama ya kataiena aubainama ya riuedina, “Deḡoda aba waiguyaunama tauname e dariḡa munaḡena, tokare taunaḡa e kawa gewagewa munaḡena. Be ai meagai nopone taudiḡa tai kawa ḡasiḡasi be ta dariḡa munaḡedina, taudi tokare ta kawa gewagewa munaḡedina. Be ai vada nopone taudiḡa tai kawa ḡasiḡasi be ta dariḡa munaḡedina, taudi tokare ta kawa gewagewa munaḡedina. ²⁶ Inam kauinama teneḡinama nama, deḡoda Seitan tauname na penamama sibo i tavutavu dobiḡedina, inam tokare tauname e dariḡa munaḡena, be na waiguyauma nam tokare e kena watana. ²⁷ Vutuna aubainama deḡoda taugu sibo Belsebul na rewapanae penama e tavutavu dobiḡedina, naumeki da taumi Parisi ami tauwai muriwatanama taudi aitu na rewapanae penama ta tavutavu dobiḡedi? Taudi koi taraviredi, aitu isane penama ta tavutavu dobiḡedi. Taudi ḡarodie tokare ko banavi da ami giurma inam kaikaiyovunama.

²⁸Be taugu Mamaitua Aruinama na rewapanae penama yà tavutavu dobigedina. Inam kauine taumi ko kataie da Mamaitua na waiguyauma kaiteka ġaromie ya tavana.

²⁹“Nam aitu tauġoma wairewapaninama na vadama e gigi da e saġa, be na purapurama e danene rovodi. Ibewa da noġone inam tauġominama wairewapaninama e vunugi da e pani dokena, muriġa be e saġa da na purapurama e danenedina. ³⁰Deġoda tauna aitu nam taugu ġarogu, naumeki da tauna taugu ewai ġavieguna. Be tauna aitu nam taugu mate kama noyanoya tenaġana, inam tauna yau noyama e kawakawa gewagewana.

³¹“Vutuna aubainama yà riuriuemina da gewagewa be waidiboġa matabudi Mamaitua tokare e noġota poredina. Be aitu da Arua Babau ewai diboġina, inam gewagewanama Mamaitua tokare nam e noġota pore. ³²Deġoda aitu Banaga Natunama ġarone e riuriu viravirana, naumeki da tauna na gewagewama tokare Mamaitua e noġota porenna. Be aitu da Arua Babau ġarone e riuriu viravirana, naumeki da tauna na gewagewama yodi be nokoi ya naġona, tokare Mamaitua nam airaġan e noġota poredi.

Kai gewagewanama votanama gewagewanama

³³“Kai ko kawa batebatena, tokare votanama ta verena. Be kai ko kawa gewagewana, tokare votanama ta gewagewana. Baninama kai votane tokare ko kita be ko kataie da inam kai verena bo kai gewagewana. ³⁴Taumi mota sarama natunatudima, taumi gewagewa banegimima, nema tokare vere ko giu bake? Baninama aba banaga nopone ya moġavu be e kenakenana, vutuna mudune e dobidobina. ³⁵Banaga verenama noponama vere ya moġavuna aubainama, yaba veredima ewai tubuġidina. Be banaga gewagewanama noponama gewagewa ya moġavuna aubainama, yaba gewegewediġa ewai tubuġidina. ³⁶Taugu yà riuriuemina da etara na raġanie banaga dobue adi giu yabayababama aubainama, taudi matabudi tokare Mamaitua e etaredina. ³⁷Baninama am giuma ruvane Mamaitua tam tokare e kovoġimna. Be nama am giuma ruvane Mamaitua tam tokare ei yawasanimna.”

Jona na matairama

(Lk 11:29-32)

³⁸Naumeki da Parisi be tarawatu tauwai katakataidima Yesu a riuena, “Tauwai katakatai, tauma ka ġoeġoena mataira kwa voie be ka kitana.”

³⁹Be tauna ya riuedina, “Uma kimtinama taumi gewagewa be badara banegimima be yodi mataira kitanama ko ġoeġoena. Be taumi nam tokare mataira ko kita, ibewa da peroveta Jona ġarone aba ya tubuġana, vutunaġa tokare ko kitana. ⁴⁰Jona tauna iyana nopone ya miana raġan

rabuiteḡa be kupi rabuiteḡa. Inam kauinama teneḡinama nama Banaga Natunama tokare doḡa nopone e kenana raḡan rabuiteḡa be kupi rabuiteḡa. ⁴¹Be maraetara raḡanine Ninive banegidima be taumi uma kintinama mate gurie be ko midisuḡu munaḡana raḡanine, taudi tokare ta riuemina da taumi sibo gienae koya naḡona. Baninama boni Jona ya rarau guguyana raḡanine, Ninive banegidima taudi na giuma a vaie be noḡota vitara a paḡona. Be yodi uma dobudine banaga tenaḡa tauna Jona ya saḡa porenā, be tauna na giuma taumi nam koma vaie be noḡota vitara koma paḡopaḡona. ⁴²Be mate maraetara raḡanine dobu Saba guyaunama waivinama taumi uma kintinama mate gurie be ko midisuḡu munaḡana. Be tauna mate tokare e riuemina da taumi sibo gienae koya naḡona. Baninama boni inam guyaunama waivinama tauna dobu damone, be ya tavana, Solomon na nuauyuyama vaienama aubainama, be yodi uma dobudine banaga tenaḡa tauna Solomon ya saḡa porenā, be tauna na giuma taumi nam komawai beavaiena.

Penama na kaba tava munaḡama

(Lk 11:24-26)

⁴³“Be penama banaga e dobi porenā raḡanine, tauna e naḡona dobu pokine na kaba siperema gabunama wanenama aubainama. Be gabu nam i banavina aubainama, ⁴⁴tauna tokare e riuna, ‘Taugu yau vadama deḡo è gose be è veraverauna, dabudi yà munaḡana.’ Be tauna raḡanine vadae e tava da e kitana be vada noponama kavakavanama. Be vada kawakawa verena be waiwaisianama e kenakenana. ⁴⁵Naumeki da tauna e munaḡa be penama ḡesaudima, matabudi 7, ei dokedina. Be inam aruidima taudi a gewagewa vavasāḡana nam maika tauna. Taudi matabudi ta saḡa vadanama nopone be ta miana. Inam raḡanine banaga tokare na yawasanama e gewagewa da e gewagewa vavasāḡana, nam noḡone maika. Inam kauinama teneḡinama nama tokare uma kintinama ḡarodie e tubuḡana.”

Yesu tinanama be tasitasinama

(Mk 3:31-35; Lk 8:19-21)

⁴⁶Be raḡanine Yesu yaḡoro patara ḡarodie ya giugiuna maika, tinanama be tasitasinama a tava be doḡae a midina, be taudi a ḡoeḡoena da Yesu mate sibo ai giuna. ⁴⁷Naumeki da banaga tenaḡa Yesu ya riuna, “Tinam be tasitasimma doḡae ta midimidina, be taudi ta ḡoeḡoena tam mate koi giuna.” ⁴⁸Dabudine Yesu tauna ya paribee be ya riuna, “Aitau tinagu be aitau tasitasigu?” ⁴⁹Be tauna na tauwai muriwatanama ḡarodie yai nimayoyo be ya riuna, “Uma taudi taugu tinagu be tasitasiguma. ⁵⁰Baninama aitau da Tamaguma marae na ḡoanama e voivoiedina, tauna vutuna taugu tasiḡomigu, nuvuḡomigu, be tinaḡomiguma.”

Taukuma wainasinama

(Mk 4:1-20; Lk 8:4-15)

13 ¹Inam raḡaninama teneḡine Yesu vada ya dobi pore, be ya naḡo yawawa diane ya miana. ²Be yaḡoro patara dosinama ḡarone a rawateḡeidina, aubainama tauna topae waga debane ya saḡa be ya miana. Be patara matabudi taudi barabarae topa diane a miana.

³Inam dabudine tauna yaba toitoi wainasie yai katakataidi be ya riuedina, “Raḡan tenaḡa taukuma ya naḡona na pesima kumedima aubainama. ⁴Tauna pesi yawai yaraiedina raḡanine, pesi ḡesaudima keda poune a ravusedina, be kiu a tava be a kani rovodina. ⁵Be pesi ḡesaudima yeku debedie a ravusedina, dabudine doḡa nam dosina, vutuna aubainama pesi a gogo makaina. ⁶Be suara ya rararanana raḡanine, pesi ya kara gabedi da a pokina, baninama taudi waramidima nam doḡa nopone ti yovo guratana. ⁷Be pesi ḡesaudima gedara nopodie a ravusedina, be inam gedaridima pesi a gogogogona, a yavanidina. Vutuna aubainama taudi nam ti banina. ⁸Be pesi ḡesaudima taudi doḡa verene a ravusedi be a gogona. Naumeki da a moraba be a banina. Banidima ḡesaudima 100, ḡesaudima 60, be ḡesaudima 30. ⁹Deḡoda beemima ta kenana, naumeki da koi beavaiana.”

¹⁰Naumeki da tauwai muriwatana a verau be Yesu ai taravirena, “Aba aubainama banaga wainasie kwa giugiuedi?” ¹¹Be tauna ya paribeedi be ya riuna, “Taugu è vinemina da taumi Mamaitua na waiguyauma semosemonama ko kataiena. Be banaga ḡesaudima tokare nam ta kataie. ¹²Aitau da uma yabedima e katakataiedina, Mamaitua tokare inam katainama debane e taipotodina. Be deḡoda aitau uma yabedima nam ku kataiedina, avedi da katai ḡaubonama ḡarome, be yaḡoro Mamaitua tokare kataidima matabudi e kaiporaḡana. ¹³Vutuna aubainama taugu banaga ḡarodie wainasie yaḡ giugiuna. Baninama taudi ta kitakitana be nam tima kitakita kauena, be vaienama ta vaivaiena be nam tima katakataiena.

¹⁴“Boni aba peroveta Aisaia ya giugiuna, yodi taudi ḡarodie e tubutubuḡana. Tauna umanama ya riuna,

‘Taumi ko vaivaiena be tokare nam ko kataie,
taumi ko kitakitana be tokare nam ko kita kau.

¹⁵Uma banegidima nuedima gudugudunama. Be taudi beedima nam timawai beavaia kauana, be taudi matedima a potana.

Taudi nama a voiana da matedie nam aba ta kita, bo beedie nam aba ta vaie, bo nuedie nam aba ta kataie,

baninama taudi nuedima vitarenama a tuaḡaie, be nam tima ḡoḡoena da taugu yaḡ yà yawasanidi.’

¹⁶“Be taumi matemima ewai kitana, be beemima ewai beavaiana aubainama koi nuaverena. ¹⁷Taugu yaḡ riuriu kauemina da boni

peroveta toitoi be didimana banegidima a gōēgōena da sibo uma kaidima a kitedina, maika taumi yodi ko kitekitedina nama, be nam ti kitedina. Be taudi a gōēgōena da sibo uma giudima a vaiedina, maika taumi yodi ko vaivaiedina nama, be nam ti vaiedina.

¹⁸Yodi taukuma wainasinama ḡaromie yà giu waibate da ko vaiena. ¹⁹Pesi keda debane ravuravusenama na giuma inam umanama. Banaga Mamaitua na waiguyauma varinama e vaivaiena, be nam ima katakataiena raḡanine, Seitan e tava be Mamaitua riunama banaga nopone kumakumanama e kaikai poraḡana. ²⁰Be banaga ḡesaunama tauna maika pesi yeku debedie ravuravusedima. Tauna riu e vaivaiena, waigapa ma nuaverena e paḡopaḡona. ²¹Be tauna nam wamina aubainama tauna nam tokare e midi gurata. Raḡanine pipiri bo raukivigewagewa ta tavatavana Mamaitua riunama kana taiye, tauna tokare waigapa e bekuna. ²²Be banaga ḡesaunama tauna maika pesi gedara nopodie ravuravusedima. Tauna riu e vaivaiena, be dobu yawasanidima nuaboyedi be dobu waiguyaudima wainuapaḡoedima mate ta saḡa be Mamaitua riunama ta yavanidi, da nam tima banibanina. ²³Be banaga ḡesaunama tauna maika pesi doḡa verene kumakumanama, tauna riu e vaivaie, e paḡopaḡo, be e vovo teyetyedina, tauna votanama 100 bo 60 bo 30.”

Pesi gewegewedima wainasidima

²⁴Yesu wainasi ḡesaunama ya riuedina, “Mamaitua na waiguyaunama inam maika banaga tenaḡa na sipie pesi veredima ya kumedina. ²⁵Be tauna kupie ya kenakenana raḡanine, na ḡaviama ya tava da pesi gewegewedima inam sipine pesi veredima nopodiḡa ya kuma nawedi be ya naḡona. ²⁶Be pesi veredima a gogo be buso awai karena raḡanine, pesi gewegewedima mate a gogo tenaḡana.

²⁷“Naumeki be sipi taupakinama na taunoyama tauna ḡarone a tava be a riuna, ‘Bada, tam pesi veredima sipie kuya kumedina, be uma pesidima gewegewedima aikedae a tava be ta gogogogo?’ ²⁸Be tauna ya paribeedi be ya riuna, ‘Inam ḡavia tenaḡa ya tava be nama ya voiana.’ Be na taunoyama a riuna, ‘Nema kwa noḡonoḡota bake, tauma ka naḡo ka kamoḡa poraḡa bo avedi?’ ²⁹Be tauna ya riuna, ‘Avedi! Baninama deḡoda pesi gewegewedima ko kamoḡana, taumi tokare pesi veredima mate ko kamoḡa tenaḡedina. ³⁰Nakarua, ko gosedi da matabudi ta gogo tenaḡana naumeki da dariḡa raḡanine tokare tà kitedina. Inam raḡanine tokare taudariḡa ya riuedi da taudi tokare pesi gewegewedima a gogogogona, ta kamoḡa poraḡa da ta pani boinidi be kai matane ta gabu gorudina. Muriḡa pesi veredima a gogogogona, ta kamoḡa da ta ragau saḡedina yau vadae.”

Yauḡana^h pesinama be yist wainasidima
(Mk 4:30-34; Lk 13:18-21)

³¹Be Yesu wainasi ḡesaunama ya riuedina, “Mamaitua na waiguyauma inam kai yauḡana pesinama maika, banaga ya paḡo be na sipie ya kumana. ³²Inam pesinama ya ḡaubo kauana be banaga ya paḡo da na sipie ya kumana, be ya gogogogona raḡanine kai matabudi ya saḡa pore, be kaibada ya tubuḡana. Be kiu ta tava be kainama ragane ta noḡinoḡina.”

³³Be wainasi ḡesaunama mate ya riuedina, “Mamaitua na waiguyauma inam maika yistⁱ waivi ya paḡo, parawa nopone ya biridi, be ya gwada da parawa ya sasana be ya morabana.”

³⁴Yesu uma yabedima matabudi patara ḡarodie wainasie ya giuedina. Tauna yaba matabudi wainasie ya giuedina, be nam i giugiu ḡomana.

³⁵Inam kaudidima peroveta boni ya riuriuedina nama yodi a tubuḡana. Peroveta boni umanama ya riuna,

“Taugu muduguma ya kaipore be wainasie ya giuna. Boni dobu ya tubutubuḡe da yodi, giu semosemodima a kenakenana, be yodi giudima semosemodima vutudi ya giuedina.”

Mui wainasidima ya giu waibatedina

³⁶Dabudine Yesu patara ya gosedi be ya naḡona vadae. Be na tauwai muriwatanama tauna ḡarone a tava be a riuna, “Bada, mui sipie a gogogogona wainasidima sibo kuya giu waibate be kè vaie.”

³⁷Be Yesu ya paribeedi be ya riuna, “Pesi veredima taukumedima, tauna inam Banaga Natunama. ³⁸Sipi inam uma dobunama, be pesi veredima inam tauwai sumaḡa, taudi vutudi Mamaitua na waiguyauma natunatunama. Be pesi gewegewedima taudi inam Diaboro natunatunama. ³⁹Be ḡavia tauna aitau pesi gewegewedima ya kumekumedina, tauna inam Diaboro. Be dariḡa raḡaninama inam raḡan damonama, be taudaridariḡa inam taudi anea.

⁴⁰“Be dariḡa raḡanine pesi gewegewedima ta kamoḡa poraḡa da ta pani boinidi, be kai matane ta gabu gorudina. Be raḡan damone inam kauinama nama tokare e tubuḡana. ⁴¹Banaga Natunama tokare na aneama e riuporaḡa be taudi gewagewa tauwai tubuḡidima be raukosoḡaiḡai banegidima matabudi ta kamoḡa poraḡana maika pesi, ⁴²be kai matane ta pore nawedina. Be inam dabudine taudi tokare

^h 13.30 Gurik bonane ya riuna: Gaga pesinama. Be inam gaga ḡesau, tauna kai dosinama maika yauḡana, be nam taitai. ⁱ 13.33 Yist inam maika tuva. ḡaubonama kwa riḡa be topae kwa boruna, inam e daberarana. Be yist ḡaubonama parawa nopone kwa boruna, inam e daberarana.

ta yakei be gadigadidima ta sanadididina. ⁴³Inam raḡanine tokare didimana banegidima tamedima na waiguyauma nopone ta mia be ta yana guratana, suara maika. Deḡoda beemima ta kenana, naumeki da koi beavaiana.

Taragai semosemodima wainasidima

⁴⁴“Mamaitua na waiguyauma, inam doḡa nopone mane dosinama semosemonama maika. Be banaga tenaḡa inam manenama ya vabanavi be ya rupu porena, be tauna ma nuaverena ya munaḡa ya naḡo da na taragaima matabudi ya raugimaredi, be mane ya paḡona. Yodibe ya munaḡa be inam doḡanama ya gimerina. ⁴⁵Be mate, Mamaitua na waiguyauma inam taugimara tenaḡa maika, tauna posaru verenama ya wanewanena da sibo ya gimerina. ⁴⁶Raḡan tenaḡa tauna posaru vere vavasāḡinama ya banavina, be maesinama dosinama. Dabudine tauna ya munaḡa ya naḡo da na taragaima matabudi ya raugimaredi, be mane ya paḡo, yodibe inam posarunama ya gimerina.

Sagida wainasinama

⁴⁷“Be mate, Mamaitua na waiguyauma inam sagida maika, banaga topae ta pore, be iyana tabutabu ta konekonedina. ⁴⁸Raḡanine sagida e moḡamoḡavuna, taudi sagida ta soru tavaite barabarae ta mia be ta dariḡedi da iyana veredima posa nopone tawai ikwedina, be gewegewedima tawai poraḡana. ⁴⁹Uma kauinama nama tokare raḡan damone e tubuḡana. Inam raḡanine anea tokare ta yovo be didimana banegidima, be gewagewa banegidima ta dariḡedina. ⁵⁰Be gewagewa banegidima kai matane ta poraḡa nawedi, be dabudine taudi tokare ta yakei be gadigadidima ta sanadididina.” ⁵¹Be Yesu na tauwai muriwatanama yai taraviredi be ya riuna, “Uma giudima matabudi koya kataiedi, bo ibewa?” Be taudi a paribee be a riuna, “Ee, kè kataiedina.” ⁵²Be Yesu ya riuedina, “Tarawatu tauwai katakataidima taudi Mamaitua na waiguyauma a katakataiena raḡanine, taudi vada taupakinama maika a tubuḡana. Vutuna aubainama taudi vada nopone ta saḡa be taragai^j vaudi da poredima sivusivudima ta ragaragau dobiḡedina.”

Nasaret banegidima Yesu a tuaḡaiena

(Mk 6:1-6; Lk 4:16-30)

⁵³Raḡanine Yesu wainasi giunama yawai kovidina, tauna inam dobunama ya gose pore, be ya naḡona wari kedae. ⁵⁴Tauna ya munaḡana na meagai ḡomae, be dabudine tauna sinagog nopone ya saḡa, be banaga yawai katakataidina raḡanine, taudi a basa kaue be a riuna, “Uma baneginama deḡo dabudine

^j 13.52 ‘Taragai’ inam waikatakatai.

nuauyauya, be mataira rewapanidima ya ragaudi be uma yabedima e voivoiedi? ⁵⁵Tauna kabe tauwai kamda natuna, be tinanama Meri tauma kè kataiena. Be tasitasinama inam Jeims, Jousep, Saemon be Judas. ⁵⁶Be nuvunuvunama matabudi kauanema diade ta miamiana. Tauna uma rewapanidima dego dabudi ya ragaudi?" ⁵⁷Inam dabudine taudi Yesu a tuağaiena.

Be Yesu ya riuedina, "Peroveta na meagai gōmae, be na vada gōmama banegidima tauna nam ti vivirena." ⁵⁸Vutuna aubainama inam meagaina Yesu mataira nam toitoi i voidina, baninama taudi nam ti sumağena aubainama.

Jon tauwai babataito nema ya guri bakona

(Mk 6:14-29; Lk 3:19-20; 9:7-9)

14 ¹Inam rağanine guyau Herod tauna Yesu varinama ya vaivaiena, ²tauna na taunoyama ya riuedina, "Uma baneginama agunai Jon tauwai babataito, tauna gurie be ya midisuğu munağana, vutuna aubainama rewapana ġarone ta kenakenana da mataira e voivoiedina." ³Herod umanama ya giugiuna, baninama tauna noğone Jon yai gurina. Jon umanama ya gurina: Herod tuağanama Pilip na waivima isanama Herodias ya kwayana, be inam kauinama debane Jon Herod ya riuriuena da nam nama sibo ya voie, vutuna aubainama Herod na tauğarama ya riuedi be Jon a vunuği da a pani be dibure a boruna. ⁴Be Jon tauna yağoro da Herod umanama ya riuriuena, "Inam nam i verena da Herodias kwa naği, baninama inam tuağamma na waivima."

⁵Inam riunama aubainama Herod ya goena da Jon sibo yai gurina. Be tauna banaga ya nairedina, baninama banaga taudi a noğonoğotina da Jon tauna peroveta.

⁶Be Herod na kaba tubuğama soinama ya voivoiena nopone, Herodias natunama waivinama ya biga be Herod yai nuavere kauena. ⁷Vutuna aubainama guyau Herod ya sauga wapa be umanama ya riuena, "Aba kwai bağena ya utemna." ⁸Naumeki da gomana tinanama na goanama aubainama guyau Herod ya riuena, "Taugu ya goegoena yodi Jon debanama dabire kwa boru, be kwa uteguna." ⁹Be inam giunama guyau ya kawa nuaboya kauena, be tauna nam teneteneğina da gomana sibo ya rawağaiğae, baninama Herod noğone na warema matedie ya sauga wapana. Naumeki da guyau yai aninana da gomana na goanama tokare e utena. ¹⁰Be na tauğarama ya riue da ya nağo dibure, be Jon gadonama ya tomna. ¹¹Naumeki da tauğara Jon debanama dabire ya boru, be gomana guguininama ya ute, da ya kiroği nawe be tinanama ya utena. ¹²Naumeki da Jon na tauwai muriwatanama a verau be Jon tubuğinama a kiroğa nawe, be a dobona. Yodibe a nağo da Yesu ai varina.

Yesu banaga sievinama 5 tausand yai kanidina

(Mk 6:30-44; Lk 9:10-17; Jn 6:1-14)

¹³Yesu Jon varinama ya vaivaiena rağanine, tauna wagae ya geru be ya nağona gabu wainuatuğune. Be patara ta vaiena be Yesu gabu

wainuatugune ya naḡona. Naumeki da banaga taudi adi meagaima a gosaga be a doka ḡomedi be kaḡediḡa geresaga a naḡona. ¹⁴ Raḡanine Yesu gerese ya ḡotaḡotana, dabudine e kitana be patara dosinama a miamiana. Naumeki da Yesu taudi ya raunuatoiedi be banaga sidesidedima yai yawasanidina.

¹⁵ Be suara ya yovoyovona raḡanine, na tauwai muriwatanama Yesu ḡarone a verau be a riuna, “Bada, uma inam mutuyuae ta miamiana, be kaiteka ravi e tavatavana. Banaga kwa riupore nawedi da meagaie ta naḡo da adi kanima ta gimarana.”

¹⁶ Be Yesu ya paribeedi be ya riuna, “Taudi nam ta naḡo. Taumi kani ko utedina.” ¹⁷ Be taudi a riuna, “Be tauda buredi 5 be iyana rabui kavakava ta kenakenana.” ¹⁸ Be Yesu ya riuedina, “Ko verauḡedi ḡarogue.”

¹⁹ Naumeki da banaga ya riuedi be mui debedie a miana. Yodibe tauna buredi 5 be iyana rabui ya ragaudi, gunume yai kita saḡa da yai kaiwa be buredi ya givana. Yodibe na tauwai muriwatanama ya utedi, be taudi banaga a ute nawedina. ²⁰ Dabudine banaga matabudi a kani da a kani siauana. Naumeki da tauwai muriwatana banaga kani a kanikani gosodina, taudi a rawateḡeteḡeidi be posa matabudi 12 ai moḡavudina. ²¹ Banaga dabudine a kanina, tautauḡoma sievinama 5 tausand be waiwaivi seda mate nam ti sievidina.

Yesu topa debanaḡa ya naḡona

(Mk 6:45-52; Jn 6:15-21)

²² Inam kauinama murine Yesu na tauwai muriwatanama wagae ya riuporedi da taudi a doka be yawawa a davu da noaḡo nevane a naḡona. Muriḡa Yesu banaga ya riuporedi be a naḡona adi meagaie. ²³ Be banaga a naḡonaḡona muridie, tauna ya naḡona oya debane, moiragi aubainama. Be ravi ya tavatavana raḡanine, Yesu taunaḡa dabudine ya miamiana, ²⁴ be waga kaiteka yawawa poune ya naḡonaḡona, be sive dosinama aubainama, rabama waga ya katikati vitarena.

²⁵ Be raḡan tomtom Yesu topa debane ya babara be ya naḡonaḡona taudi ḡarodie. ²⁶ Be dabudine na tauwai muriwatanama ta kitana be tauna topa debanaḡa ya veraverauna ḡarodie. Inam raḡanine taudi a naira kua, a rasa be a riuna, “Ḡaḡarua e veraverauna.” ²⁷ Be Yesu waiḡapa ya riu makai be ya riuedina, “Nam ko naira, taugu.”

²⁸ Dabudine Pita ya riuna, “Bada, deḡoda riukaua tam, naumeki da kwa riu be taugu topa debanaḡa ḡarome ya verau.” ²⁹ Dabudine Yesu ya paribee be ya riuna, “Kwa verau.” Naumeki da Pita waga ya dobi pore be topa debanaḡa ya babara be Yesu ḡarone naḡonama yai karena. ³⁰ Be tauna sive be rabama ya kitedi be ya nainairana raḡanine, tauna daururu yai karena, inam raḡanine tauna ya yogona, “Bada, kwai yawasanigu!” ³¹ Be Yesu waiḡapa nimanama yai yoyo be Pita nimane ya kaididi da ya sirusaḡe be

ya riuna, “Am waisumaḡama ya ḡaubo ḡaḡa, aba aubainama kuya noḡota bekubeku?” ³²Be taudi wagae a saḡasaḡana raḡanine, sive be rabama ai kavena. ³³Dabudine taudi aitaḡa wagae a gerugeruna, matabudi Yesu a raudunee be a riuna, “Tam riukaua Mamaitua Natunama.”

³⁴Dabudine taudi yawawa a davu be a naḡona naumeki da Genesaretma a ḡotana. ³⁵Be tautauḡoma dabudine Yesu a kitakitana, taudi Yesu varinama inam dobunama matabuna nopone ai daberarina, be banaga sidesidedima a veraḡedina Yesu ḡarone. ³⁶Be Yesu ai baḡana da tauna sibo yai aninedi, be taudi na garama isunaḡa sibo a taukonina. Be banaga aitaḡa na garama a tautaukonina, taudi matabudi a yawasanana.

Abaḡa nopodama tawai miredina na waikatakataima

(Mk 7:1-23)

15 ¹Dabudine Parisi be tarawatu tauwai katakataidima ḡesaudima Jerusalem be Yesu ḡarone a tava be ai taravirena, ²“Aba aubainama tam am tauwai muriwatanama dā babadama adi vaivaima tawai kati kotovidi? Taudi kani raḡanine, nam nimedima tima koḡedi be ta kanikani yababana.”

³Be Yesu ya paribeedi be ya riuna, “Be taumi aba aubainama ami vaivaima kowai muriwatanedi, be Mamaitua na riuvasasaḡama kowai kati kotovidi? ⁴Baninama Mamaitua umanama ya riuna, ‘Tamamma be tinamma kwa viviredina!’ be ‘Aitau tamanama bo tinanama ei tara tautauena, tauna gurie ta boruna.’ ⁵Banaga aitau na dosima sagudima aubainama yaba ḡarone a kenakenana sibo ya ragaudi be na dosima ya sagudina. Be taumi ami waikatakataima kana taiye tauna inam yabedima ya ragaudi be na dosima ya riuedina, ‘Uma yabedima taumi sibo è sagumina, be yodi Mamaitua puyonama aubainama taumi nam yà utemi.’ ⁶Inam raḡanine taumi ko riuriuna, ‘Tam ya verena da Mamaitua kwa puyona, be am dosima nam kwa sagudi.’ Inam waikatakataidie taumi Mamaitua na riuvasasaḡama ko kawakawa koakoana, be taumi ami vaivaima ko kawakawa saḡena. ⁷Taumi banaga kaikaiyovumima. Aisaia na waiperovetama inam ya riu kauana. Mamaitua umanama ami kauama ya giuena,

⁸‘Uma banegidima mududiḡa e riuriuna, “Mamaitua, isamma ka kaikai suḡusuḡuna” be taudi nopodima madanie.

⁹Taudi adi raudunema ḡarogue nam baniboruboruna. Baninama taudi adi waikatakataima inam banaga tarawatu a voivoiedina, vutudi banaga tawai katakataidina.”

¹⁰Dabudine Yesu patara ya rawateḡeidi be ya riuedina, “Koi beavaia be ko kataiena. ¹¹Yaba aba banaga gayane e saḡasaḡana, tokare noponama nam ei mira, ibewa, be aba banaga nopone be gayane e dobidobina, inam vutuna taunaḡa noponama ewai mirana.”

¹²Dabudine na tauwai muriwatanama ḡarone a tava be a riuena, “Bada tam kuya kataie bo ibewa da Parisi am giuma a vaivaiena, taudi nuedima ai medi kauana?” ¹³Yesu ya paribeedi be ya riuna, “Tamaguma marae tauna deḡo kaidima nam i kumedina, inam kaidima tokare ma waramidi e kamoḡa poraḡana. ¹⁴Vutuna aubainama inam banegidima ko gose poredina. Taudi tauwai dokadokana matapotepotedima. Be deḡoda banaga matapotapotanama turanama matapotapotanama ewai dokena, taudi rabuidi tokare dakie ta bekuna.”

¹⁵Be Pita ya riuna, “Bada, uma wainasinama kwa giu waibate be ka vaie.” ¹⁶Be Yesu taudi ya riuedina, “Taumi yaḡoro ko nuanua babaḡa, bo? ¹⁷Koya kataie bo ibewa da yaba aba banaga gayane e saḡasaḡana, tokare kapone e naḡo da noveḡo e dobi munaḡa? ¹⁸Be aba banaga nuapoune be e saḡa da gayane e dobidobina, inam vutuna taunama ewai mirana. ¹⁹Baninama banaga nuapoune noḡota gewegewedima ta tavatavana, maika rauvunuḡa, badara, waisoḡa yabayababa, danene, kaiyovu, waikarakarakutu bo waidiboḡa. ²⁰Inam kauidima vutudi banaga noponama tawai mirana. Be deḡoda nimamma nam kwa koḡa be kwa kanina, inam nam nopomma kumawai mirana, ibewa.”

Dobu Keinan waivinama na waisumaḡama

(Mk 7:24-30)

²¹Dabudine Yesu inam gabunama ya gose be ya naḡona Taia be Saidonma. ²²Be dobudine Keinan waivinama ya verau tauna ḡarone be bonanama dosine ya riuna, “Bada, tam guyau Deivid natunama, kwa raunuatoiegu! Penama natuguma waivinama ya koku be ewai nuatoitoi kauana.” ²³Be Yesu nam aba i riuena. Vutuna aubainama Yesu na tauwai muriwatanama Yesu a riuena, “Kwa riue be ḡavoe e naḡo, tauna muridaḡa e naḡo be ya yogo makamakai be nam i verena.”

²⁴Dabudine Yesu inam waivinama ya paribee be ya riuna, “Israel banegidima taudi sipu kwakokwakodima maika. Be Mamaitua ya riuporeguna da taudiḡa sibo è sagudina.” ²⁵Be waivi Yesu noḡone tuapikane ya raupari be ya riuna, “Bada, kwa sagugu!” ²⁶Be Yesu ya paribee be ya riuna, “Inam nam i verena da seda adi kanima ya paḡo be daḡadaḡasi ya utedi.” ²⁷Be waivi ya riuna, “Bada, inam riukaua! Be kwa noḡoti da guni debane seda kani kurekuredima ta tatai kuruvudina, yaḡoro daḡadaḡasi ta tava be ta kanikanina.” ²⁸Be Yesu ya paribee be ya riuna, “Tam waivimma, am waisumaḡama ya moraba kauana, vutuna aubainama naumeki da aba kwawai baḡena, nama e tubuḡana.” Yesu ya giugiuna raḡanine, waivi natunama ya yawasana munaḡana.

Yesu banaga 4 tausand yai kanidina

(Mk 8:1-9; Lk 9:10-17; Jn 6:1-14)

²⁹Yesu inam dobunama ya gose be Galili yawawinama dianaḡa ya naḡona. Naumeki da tauna ya saḡa ya naḡo oya babedie, be dabudine ya

miana. ³⁰Dabudine patara dosinama adi banagama tuera ragaragaudima da matapotepotedima da nuakudukududima da gungum be sida ġesaudima ragaragaudima mate ai doka tavaitedina. Da Yesu noġone ai mienidi be tauna banaga sidesidedima matabudi yai yawasanidina. ³¹Inam raġanine gungum giu ai karena, be banaga nuakudukududima a vere munaġana, be tuera ragaragaudima babara ai karena, be matapotepotedima ai kitana. Uma kauinama banaga a kitakitana, taudi a base kaue, be Israel adi Mamaituama isanama a kaisuġusuġuna.

³²Yesu na tauwai muriwatanama ya rawateġeidi be ya riuedina, “Taugu uma banegidima yà rarau nuatoiedina, baninama taudi raġan rabuiteġa nopodie tauda mate uma dabudi tē mia be taudi nam aiyaba ti kani rubuna da yodi. Be taugu nam ama ġoēgoena da taudi ma kaniguridi yà riuporedi, deġoda kedae ta raumoyaġasuna.”

³³Be na tauwai muriwatanama a riuna, “Tauda mutuyuae tà miamiana, be yodi deġo kani tà paġo be umanama patarinama tài kanidi?”

³⁴Dabudine Yesu yai taraviredina, “Taumi buredi bisa ġaromie ta kenakena?” Be taudi a riuna, “Buredi 7 be iyana ġauġaubodima raubisaġa.”

³⁵Naumeki da Yesu banaga ya riuedi da doġae a miana. ³⁶Yodibe tauna buredi 7 be iyana ya ragaudi, Mamaitua yai kaiwe, be buredi ya giva da na tauwai muriwatanama ya utedi, be taudi banaga a ute nawedina.

³⁷Dabudine banaga matabudi a kani da a kani siauana. Be kani murine tauwai muriwatana banaga kani a kanikani gosodina, taudi a rawateġeteġeidi be posa matabudi 7 ai moġavudina. ³⁸Banaga dabudine a kanina tautauġoma sievinama 4 tausand be waiwaivi seda mate nam ti sievidina. ³⁹Naumeki da Yesu patara ya riuedi da a naġona adi meagaie, be tauna wagae ya saġa be ya naġona Magadanma.

Banaga mataira kitanama ai baġena

(Mk 8:11-21)

16 ¹Parisi be Sadisi taudi Yesu ġarone a tavana, raurubunama aubainama, taudi Yesu ai baġana da sibo mara matairinama ya voie be a kitana.

²Be tauna ya riuna, “Deġoda kupi e tava be gunuma ei siana raġanine, taumi ko riuriuna, ‘Pomai inam komra.’ ³Be raġanboiboi deġoda dobu e ġuva be gunuma e dubadubana raġanine, taumi ko riuriuna, ‘Manaka tokare kusana e dobina.’ Taumi gunume yaba ta tubutubuġana kita wairuvedima koya kataiena, be yodi raġandima matairidima kita wairuvedima nam koma katakataiedina. ⁴Taumi kimtimima gewagewa be badara banegimima, taumi yodi mataira kitanama ko ġoēgoena. Be nam tokare mataira ko kita, ibewa da taumi peroveta Jona ġarone aba ya tubuġana, vutunaġa tokare ko kitana.” Dabudine Yesu taudi ya gosedi be ya naġo poredina.

Waikatakatai kaikaiyovudima ko kita kauedina
(Mk 8:14-21)

⁵Taudi yawawa a davu be a naḡonaḡona raḡanine, Yesu na tauwai muriwatanama nuedima ya koana da buredi nam ti ragaudina. ⁶Be Yesu ya riuedina, “Parisi be Sadisi adi yistma ko kita kauedina.” ⁷Naumeki da tauwai muriwatana uma kauinama ai giu vivivire be a riuna, “Tauda nam buredi te ragaudina, vutuna aubainama tauna nama ya riuna.”

⁸Be Yesu ya kataie da taudi aba a giugiuena, vutuna aubainama tauna umanama ya riuedina, “Taumi ami waisumaḡama ya ḡaubo ḡaḡa. Aba aubainama ko riuriuna da taumi ḡaromie nam buredi? ⁹Taumi aba koya kitakitana yaḡoro nam ko kataie, bo? Taugu buredi 5 be banaga 5 tausand èi kanidina, be posa bisa koyai moḡavudina, vutudi nam koma noḡonoḡoti, bo? ¹⁰Be taugu buredi 7 be banaga 4 tausand èi kanidina, be posa bisa koyai moḡavudina, vutudi nam koma noḡonoḡoti, bo? ¹¹Taugu yaba yà giugiuedina aba aubainama taumi nam koma katakataiedi, taugu nam buredi ama giugiuena, ibewa. Taugu Parisi be Sadisi adi yistma ko kita kauedina, vutuna taugu yà giugiuena.”

¹²Inam raḡanine taudi a kataie da tauna nam buredi kana yistma i giugiuena, ibewa da Parisi be Sadisi adi waikatakataima kaikaiyovudima ya giugiuena.

Pita yai maḡatarana da Yesu tauna vutuna Keriso
(Mk 8:27-30; Lk 9:18-21)

¹³Raḡanine Yesu Sесeria-Pilipai meagaine ya tavatavana, tauna na tauwai muriwatanama yai taraviredi be ya riuna, “Banaga nema ta riuriu bako? Banaga Natunama tauna aitau?”

¹⁴Be taudi a paribee be a riuna, “Banaga ḡesaudima ta riuriuna da Elaija, be ḡesaudima ta riuriuna da kabe Jerimaia bo ai peroveta tenaḡa kabe i tavatava.” ¹⁵Be tauna yai taraviredi be ya riuna, “Be taumi nema ko noḡonoḡota bako, da taugu aitau?”

¹⁶Dabudine Pita ya paribee be ya riuna, “Tam Tauwai yawasana, Mamaitua yawawayasaninama natuḡominama.”

¹⁷Be Yesu Pita ya riuena, “Saemon Jona natunama, tam Mamaitua ei aiainimna, baninama uma noḡotinama nam banaga ti kataimna, ibewa da Tamaguma marae tauna vutuna ḡarome yai maḡatarina. ¹⁸Be taugu yà riuemna da tam Pita^k inam yeku. Be inam yekunama debane taugu yau ekalesiama yà kerina, be guri tokare nam inam ekalesianama e vaisuba be teneteneḡina. ¹⁹Taugu mara waiguyaunama kiḡinama tam tokare yà utemna. Vutuna aubainama tam aba dobue kwa panipanina,

^k 16.18 Gurik bonane ‘Pita’ inam yeku isanama.

nama marae e panina. Be aba dobue kwa kuvekuvesina, nama marae e kuvesina.”

²⁰Inam dabudine na tauwai muriwatanama ya riuedina da nam aitau sibo a riue, da tauna vutuna Keriso.

Yesu nema ei nuatoitoi bako be e gurina ya giuedina
(Mk 8:31–9:1; Lk 9:22-27)

²¹Inam raḡanine da nokoi ya naḡona Yesu tauna na tauwai muriwatanama ya giu waibatedina, da tauna tokare e naḡona Jerusalemma. Be dabudine babada dosidima, be pirisi adi babadama, be tarawatu tauwai katakataidima, matabudi taudi Yesu ta raukivi gewegewe, be tai gurina. Be raḡan aniwai rabuiteḡane tauna tokare e midisuḡu munaḡana.

²²Inam raḡanine Pita Yesu yai doke ḡavoe ya nawe be yai ḡake be ya riuna, “Avedi Bada, Mamaitua na sague inam kauinama nam ḡarome e tubuḡa!” ²³Dabudine Yesu yai tautinamuri be Pita ya riuna, “Kwa naḡo ḡavoe Seitan! Tam yau kedama kwa guduguduna, tam am noḡotama nam Mamaitua ḡarone be tima yovoyovona. Tam inam banaga adi noḡotama kwa giugiuena.”

²⁴Inam raḡanine Yesu na tauwai muriwatanama ya riuedina, “Deḡoda aitau waimuriwataneguma e ḡoena, naumeki da na ḡoanama matabuna e gosedi, be na korosima e kiroḡi da ei muriwataneguna. ²⁵Tam aitau tame am yawasanama kwa kaididi be kwa raberabena, tokare am yawasanama kwa kawa gewagewana, be tam aitau da taugu kautaiye am yawasanama kuyai utaena, naumeki da am yawasanama tokare kwa banavina. ²⁶Be deḡoda aitau dobu yabedima matabudi e ragaragaudina, be e gurina raḡanine, inam yabedima tauna nema ta sagu bake, da yawasana kenakena nonoḡinama e paḡo? Bo aba ei utae da na yawasanama e paḡo munaḡe? ²⁷Baninama Banaga Natunama tokare Tamanama neneḡarine na aneama mate ta yovona. Yodibe banaga tenatenaḡaḡa aba a voivoiedina ruvane nama tokare ei maesidina. ²⁸Taugu ya riuriu kauemina da taumi ḡesaumima yodi uma dabudi ko midimidina tokare nam ko guri, naumeki da Banaga Natunama ei rawaguyau be e verauna ko kitana.”

Yesu kitanama ya boru vitarena
(Mk 9:2-13; Lk 9:28-36)

17 ¹Raḡan 6 muridie Yesu na tauwai muriwatanama Pita, Jeims be tasinama Jon yai dokedi be taudiḡa oya daudaunama debane a naḡona.

²Taudi oya debane a tavatavana, dabudi ta kitana be Yesu kitanama ya boru vitarena. Tauna noḡonama yai matakanikanina maika suara, be

na garama a ḡavorana maika suara boruminama. ³Inam kauinama ya tubutubuḡana nopone, ta kitana be Mousis be Elaija Yesu mate awai giuna a kitedina. ⁴Naumeki be Pita Yesu ya riuena, “Bada, ya vere kauana da tauma mate uma dabudine. Deḡoda tam kwa ḡoena, taugu kape rabuiteḡa yà voidina, tenaḡa tam aubaimma, tenaḡa Mousis be tenaḡa Elaija.”

⁵Pita yaḡoro ya giugiu be giyou ḡavoḡavora tunutununama ya yovoyovona ya suma tawedina. Dabudine bona giyou nopone ya dobi be ya riuna, “Uma inam taugu natuḡomiguma, tauna ewai nuavereguna, bonanama ko vaiena!” ⁶Be tauwai muriwatana nama giunama a vaivaiena, taudi a naira kaua, be noḡodie a beku be doḡae a ravusedina. ⁷Naumeki be Yesu ya verau da ya taukonidi be ya riuna, “Ko midisuḡu, nam ko naira.” ⁸Inam raḡanine taudi a tausugudi be ai kita da Yesu taunaḡa a kitana, be nam aitaḡu ḡesau dabudi ti kitana.

⁹Naumeki da taudi oyae be a dobi a munamunaḡana raḡanine, Yesu taudi umanama ya riuedina, “Taumi aba koya kitakitana nam aitaḡu tenaḡa ko riue, naumeki da Banaga Natunama gurie be e kawa midisuḡu munaḡena.”

¹⁰Dabudine tauwai muriwatana Yesu ai taravire be a riuna, “Aba aubainama tarawatu tauwai katakataidima ta riuriuna da Elaija tauna noḡone e yovo doka?” ¹¹Dabudine Yesu ya paribeedi be ya riuna, “Inam riukaua, Elaija tauna tokare e yovo doka be yaba matabudi e kawa nonoḡidina. ¹²Be uma yà riuemina, Elaija tauna kaite ya yovona, be banaga tauna a nuababaḡena, vutuna aubainama taudi adi ḡoanama nama tauna ḡarone a voivoiedina. Inam banegidima tokare kauinama teneḡine nama Banaga Natunama ta raukivi gewegewe be ei nuatoitoina.” ¹³Inam raḡanine na tauwai muriwatanama a kataiena, da tauna taudi ḡarodie Jon tauwai babataito ya giugiuena.

Yesu gomana penama kokukokunama yai yawasanina

(Mk 9:14-28; Lk 9:37-42)

¹⁴Raḡanine taudi patara ḡarodie a dobidobina, dabudine tauḡoma tenaḡa ḡarodie ya tava be Yesu noḡone tuapikane ya raupari ¹⁵be ya riuna, “Bada, natuguma kwa raunuatoie! Tauna muya e kawakawa guri, be e rarau gurereḡa. Tauna kana raḡanie e beku be kai matane e naḡonaḡona, be wari raḡanie upa nopone e naḡonaḡona. ¹⁶Taugu è verauḡena am tauwai muriwatanama ḡarodie, da taudi a raurubuna, be nam ti yawasanina.”

¹⁷Be Yesu ya paribee be ya riuna, “O banaga nam waisumeḡimi, ami nuababaḡama ya moraba ḡaḡa. Taumi mate tà mia ḡaḡa be yà noya ḡaḡaemi? Gomana ko verauḡe uma ḡarogue.” ¹⁸Inam dabudine Yesu penama ya riutuagaie be penama gomana ya dobi porena. Naumeki da inam raḡanine gomana ya yawasana munaḡana.

¹⁹Be tauwai muriwatana taudiḡa muriḡa a verau Yesu ḡarone da ai taravire be a riuna, “Aba aubainama tauma penama kè tavu be nam i naḡo?” ²⁰Be tauna ya paribeedi be ya riuna, “Inam baninama taumi nam ami waisumaḡama i morabana. Yà riuriu kauemina taumi ami waisumaḡama i morabana kai yauḡana pesinama maika, taumi tokare kau oyanama koya riuna, kwa midisuḡu be noa dabudi kwa naḡo, be oya tokare ya naḡona. Be nam aiyaba tokare ḡaromie ya pipipiri. ²¹Penama inam nama kitedima tokare nam aiyaba e tauriedi, ibewa da widina be moiragie tokare e tauriana.”¹

Yesu nema e guri bakona, raḡan aniwai rabuinama ya giu munaḡena
(*Mk 9:30-32; Lk 9:43-45*)

²²Be tauwai muriwatana matabudi Galilima awai rawateḡeidina raḡanine, Yesu umanama ya riuedina, “Banaga Natunama kaiteka banaga nimedie ta boru nawena. ²³Be taudi tokare tai gurina, be raḡan wairabuḡeḡane Mamaitua tokare tauna ei yawasani, be e kawa midisuḡu munaḡena.” Dabudine tauwai muriwatana nama a vaivaiena, taudi ai nuaboya kauana.

Tempol teksnama

²⁴Be Yesu na tauwai muriwatanama mate Kapeniamma a tavatavana raḡanine, tempol teksnama tautaminama baneginama ya tava da Pita yai taravire be ya riuna, “Ami tauwai katakataima tauna tempol teksnama ewai maesi bo ibewa?” ²⁵Naumeki da Pita ya paribee be ya riuna, “Ee, ewai maesina!” Be raḡanine Pita vadae ya saḡasaḡana, Yesu Pita yai taravira doke be ya riuna, “Saemon, tam aba kwa noḡonoḡoti, guyaguyau dobue aitu ḡarodie teks ta tamatama? Natunatuḡomidima ḡarodie bo banaga ḡesaudima ḡarodie?”

²⁶Dabudine Pita ya paribee be ya riuna, “Banaga ḡesaudima ḡarodie.” Dabudine Yesu Pita ya riuna, “Naumeki da tauda adi sedama aubainama nam t̄ai maesa. ²⁷Be deḡoda tama kawa nopogewegewedi aubainama, kwa naḡo da topae kwa dobi da am kaimoma kwa porenna. Be aba iyeninama kwa kaimo dokena, inam iyeninama gayane kwa kitana mane e kenakenana. Inam vutuna kwa paḡo da teks tautaminama kwa utena, taugu be tam aubaidama kwai teksna.”

Mamaitua na waiguyauma nopone, aitu ya saḡa gurata?
(*Mk 9:33-37; Lk 9:46-48*)

18 ¹Inam raḡanine tauwai muriwatana Yesu ḡarone a verau be ai taravirena, “Bada, Mamaitua na waiguyauma nopone aitu ya saḡa gurata?”

¹ 17.21 Gurik baibol ḡesaudima nopodie uma versnama 21 nam ima kenakenana.

²Dabudine Yesu gomana ḡaubonama ya riue da ya verau be poudie ya midina. ³Yodibe ya riuna, “Taugu yà riuriu kauemina, deḡoda tam aitau am yawasanama nam kwa vitare seda adi yawasanama maika, tam nam tokare Mamaitua na waiguyauma nopone kwa saḡa. ⁴Vutuna aubainama deḡoda tam aitau am yawasanama kwa vitare be kwa ḡaubo munaḡana uma gomeninama maika, tam tokare Mamaitua na waiguyaue am banagama poudie kwa saḡa guratana. ⁵Be aitau da gomana ḡaubonama maika uma gomeninama taugu isague ewai aninena, tauna taugu ewai anineguna.

⁶“Be deḡoda ai banaga ewai sumaḡeguna gomana ḡaubonama maika, be banaga ḡesau e verau be e voie da inam baneginama aitau ewai sumaḡeguna gewagewa ei tubuḡina, ya verena da inam baneginama gewagewa tauwai karenama gadone yeku dosinama ta pani be egasie tai daururuna.

⁷“Taumi aitaḡa dobue ami banagama adi waisumaḡe kowai kedadoka waigewedina, taumi ko kita kauana! Raurubu riukaua tokare ta tavana, be aitaḡa da tauraurubu, taumi ko kita kauana!

⁸“Deḡoda nimamma bo kaḡamma e voiem da gewagewa kwa voivoiena, naumeki da kwa douraka be kwa porekaiyatina. Ya verena da kaḡamma tenaḡa be nimamma tenaḡa mate yawasana nopone kwa saḡana, be nam rabui mate da tam kai karakarata nonoḡine ta pore nawemna.

⁹“Be deḡoda matamma e voiem be gewagewa kwa voivoiena, naumeki da kwa kunavai be kwa porekaiyatina. Ya verena da matamma tenaḡa mate yawasana nopone kwa saḡana, be nam rabui mate da gienae kai karakaratine ta pore nawemna.

¹⁰“Ko kita kaua da uma tauwai sumeḡidima ḡauḡaubodima nam ko kita waiyovoḡedi, baninama taudi adi aneama raḡan matabuna marae Tamaguma noḡone ta midimidina. ¹¹Banaga Natunama ya yovona, banaga kwakokwakodima waiyawasanidima aubainama.”^m

Sipu kwakokwakonama wainasinama

¹²“Deḡoda banaga tenaḡa ḡarone sipu 100 a miamiana, be tenaḡa i kwakona, tauna tokare aiyaba ya voie, taumi aba ko noḡonoḡoti? Tauna tokare na sipuma 99 oya babane ya gosedi, be ya naḡona na sipuma kwakokwakonama wanenama aubainama. ¹³Be yà riuriu kauemina, raḡanine na sipuma i banavina, tauna inam sipunama kwakokwakonama aubainama tokare yai nuavere kauana, nam na sipuma ḡesaudima maika. ¹⁴Be inam kauinama teneḡinama nama Tamemima marae, tauna nam ima ḡoegoena da tauwai sumaḡa ḡaubonama tenaḡa e kwako.

^m 18.11 Gurik baibol ḡesaudima nopodie uma versnama 11 nam ima kenakenana.

**Ai turamma gewagewa ġarome e voiena,
tam aba kwa voie tauna ġarone?**

¹⁵“Deġoda turamma tauwai sumaġa ġesau be gewagewa ġarome ya voiena, naumeki da tamġa kwa naġo ġarone, be taumiġa inam piripirinama ko kawa didimanina. Be deġoda am ġiuma e vaie be e paġona, inam naumeki da turamma kuya paġo munaġena. ¹⁶Be deġoda am ġiuma nam e paġo, naumeki da banaga tenaġa bo rabui mate kwa ragaudi, be ġarone ko naġo da inam piripirinama ko kawa didimanina. Be inam banegidima rabui bo rabuiteġa taudi aba ko ġiuedina tai matematena. ¹⁷Be tauna deġoda inam banegidima bonedima yaġoro nam e paġo, naumeki da inam kauinama Mamaitua na damma ġarodie ko ġiuenā. Be tauna Mamaitua na damma adi raukurama yaġoro nam e vaie, naumeki da tauna ekalesiae be ko boru dobiġena ġavoe. Be taumi tauna ko voie da banaga danedanenenama maika, bo banaga isanama gewagewanama maika. ¹⁸Yà riuriu kauemina da taumi aba dobue ko panipanina, nama marae e panina. Be dobue ko kuvekuvesina, nama marae e kuvesina.

¹⁹“Be mate uma yà riuemina, deġoda taumi rabui uma dobue koi anina tenaġa be aiyaba koi baġena, tokare Tamaguma marae ami waibaġama e voiena. ²⁰Baninama deġo dabudi banaga rabui bo rabuiteġa isague tai rawateġeidina, taugu taudi mate dabudine.”

Taunoya kivikorokoronama wainasinama

²¹Dabudine Pita Yesu ġarone ya verau be yai taravirena, “Bada, deġoda turaguma gewagewa ġarogue e voiena, raġan bisa tokare na gewagewama yà noġota pore, raġan 7, bo?” ²²Be Yesu ya riuena, “Nam 7, ibewa, be raġan 7 be 70 be debane debane turamma na gewagewama kwa noġota porena.

²³“Vutuna aubainama mara waiguyaunama inam maika umanama, guyau dosinama tenaġa ya tava be na taunoyanama ya rawateġeidina, baninama ya ġoeġoena da sibo ya kataiena, da na taunoyama na manema a rabe kuedi bo ibewa. ²⁴Taudi awai rawateġeina raġanine, taudi tauġoma tenaġa guyau na manema 10 tausand Talentⁿ ya paġopaġona, tauna a verauġena guyau ġarone. ²⁵Be inam baneginama nam teneteneġina da sibo guyau na manema yai maesa munaġe. Vutuna aubainama guyau ya riuna da sibo inam tauġominama tauname, be na visarama, na sedama be na taragaima matabudi sibo ya gimaredi, da mane sibo ya paġona. Yodibe guyau na manema sibo ya ute munaġena. ²⁶Dabudine taunoya guyau noġone tuapikane e raupari be yai baġa

ⁿ 18.24 Gurik bonane ya riuna: 10 tausand Talents. Inam 480-milion Kina (K480,000,000).

gurate be ya riuna, ‘Ae, guyau kwa raunuatoiegu! Taugu am manema maesinama matabuna tokare yà ute munaḡemna.’²⁷ Naumeki da guyau na taunoyama ya raunuatoiena, aubainama na manema maesinama matabuna ya noḡota poredi, be ya riue da ya naḡona.

²⁸ “Raḡanine tauḡominama doḡae ya dobidobina, dabudi boni tauna ḡarone turanama ḡesau mane 100 Denari^o ya paḡopaḡona, vutuna ya banavina, naumeki da turanama gadonama ya kiki be ya riuna, ‘Yau manema kwai maesa makaie.’²⁹ Dabudine turanama tauna noḡone tuapikane ya raupari be yai baḡa gurate be ya riuna, ‘Ae, yau tura kwa raunuatoiegu! Taugu am manema maesinama matabuna tokare yà ute munaḡemna.’³⁰ Be tauna turanama na riuma ya vaia tuaḡaie, be dibure ya boru nawena. Be dabudi ya miana naumeki da turanama na manema sibo yai maesa rovona.

³¹ “Inam raḡanine taunoya ḡesaudima nama a kitakitana, taudi nuedima yai medi kauana. Vutuna aubainama taudi yaba matabudi a tubutubuḡana, a naḡo be guyau ai varina.³² Naumeki da guyau inam tauḡominama ya riue da ḡarone ya saḡa, be ya riuen, ‘Tam taunoya gewagewama! Taugu yau manema maesinama ḡarome matabuna è noḡota poren, baninama tam tuapikame kuya raupari, be kuyai baḡaḡuna aubainama.³³ Be tam turamma nama sibo kuya raunuatoiena, taugu tam è raunuatoiemna maika.’³⁴ Dabudine guyau nuanama yai medi kaua, be inam tauḡominama kivikorokoronama dibure ya boru nawena tauraukivigewagewa banegidima nimedie. Be dabudine ya miana naumeki da guyau na manema sibo yai maesa rovona.

³⁵ “Taumi deḡoda ami banagama adi gewagewama nam nuemima tabutabune ko noḡota poredi, naumeki da Tamaguma marae tokare taumi ḡaromie kauinama teneḡinama nama e voiem be gienae e pore nawemna.”

Yesu waigosaḡa na kauama ya giuena

(Mk 10:1-12)

19 ¹ Be Yesu inam giudima yawai kovina raḡanine, tauna Galili ya gose be ya naḡona Judia adi doḡue, upa Jodanma be noaḡo nevane. ² Be patara dosinama tauna ai muriwatane be dabudine yai yawasanidina.

³ Dabudi Parisi ḡesaudima Yesu raurubunama aubainama ḡarone a tava be a riuna, “Deḡoda tauḡoma na noḡotama ruvane na waivima i gosena, inam tokare naumeki bo ibewa?”

⁴ Dabudine Yesu ya paribeedi be ya riuna, “Taumi girugiruminama porane koya sievi bo ibewa, boni pakane tauwai tubuḡa tauna tauḡoma

^o 18.28 Gurik bonane ya riuna: 100 Denari. Inam raḡan 100 adi maesama.

be waivi ya voidedi, ⁵be ya riuna, ‘Tauḡoma tamanama be tinanama ya gosedi be na waivima mate tai rawateḡeidina, da boni taudi rabui be yodi taudi inam tubuḡa tenaḡa.’ ⁶Vutuna aubainama taudi yodi nam rabui, ibewa da taudi tenaḡa. Taudi noḡone rabui be yodi Mamaitua ya rawateḡeidina, nam aitou ei yamonedii.”

⁷Dabudine Parisi Yesu ai taravira munage be a riuna, “Be aba aubainama Mousis riuvavasaga tautauḡoma ya utedi da taudi waigosaga pepanama adi waiwaivima ta utedi be ta gosedi?” ⁸Be Yesu dabudi ya paribeedi be ya riuna, “Mousis yai aninemina da taumi ami waiwaivima ko gosedin, baninama taumi nam ami raunuatoima ami waiwaivima ḡarodie ima kenakenana. Be pakane Mamaitua waigosaga nam i aninena. ⁹Taugu ya riuriuemina deḡoda tam aitou am visarama kwa gose yababena, avedi da tauna nam ai tauḡoma mate gewagewa ti voiena, be waivi ḡesaunama kwa naḡina, tam inam gewagewa dosinama kuya voiena, baninama monagemma debane mui kuya porena. Be waivi na tauḡomama debane mui e porena, inam raḡanine tauḡoma na waivima deḡoda e gose porena inam nam aiyaba.”

¹⁰Naumeki da tauwai muriwatana Yesu a riuna, “Deḡoda waigosaga nam kwai anine, ya verena da banaga nam sibo ai naḡi.” ¹¹Yesu ya paribeedi be ya riuna, “Nam banaga matabudi uma giunama tokare ta paḡo, ibewa da taudi aitaḡa Mamaitua noḡota ya uteutedina, taudiḡa ta paḡona. ¹²Banaga ḡesaudima nam timawai naḡina, baninama taudi a tubuḡena nama, be tautauḡoma ḡesaudima banaga a kaivaidina aubainama nam timawai naḡina. Be tautauḡoma ḡesaudima taudi Mamaitua na waiguyauma aubainama naḡi a tuaḡaiena. Be banaga aitou inam giudima banidima e kataiedina, tauna sibo ya ragaudina.”^p

Banaga adi sedama a verauḡedi Yesu ḡarone be tauna yai aninedina
(*Mk 10:13-16; Lk 18:15-17*)

¹³Be banaga ḡesaudima seda a verauḡedin Yesu ḡarone, da tauna nimanama debedie sibo ya boru be aubaidima ya moiragina. Be tauwai muriwatana inam banegidima a riutuaḡaiedina. ¹⁴Dabudine Yesu ya riuna, “Seda ḡauḡaubodima ko gosedi da ḡarogue ta verauna, be nam koi ḡakedi, baninama mara waiguyaunama banaga maika uma sededima nama aubaidima.” ¹⁵Naumeki da Yesu seda debedie nimanama ya biridi ya kovikovina, tauna ya naḡona.

Taragai baneginama na waitaravirama
(*Mk 10:17-31; Lk 18:18-30*)

¹⁶Raḡan tenaḡa tauḡoma tenaḡa Yesu ḡarone ya tava da yai taravire be ya riuna, “Tauwai katakatai, taugu aiyaba verenama ya voie be yawasana

^p 19.12 Gurik bonane ya riuna da banaga ḡesaudima Mamaitua na waiguyauma aubainama, taudime a kaivai munagedina.

kenakena nonoḡinama yà paḡo?” 17 Be Yesu ya paribee be ya riuna, “Vere aba verenama aubainama tam taugu kwawai taraviregu? Mamaitua taunaḡa verenama. Be tam deḡoda yawasana kenakena nonoḡinama kwa ḡoena, naumeki da riuvavasāḡa kwa voteyeteyedina.”

18 Be taragai baneginama yai taravira munaḡa be ya riuna, “Abaḡa riuvavasāḡidi?” Dabudine Yesu ya paribee be ya riuna, “Nam kwa rauvunuḡa, nam kwa rauwaivi bo kwa rautauḡoma, nam kwa danene, nam kwa kaiyovu, 19 tamam be tinamma kwa viviredina be turamma nuanamma e paḡona maika nema tamḡa kwawai nuapaḡo munaḡemma nama.”

20 Be taragai baneginama ya riuna, “Taugu inam giudima matabudi è voia rovodina. Be yodi aiyaba ḡesau yà voie?” 21 Naumeki da Yesu tauḡoma umanama ya riuna, “Tam deḡoda yawasana didimaninama kwa ḡoena, naumeki da kwa naḡo be am purapurama matabudi kwa raugimaredi, be mane banaga waikaruwaḡewaḡedima kwa utedina. Deḡoda nama kwa voiana, tam am waiguyauma tokare marae kwa paḡona. Yodibe tam taugu kwai muriwataneguna.”

22 Inam tauḡominama nama giunama ya vaivaiena tauna yai nuaboya kaua be ya naḡona, baninama tauna yai purapura guratana aubainama.

23 “Dabudine Yesu na tauwai muriwatanama umanama ya riuedina, Yà riuriu kauemina da purapura baneginama tauna marae saḡanama ḡarone ya pipiripi kauana. 24 Be ko noḡoti da Kamel ya bagibagi kauana da seyau gavogavone e sonaḡana, be nama taragai baneginama ya bagibagi da ya bagibagi kauana, tokare nam teneteneḡina da Mamaitua na waiguyauma nopone e saḡa.”

25 Be Yesu na tauwai muriwatanama nama a vaivaiena taudi a naira kaua be a riuna, “Deḡoda nama, aitu tokare e yawasana?” 26 Naumeki da Yesu taudi ya kitadididi be ya riuna, “Inam kauidima matabudi banaga ḡarodie tokare nam teneteneḡina, be Mamaitua ḡarone yaba matabuna teneteneḡinama e voidina.” 27 Be Pita dabudine Yesu ya riuna, “Tauma yaba matabudi kè gosaḡana tam waimuriwatanema aubainama, be tauma tokare aiyaba ama maesama ka paḡo?”

28 Dabudine Yesu taudi umanama ya riuedina, “Rawavau raḡaninama e tavana raḡanine, Banaga Natunama waiguyau gabunama boruborumine e miana, be inam raḡanine taumi tauwai muriwatanama 12 mate diague ko mia be Israel damdima matabudi 12 koi tarapiriedina. 29 Be aitu da adi vadama bo tamedima bo tinedima, tasitasidima bo nuvunuvudima, adi sedama bo adi sipima a gosaḡana taugau waimuriwataneguma aubainama, taudi tokare ya toi vavasāḡana ta banavidina, nam a gosegosedina maika. Be taudi yawasana kenakena nonoḡinama mate ta paḡona. 30 Be banaga toitoi aitaḡa ta dokadokana, taudi tokare tai murina. Be aitaḡa yodi taiwai murina, taudi tokare ta dokana.”

Taunoya gureipi sipinama nopone ta noyana wainasidima

20 ¹Be Yesu na giuma ya kaiwatani be ya riuna, “Mara na waiguyauma inam umanama:

Raḡan tenaḡa sipi taupakinama raḡanboiboi kupinaḡa ya naḡo be banaga ya kokonedina, da na sipie sibo a noyana. ²Be taudi matabudi ai anina tenaḡa da taudi matabudi adi noyama damone ravie taudi tenatenaḡaḡa Denari tenaḡaḡa ei maesidina. Naumeki be ya riu poredina na sipie.

³“Be raḡanboiboi suara ya tavatavana nama, tauna ya dobi ya munaḡa be banaga ḡesaudima anikune gabune a midimidi yabayababana ya banavidina. ⁴Dabudine ya riuedina, ‘Taumi ko naḡo be yau sipie ko noyana, be taugu tokare taumi yai maesimina.’ ⁵Naumeki da taudi a naḡona na sipie noya aubainama.

“Naumeki da suaratoru be tauḡominama ya dobi ya munaḡana, be kauinama teneḡinama ya voiena. Be ravie kauinama teneḡinama ya voiena.

⁶“Be suara ya yovoyovona raḡanine, tauna ya dobi ya munaḡa be yaḡoro banaga a midimidi yabayababana ya banavidina. Dabudine ya riuedina, ‘Taumi suara daudau aba uma dabudi ko midi yabayababa be ko voivoie?’ ⁷Be taudi a riuna, ‘Tauma nam aitaui i kokonemaina da aba sibo kè voie.’ Be tauna ya riuedina, ‘Naumeki, taumi mate ko naḡo yau sipie ko noyana.’

⁸“Be ravi ḡomae noya ya kovikovina, sipi taupakinama taunoya adi badama ya yokoe be ya riuna, ‘Taunoya matabudi kwa rawateḡeidi be adi maesama kwa utedina. Aitaḡa muriḡa a tava be noya awai karena, taudi ḡarodie waimaia kwai karena naumeki da banaga noya awai kare dokena ḡarodie kwa tavana.’ ⁹Naumeki da taudi aitaui da suara ya yovoyovona raḡanine noya aubainama a tavatavana, taudi tenatenaḡaḡa a verau be Denari tenatenaḡaḡa a ragaudina. ¹⁰Be aitaḡa noya aubainama a tavatava dokana, taudi awai noḡotana kabe mane dosinama ta paḡo. Be ibewa da taudi matabudi Denari tenaḡaḡa a ragaudina. ¹¹Taudi mane a paḡopaḡona raḡanine, sipi taupakinama ḡarone momodu ai kare be a riuna, ¹²“Tauma noya dosinama kè voie be suara debamaie ya kara kuruvana. Be inam banegidima taudi muriḡa ḡoma a tava be nam noya dosinama ti voiena. Be tam maesa teneḡinama kuya utedina.’

¹³“Be sipi taupakinama ya paribeedi be ya riuna, ‘Badam, taugu nam gewagewa ḡarome e voiena, baninama noḡone tam kuyai aninana da Denari tenaḡa sibo è utemina noya murine. ¹⁴Vutuna aubainama am manema kwa paḡo be kwa naḡona. Be taugu yà ḡoeḡoena da banaga muriḡa è kokokonedina maesa teneḡinama yà utedina maika tam. ¹⁵Taugu yau pairuma aubainama tam kuya unura, bo? Uma inam taugu

yau manema, vutuna aubainama taugu yà gōeḡoena nama banaga yà utena.’

¹⁶“Naumeki da aitau da tawai murina, taudi tokare ta dokana, be aitau da ta dokadokana, taudi tokare tai murina.”

**Yesu nema e guri bakona raḡan aniwai rabuiteḡanama
ya giu munaḡena**

(Mk 10:32-34; Lk 18:31-34)

¹⁷Yesu na tauwai muriwatanama mate Jerusalemma a naḡonaḡona raḡanine, kadae na tauwai muriwatanama ya riuedi da ḡavoe taudiḡa be ya riuedina, ¹⁸“Tauda tà naḡonaḡona Jerusalemma be dabudine Banaga Natunama tokare banaga ta boru dobiḡena pirisi adi babadama be tarawatu tauwai katakataidima nimedie. Be taudi adi ogama a taraḡina da tauna tokare tai gurina. ¹⁹Be taudi tokare Banaga Natunama ta paḡo be banaga aitaḡa nam Jius taudi nimedie ta boru nawe da taudi tai diboḡi, ta kwapu be korosie ta tuparatuna. Be raḡan wairabuiteḡane tauna e midisuḡu munaḡana.”

Jeims be Jon tinedima na waibaḡama

(Mk 10:35-45)

²⁰Dabudine Sebedi natunatunama tinedima mate Yesu ḡarone a tava be tinedima tuapikane ya raupari be na ḡoanama Yesu yai baḡana. ²¹Be Yesu ya riuna, “Tam am ḡoanama aba?” Dabudine waivi ya riuna, “Kwai anina da am waiguyauma nopone yau sedama uma rabui, be tenaḡa sibo kasaumma yauwane ya miana, be tenaḡa sibo senimma yauwane ya miana.”

²²Be Yesu ya riuena, “Tam nam ku kataiena aba kwawai baḡena. Taumi teneteneḡina da taugu ḡoraḡoranama yà tegona nama tokare ko tego, bo?” Dabudine seda a riuna, “Ee, tokare ka tegona teneteneḡinama.” ²³Be Yesu ya riuedina, “Taumi riukaua tokare yau reduē ko tegona, be kasaugue be senigue mieninama inam nam taugu amawai badena. Inam gabudima Tamaguma ya vokaukauedina, taudi banaga vinevinedima aubaidima.”

²⁴Tauwai muriwatana ḡesaudima matabudi 10-nama a vaivaiena raḡanine, taudi nuedima yai medina adi banagama rabui ḡarodie. ²⁵Vutuna aubainama Yesu taudi matabudi ya rawateḡeidi be ya riuedina, “Taumi koya kataiena da eteni babadidima tawai badabadana. Be babadidima ai rewapana vavasaga aubainama, taudi eteni tawai badedina. ²⁶Uma kauinama taumi ḡaromie nam nama e tubuḡa! Be deḡoda aitau tenaḡa nopomie moraba e ḡoena, naumeki da tauna e kaue da matabumi ami taunoyama e tubuḡana. ²⁷Be aitau saḡa gurata e ḡoena, naumeki da ei taunoyana ḡaromie. ²⁸Maika Banaga Natunama ya

yovona, nam banaga tauna aubainama ti noyana, ibewa da tauna banaga aubaidima ya noyana, be na yawasanama yai utaena, da banaga toitoi e kuvesidina.”

Yesu tautauḡoma matapotepotedima rabui yai yawasanidina
(*Mk 10:46-52; Lk 18:35-43*)

²⁹Yesu na tauwai muriwatanama mate Jeriko a gosegosena raḡanine, patara dosinama tauna ai muriwatanena. ³⁰Dabudine tautauḡoma rabui matapotepotedima keda diane a miamiana. Be raḡanine ta vaiena be Yesu inam kedanaḡa ya naḡonaḡona, naumeki da taudi bonedima dosine a riuna, “Bada, guyau Deivid natunama, kwa raunuatoiemai!” ³¹Be dabudine patara taudi a riutuaḡaiedina da sibo ai nuatuḡuna. Be taudi yaḡoro a riu guratana, “Bada, guyau Deivid natunama, kwa raunuatoiemai!”

³²Dabudine Yesu ya midi kwasa, be yai taraviredina, “Aba ko ḡoḡoena ya voie?” ³³Be taudi a paribee be a riuna, “Bada, tauma ka ḡoḡoena kai kitana.” ³⁴Be Yesu ya raunuatoiedi be matedima ya taukonidina. Be dabudine yai raḡantenaḡe da taudi ai kita be tauna ai muriwatanena.

Yesu Jerusalemma ya saḡana
(*Mk 11:1-10; Lk 19:29-39; Jn 12:12-15*)

21 ¹Raḡanine Jerusalem diane a tavatavana taudi a verauna oya Olipma Betpage meagaine. Dabudine Yesu na tauwai muriwatanama rabui ya riupore nawe dokedi, ²be ya riuedina, “Ko naḡo noḡomie meagaine, be raḡanine meagaie ko saḡasaḡana, dabudine ko kitana donki natunama mate a nigoridina. Ko kuvesidi be ko yovoḡedina taugu ḡarogue! ³Be deḡoda aitaui ei taraviremina, taumi ko riuna, ‘Bada e ḡoḡoedina, raḡan ḡaubonaḡa be ka saḡe munaḡedina.’”

⁴Uma kauinama Mamaitua na giuma boni peroveta ya giugiuena nama ya tubuḡana,

⁵“Jerusalem banegidima ko riuedina, ko kitana ami guyauma vovoyaḡotinama donki natunama ya gerue be ḡaromie e veraverauna.”

⁶Naumeki da tauwai muriwatana a naḡo be Yesu aba ya riuriuedina, nama a voidina. ⁷Taudi donki natunama mate Yesu ḡarone a dobiḡedi be taudi adi garama donki natunama debane a yesidi, be Yesu debane ya miana. ⁸Banaga toitoi adi garama kedaḡa a yesiyesidina maika, banaga ḡesaudima kai ma rugurugudi a taraḡa, a tavaitedi, be kedaḡa a yesidina. ⁹Banaga aitauiḡa a dokadokana be aitauiḡa Yesu murine a saḡasaḡana, a yogo be a riuriuna,

“Hosana guyau Deivid natunama ḡarone! Waiiaianinama, tauna vutuna Bada isane e veraverauna! Mamaitua saḡasaḡa vavasagḡinama isanama ta kaisuḡusuḡuna.”

¹⁰ Raḡanine Yesu Jerusalem nopone ya saḡasaḡana banaga matabudi a mosari, ai paparana be a riuriuna, “Uma tauna aitau?” ¹¹ Be patara a riuna, “Uma tauna Yesu, tauna peroveta, Nasaretma Galili provins nopone be ya verauna.”

Yesu taukune tempol nopone ya tavu dobiḡedina

(Mk 11:15-19; Lk 19:45-48; Jn 2:13-17)

¹² Be Yesu tempol nopone ya saḡa be dabudine banaga aitaḡa a kunekune be a gimagimarana, matabudi ya tavu dobiḡedina. Be tauna mane taurabedima adi vatarama yai tauviredi be aitaḡa kiu gabubu taurau gimaredima adi kaba miama mate yai tauviredina. ¹³ Be Yesu taudi ya riuedina, “Girugiruminama porane Mamaitua ya riuna, ‘Taugu yau vadama inam moiragi kana vadama.’ Be taumi ko voivoiena da kabe taudanedanene adi gabu.

¹⁴ Be banaga matapotepotedi be tuera ragaragaudima tempol nopone Yesu ḡarone a tava be tauna yai yawasanidina. ¹⁵ Dabudine pirisi adi babadama be tarawatu tauwai katakataidima Yesu yaba veredima ya voivoiedina a kitedi be seda tempol nopone a yogo be a riuriuna, “Hosana, guyau Deivid natunama!” Vutuna aubainama inam babadidima nuedima yai medi ¹⁶ be Yesu a riuna, “Tam seda aba ta riuriuena kwa vaivaie bo ibewa?” Be Yesu taudi ya riuedina, “Ee, yà vaivaiedina. Taumi girugiruminama porane koya sievi bo ibewa da umanama ya riuna, ‘Tam seda raubanidima, be seda wawaidima kuya voiedi da taudi isamma ta kaisuḡusuḡuna.’” ¹⁷ Dabudine tauna ya gosedi be inam meagainama ya dobi pore be ya naḡona Betenima, be dabudine ya kenana.

Yesu damaya ya riutuḡaḡaie da nam e vota munaḡa

(Mk 11:12-14; 14:20-24)

¹⁸ Pomainama raḡanboiboi kupinaḡa Yesu ya munamunaḡana Jerusalem, be kedae tauna kani ya karatina. ¹⁹ Dabudine e kitana be damaya kainama keda diane ya midimidina. Naumeki da tauna kai diane ya naḡo be dabudi damaya rugudiḡa ya kitedina, be banidima nam i banavidina. Vutuna aubainama tauna damaya ya riuna, “Nam airaḡan kwa vota munaḡa!” Tauna nama ya riuriuna mudune, damaya kainama ya pokina.

²⁰ Be tauwai muriwatana nama a kitakitana, taudi a base be a riuna, “Damaya nemanama da ya poki makai?” ²¹ Be Yesu ya riuedina, “Yà riuriu kauemina taumi deḡoda koi sumaḡa be nam ko noḡota bekubeku, taumi tokare kauinama teneginama nama ko voiana, be nam inam vutunaḡa be mate taumi tokare kaua oyanama ko riuna, ‘Kwa nuakamoḡa be kwa naḡo egasie.’ Be nama tokare e tubuḡana. ²² Deḡoda taumi koi sumaḡana, taumi tokare ami ḡoanama aiyaba koi baḡena moiragie, tokare ko banavina.”

Yesu deḡo rewapana ya paḡona waitaraviranama
(*Mk 11:27-33; Lk 20:1-8*)

²³Yesu tempol nopone ya saḡa be yawai katakaina raḡanine, pirisi adi babadama be babada ḡesaudima mate tauna ḡarone a tava, be ai taravirena, “Tam aba waibadana, be aitu waibada ya utem be uma kaudima kwa voivoiedi?”

²⁴Be Yesu ya riuedina, “Taugu mate yau waitaravirama tenaḡa taumi yaì taraviremina, be deḡoda taumi ko paribeguna, naumeki da ya riue mi da taugu aba waibadane uma yabedima ya voivoiedi. ²⁵Ko riuegu! Jon deḡo dabudi waibada ya paḡo da yawai babataito, Mamaitua ḡarone bo banaga ḡarodie?”

Dabudine taudiḡa ai saḡasaḡa be a riuna, “Nema tà riu bako? Deḡoda tà riuna Mamaitua ḡarone, tauna tokare e riuedana, aba aubainama taumi Jon nam koi sumaḡe? ²⁶Be deḡoda tauda tà riuna, banage, tauda mate banaga tà nairedina, baninama taudi matabudi ta noḡonoḡotina da Jon tauna peroveta.” ²⁷Vutuna aubainama taudi Yesu a paribee be a riuna, “Tauma nam ke kataiena.” Dabudine Yesu ya riuedina, “Naumeki, taugu mate nam ya riue mi da taugu aba waibadane uma yabedima ya voivoiedi.

Seda tautauḡomidima rabui wainasinama

²⁸“Uma wainasinama ya riue mi be nema ko noḡota bake? Tauḡoma tenaḡa be natunatunama rabui. Be tauna ya naḡo da natunama tautueḡinama ḡarone be ya riue na, ‘Taukui, manaka kwa naḡo dà sipie be kwa noyana.’ ²⁹Be natunama ya tuaḡai be ya riuna, ‘Taugu è kayo tuaḡaina.’ Be you, muriḡa nuanama ya vitara be ya naḡona sipie noya aubainama.

³⁰“Naumeki be tauḡoma ya naḡona natunama tautasinama ḡarone be riunama teneḡinama natunama ya riue na. Be dabudine natunama ya riuna, ‘Naumeki mamai, taugu ya naḡona.’ Be tauna nam i naḡona sipie.

³¹“Yodi aitu tamanama ya voteyete ye be na ḡoanama ya voie?” Be banaga Yesu a paribee be a riuna, “Gomana tautueḡinama.” Dabudine Yesu ya riuedina, “Taugu ya riuriu kauemina da teks tautamidima kaikaiyovudima, be toretore waiwaividima taudi tokare Mamaitua na waiguyaue ta saḡa dokana. Be taumi ibewa, ³²baninama Jon ya tava be tauna didimana kedanama yai kataimina, be taumi nam tauna koi sumaḡena. Be teks tautamidima kaikaiyovudima, be toretore waiwaividima taudi Jon ai sumaḡena. Be taumi uma kauinama koya kitana, be yaḡoro nam ami noḡotama ko vitaredi be koi sumaḡena.

Gureipi sipinama taurabenama wainasinama
(*Mk 12:1-12; Lk 20:9-19*)

³³“Be yodi wainasi ḡesaunama ya riue mi be ko vaiena. Sipi taupakinama tenaḡa gureipi sipinama ya voie be ya ganakukuna. Yodibe

waen anibuyonama domnama be kweyaḡa vadanama ya keridina. Yodibe gureipi sipinama tausipi ḡesaudima nimedie ya boru da a raberabe be tauna vaḡaie ya naḡona. ³⁴Raḡanine gureipi taminama na raḡanima ya tavatavana, tauna na taunoyama ya riupore nawedina sipi taurabenama ḡarodie, da tauna na sikerema sibo a paḡona.

³⁵“Be sipi taurabedima taudi taunoya a vunūḡidi, be tenaḡa a riḡa yabayababena, be ḡesau ai gurina, be ḡesau nama a rauyeku be ya gurina. ³⁶Naumeki da sipi taupakinama na taunoyama ḡesaudima rautoitoi ya riuporaḡana. Be sipi taurabedima inam kauinama teneḡinama nama ḡarodie a voiena. ³⁷Taunoya a vunuvunuḡa rovodina murine, tauna natuḡominama ya riupore nawena ḡarodie be ya riuna, ‘Taugu ya noḡonoḡotina da taudi yodi tokare natuguma ta vivirena!’

³⁸“Be raḡanine sipi taurabenama tauna a kitakitana, taudiḡa ai giu vivivira be a riuna, ‘Uma tauna sipi tokare ei buderiena. Vutuna aubainama t̄ai guri be inam buderinama tauda t̄ai buderiena.’ ³⁹Naumeki da taudi sipie be a vunūḡa dobiḡena ḡavoe, be dabudine ai gurina.

⁴⁰“Yodi nemanama? Sipi taupakinama e tavana raḡanine, tokare sipi taurabedima nema e bakedi?” ⁴¹Taudi Yesu a riuna, “Tauna inam banegidima gewegewedima tokare e kawa gewegewedi, be murine na sipima banaga ḡesaudima nimedie e boruna. Be gureipi taminama na raḡanie taudi tokare tauna na sikerema ta utena.”

⁴²Be Yesu taudi ya riuedina, “Taumi girugiruminama porane koya sievi bo ibewa? Inam umanama ya riuna,

‘Vada taukerinama yekue vada a kerikeri be yeku tenaḡa a porekaiyatina, baninama inam yekunama taudi nam ti ḡoena. Be Mamaitua yekunama poreporenama ya paḡo be ya voie da na vadama e kerikerina yasinama ya tubuḡana. Be inam kauinama Bada ya voiena tauda ḡarode anikitanama ya vere kauana.’

⁴³“Vutuna aubainama ya riuriuemina da Mamaitua na waiguyauma taumi ḡaromie tokare e kaipore, be banaga ḡesaudima e utedina. Be inam dabudine taudi tokare ta vota be Mamaitua na sikerema ta utena. ⁴⁴Be aita e beku be uma yekunama debane e ravusena, tauna tokare ei mia gorugoruna. Be yekunama aita debane e ravusena, tauna tokare ei mia mutumutuna.”^q

⁴⁵Dabudine piri adi babadama be Parisi Yesu na wainasima matabudi a vaivaiedina, taudi a kataiena da tauna taudi ya giugiuuedina. ⁴⁶Vutuna aubainama taudi keda a wanewanena da Yesu sibo a vunūḡina, be taudi banaga a nairedina, baninama banaga a noḡonoḡotina da Yesu inam peroveta.

^q 21.44 Yeku tauna Yesu. Be aita Yesu e tuaḡaiena, taunaḡa tokare e vunūḡa munaḡena, be guri murine Yesu tokare inam baneginama aruinama e doumutuna.

Waināgi soinama wainasinama
(Lk 14:16-24)

22 ¹Be Yesu wainasi ġesau ya riuedina, ²“Mamaitua na waiguyauma inam maika umanama:

Guyau tenaġa natunama tauġominama yawai naġina. Vutuna aubainama tauna soi ya vokaukauena. ³Be tauna na taunoyama ya riuporedina da banaga ya kokokokedina, vutudi sibo a riuedi da a verauna soie. Be inam banegidima taudi a tuaġaina. ⁴Naumeki da tauna na taunoyama ġesaudima rautoitoi ya riupore nawedi be ya riuna, ‘Ko naġo inam banegidima è kokokokedina ġarodie be umanama ko riuedina, “Ko verauna soie! Taugu kaite yau kani be yau musarama è vokaukauedi, be taumi yà raberabemina.”’ ⁵Be inam banegidima yaġoro taunoya bonedima a vaia tuaġaiedi, be taudi ai naġo teġateġana. Waria na sipie ya naġona, be waria na noyae ya naġona. ⁶Be ġesaudima taunoya a vunūġidi, a raukivi gewegewedi be ai guridina.

⁷“Vutuna aubainama guyau noponama yai ġora kua be na tauġarama ya riuporedina da inam banegidima taurau vunūġa tai guridi be adi meagaima mate ta gabu gorudina. ⁸Dabudine guyau na taunoyama ya riuedina, ‘Naġi soinama kaite e kawa nonoġi be e kenakenana. Be banaga è kokokokedina, taudi nam veredi da sibo a verau. ⁹Vutuna aubainama taumi ko naġo kedaġa be aitaūġa ko banabanavidina, ko riuedi be matabudi ta verauna soie.’

¹⁰“Naumeki da taunoya a naġo kedaġa be banaga aitaūġa a banabanavidina, veredi bo gewegewedi, matabudi a tavaitedi, be soi vadanama ya moġavu taritarina. ¹¹Be guyau vadae ya saġana, na warema kitedima aubainama. Be dabudine e kitana be banaga tenaġa nam naġi garedima i kotedina. ¹²Dabudine guyau inam baneginama ya riuenā, ‘Badam, tam nam naġi garedima ku kotedina, be nemanama da uma dabudine kuya saġa?’ Be tauġoma dabudine nam aiyaba i riuenā. ¹³Dabudine guyau na taunoyama ya riuedina, ‘Inam tauġominama nimanama, kaġanama ko panidi be ko pore dobiġena tadiwanawanae. Be dabudine e ġaba be gadigadinama e sanadididina.’

¹⁴“Ko kataie da Mamaitua banaga toitoi ya kokonedina be bisaġa ya vinedina.”

Tài teks bo ibewa?
(Mk 12:13-17; Lk 20:27-40)

¹⁵Dabudine Parisi a naġo da adi ogama a taraġina da tauna sibo giue Yesu ai sinasina be aiyaba sibo ya vato waigewana. ¹⁶Be Parisi adi tauwai muriwatanama be Herod na tauwai muriwatanama a riupore nawe tenaġedi, be Yesu ai taravirena, “Tauwai katakatai, tauma kè kataiena da

tam riukaue kwa giugiuna, be Mamaitua na ḡoanama riukaue kwawai katakataina. Be am giue tam nam banaga kuma nainairedina, avedi da banaga nema maika kitedima, tam nam kuma siesievidina. ¹⁷Kwa riuemai, tam nema kwa noḡonoḡota bake, tauma Sisa ḡarone kai teks bo avedi?”

¹⁸Dabudine Yesu taudi adi noḡotama gewegewedima ya kataiedi be ya riuna, “Taumi banaga kaikaiyovumima! Aba aubainama taumi ko rarau rubugu? ¹⁹Sirin teks aniwai maesinama ko verauḡe be yà kita.” Naumeki da Denari tenaḡa a paḡo verauḡe ḡarone ²⁰be Yesu taudi yai taraviredina, “Aitau noḡona be isanama Sirin bogane ta kenakena?” ²¹Be taudi a paribee be a riuna, “Uma Sisa noḡonama.” Be Yesu ya riuedina, “Naumeki da Sisa ḡaronama Sisa ko utena, be Mamaitua ḡaronama naumeki da Mamaitua ko utena!”

²²Raḡanine nama giunama a vaivaiena, taudi Yesu a base be a naḡona.

Gurie be midisuḡu munaḡa waitaraviranama
(*Mk 12:18-27; Lk 20:27-40*)

²³Sadisi taudi a riuriuna da banaga e guri be nam e midisuḡu munaḡa. Inam raḡaninama teneḡine taudi vutudi Yesu ḡarone a tava da ai taravire ²⁴be a riuna, “Tauwai katakatai, Mosis umanama ya riuna, ‘Deḡoda tauḡoma yai naḡi be nam seda i tikedi da ya gurina, be na visarama ya gosena, naumeki da tasinama bo tuaḡanama inam kaiyababinama e naḡi be seda ei tubuḡidina tuaḡanama gurigurinama aubainama.’

²⁵“Tauma ḡaromaie tautauḡoma 7 a tubuḡana tina tenaḡa ḡarone, be tauḡoma tautuaḡa waivi ya naḡi da nam ti natunatuna, be tauḡominama ya gurina be tasinama tuaḡanama kaiyababinama ya naḡina. ²⁶Be tauna mate seda nam i tikedi be ya gurina. Be kauinama teneḡinama tauḡoma wairabuiteḡanama ḡarone ya tubuḡana. Namaḡa da tauḡoma aniwai 7-nama ḡarone ya dobina. Be inam tauḡominama mate nam i natunatuna be ya gurina. ²⁷Naumeki da inam tautauḡomidima a gurigurina damone inam waivinama ya guri ḡavutana. ²⁸Yodi nemanama? Midisuḡu munaḡa na raḡanie uma waivinama tautauḡoma 7 a naḡinaḡina, tauna tokare aitau na waivi?”

²⁹Yesu ya paribeedi be ya riuna, “Taumi koya giu waigewana, baninama taumi girugiruminama porane nam ko katai kauena, be Mamaitua na rewapanama mate nam ko kataiena. ³⁰Midisuḡu munaḡa raḡanine, banaga taudi tokare anea maika ta tubuḡana marae, be tokare nam tai naḡi. ³¹Be guri ta midisuḡu munaḡana na waikatakataima taumi koya sievi bo ibewa? Mamaitua boni umanama ya riuna, ³²‘Taugu inam Eibraham, Aisik be Jeikob adi Mamaituama.’ Mamaitua, nam banaga guriguridima adi Mamaitua, ibewa da tauna banaga yawayawasanidima adi Mamaituama.”

³³Patara umanama giudima a vaivaiena, taudi Yesu na waikatakataima a base kauena.

Riuvavasaga dosinama
(Mk 12:28-34; Lk 10:25-28)

³⁴Inam raḡanine Parisi ta vaiena be Yesu Sadisi adi giuma matabudi ya gududina, vutuna aubainama Parisi a rawateḡeidina. ³⁵Be adi badama, tarawatu tauwai katakatainama tenaḡa Yesu ya raurubu be ya riuenta, ³⁶“Tauwai katakatai, tarawatu nopone, deḡo riuvavasaginama ya saḡa vavasaga?”

³⁷Be Yesu ya paribeena, ‘Bada am Mamaituama nuanuamma e paḡona, nuanuamma tabutabune, aruimma tabutabune be am noḡotama tabutabune.’ ³⁸Inam riuvavasaginama ya saḡa guratana, be tauna e dokadokana. ³⁹Be aniwai rabuinama inam nama kitanama, ‘Turamma nuanuamma e paḡona, nema tam kwawai nuapaḡo munaḡemna nama.’ ⁴⁰Tarawatu be peroveta adi waikatakataima matabudi inam riuvavasagidima rabui nopodie ta kenakenana.”

Keriso tauna aitau natuna?
(Mk 12:35-37; Lk 20:41-44)

⁴¹Be Parisi ai rawateḡeidi da a miamia be Yesu yai taraviredina, ⁴²“Taumi Keriso nema ko noḡonoḡota bake, tauna aitau natuna?” Be taudi a paribee be a riuna, “Tauna guyau Deivid natunama.”

⁴³Be Yesu ya riuedina, “Be nemanama da Arua Babau guyau Deivid nopone ya yovo be tauna umanama ya riuna,

⁴⁴‘Mamaitua yau Badama ya riuenta, Kasague kwa miana, naumeki da taugu am ḡaviama kaḡamma dibudie ya biridina.’

⁴⁵Guyau Deivid Keriso ḡarone ya riuna, ‘Yau Badama!’ Be yodi nemanama da Keriso tauna guyau Deivid natuna?”

⁴⁶Inam dabudine nam aitau Bada na giuma i paribeena. Inam raḡanine be nokoi ya naḡona nam aitau Yesu waitaravira munaḡenama i ḡoena, baninama taudi a nairana.

Tauwai katakatai kaikaiyovudima nam koi muriwatanedi

23 ¹Dabudine Yesu tauna na tauwai muriwatanama be patara ya riuedina, ²“Tarawatu tauwai katakataidima be Parisi taudi Mosis gabunama a paḡo be banaga tawai katakataidina. ³Vutuna aubainama taumi yaba matabuna ta riuriuemina, naumeki da ko voteyeteyedina. Be adi yawasanama nam i verena aubainama, nam koi muriwatanedi. Taudi ta riuemi da taumi yaba ko voivoiedina, be taudi ḡomidima inam yabedima ta giugiuiedina nam tima voivoiedina. ⁴Taudi tarawatu tabu be tabu bagibagidima ta voidi, be banaga ta

segesegeridina da tarawatu tai muriwatanedina, be banaga inam tarawatudima waimuriwatanedima ta voivoia reregedina, be taudi nimediga a tikedi be ta miamiana.

5“Taudi adi voima matabudi ta voivoiedina da banaga kabe ta kitedi be ta basedina. Taudi Mamaitua riunama pepae ta girumidi be noḡodie be nimedie ta panipanidina, be gara rarauperoperodima ta kotekotedina. Be gara peroperodima tawai dau guratedina da kabe banaga ta kitedi be ta basedi. 6Soi raḡanine taudi guni poune mieninama ta ḡoḡoedina, be taparoro raḡandie taudi gabu verediḡa ta vinevinedina. 7Taudi adi ḡoana kauama da banaga aniwai boru gabudie taudi ḡarodie ta verau, be kawasaḡe na waikaiwe tai kaiwedi be ta riuna, ‘O bada dosimma.’

8“Be taumi ko kita da nam aitau ḡaromie e riuna, ‘Bada dosimma’, avedi. Baninama taumi inam ami badama dosinama tenaḡa, be taumi matabumi inam tauna tasitasinama. 9Be doḡue nam aitau ḡarone ko riuna, ‘Mamai’, avedi. Baninama taumi tamemima tenaḡa, tauna vutuna marae e miamiana. 10Be taumi ko kita da nam aitau ḡaromie e riuna, ‘Tauwai katakatai’, avedi. Baninama taumi inam ami tauwai katakataima tenaḡa, tauna vutuna Keriso. 11Aitau da nopomie ya saḡa guratana, naumeki da tauna aubaimima ei taunoyana. 12Be aitau da e kawakawa saḡe munaḡena, Mamaitua tokare tauna e boru doḡiḡena. Be aitau da e boruboru doḡiḡa munaḡena, Mamaitua tokare tauna e kawa saḡena.

Banaga kaikaiyovumima ko kita kauana

(Lk 11:38-52)

13“Taumi tarawatu tauwai katakataidima be Parisi taumi banaga kaikaiyovumima. Gewagewa vavasaginama tokare ko banavina. Baninama banaga Mamaitua na waiguyauma nopone saḡanama ta ḡoḡoena be taumi adi kedama ko guduguduna. Be mate tokare nam Mamaitua na waiguyauma nopone ko saḡa. Be mate banaga Mamaitua na waiguyauma nopone saḡanama aubainama ta rarau rubuna, be taumi adi kedama ko guduguduna. 14(-)ʳ

15“Taumi tarawatu tauwai katakataidima be Parisi taumi banaga kaikaiyovumima. Gewagewa vavasaginama tokare ko banavina. Baninama taumi doḡu ko naḡo popoe be banaga ko voiedi da tawai muriwatanemi be kowai katakataidina. Be inam kedane taumi inam banegidima ko voiedi da taudi giena natunatudima ta tubutubuḡana

ʳ 23.13 Gurik baibol bisaḡa nopodie vers 14 e kenakenana. Vers 14 inam umanama: Taumi tarawatu tauwai katakataidima be Parisi ko kita kauana. Taumi banaga kaikaiyovumima. Taumi kaiyababa waikaruwaḡewaḡedima adi vadama, be adi purapurama ko kwayekwayedina, be moiragi daudaudima kaikaiyovudima ko voivoiedina. Vutuna aubainama taumi tokare kovoga dosinama ko banavina.

maika taumi. Be mate ko voiedi da adi kaiyovuma tawai moraba kauena, nam maika taumi. Vutuna aubainama taumi inam giena na banima.

¹⁶“Taumi tauwai dokadoka matapotepotemima, taumi gewagewa vavasāginama tokare ko banavina. Baninama taumi ko riuriuna, ‘Deḡoda aitu tempol isane e sauga wapana, inam saugawapanama nam bani boruboruna. Be deḡoda tempol nopone gold isane e sauga wapana, naumeki da inam saugawapanama nam kwai kati kotovi.’ ¹⁷Taumi matapotepotemi, be buebuemima! Deḡo tauna yaba dosina, Gold bo tempol? Tempol tauna vutuna gold e kawakawa babauna. ¹⁸Be mate ko riuriuna, ‘Deḡoda aitu olta isane e sauga wapana, inam saugawapanama nam bani boruboruna. Be deḡoda puyo olta debane e kenakenana, be inam puyonama isane e sauga wapana, naumeki da inam saugawapanama nam kwai kati kotovi.’ ¹⁹Taumi matapotepotemima. Deḡo tauna yaba dosina, puyo bo olta? Olta tauna vutuna puyo e kawakawa babauna. ²⁰Vutuna aubainama aitu da olta isane e sauga wapana, naumeki da tauna yaba matabuna olta debane mate isedie e sausauga wapana. ²¹Be aitu da tempol isane e sauga wapana, tauna inam tempol isane be aitu da tempol nopone e miamiana mate isane e sausauga wapana. ²²Be aitu da mara isane e sauga wapana, naumeki da tauna Mamaitua na kaba mima be Mamaitua ḡominama mate isane e sausauga wapana.

²³“Taumi tarawatu tauwai katakataidima be Parisi taumi banaga kaikaiyovumima. Tokare gewagewa vavasāginama ko banavina. Baninama taumi kani anitai dinidima yabedima koi rawadamdamdi da matabudi 10 be dam tenaḡa Mamaitua ko uteutena. Inam kaua ḡaubonama. Be kaua dosidima tarawatue ta kenakenana inam didimana, raunuato i be waipatutu taumi nam koma voivoiedina. Inam ya gewagewa kaua. Taumi noḡone kaua dosidima sibo koya voivoiedina, muriḡa da kaua ḡauḡaubodima sibo koya voivoiedina. ²⁴Taumi tauwai dokadoka matapotepotemima. Taumi kaua ḡauḡaubodima ko kitakita yaḡeyaḡedina, be kaua dosidima ko vava gudegudedina.^s

²⁵“Taumi tarawatu tauwai katakataidima be Parisi taumi banaga kaikaiyovumima. Gewagewa vavasāginama tokare ko banavina. Baninama taumi keyaka be tebo tauridima ko koḡekoḡedina, be nopomima danene be kanitoku ya moḡavuna, inam vutudi mira. ²⁶Taumi Parisi matapotepotemima. Taumi noḡone keyaka be tebo nopodima ko koḡa dokedina, yodibe tauridima mate tokare ta verena.

²⁷“Taumi tarawatu tauwai katakataidima be Parisi taumi banaga kaikaiyovumima. Gewagewa vavasāginama tokare ko banavina. Baninama

^s 23.24 Gurik baibol nopone umanama ya riuna: Taumi inam maika banaga nabugara ḡaubonama na kapue ya kenakenana, ya kita be ya kaiporena. Be na kapuma nopone kamel nam i kita be mate ya teḡo be ya tonogina.

taumi kokoaga waiwaisianama maika. Kokoaga debanama kitanama ya vere kauana, be noponama turigā be mira ya moḡavuna. ²⁸ Be taumi ami yawasanama inam kokoaga maika. Banaga ta kitekitemina da taumi kabe didimana banegimi, be nopomima inam kaiyovu be gewagewa ya moḡavuna.

²⁹ “Taumi tarawatu tauwai katakataidima be Parisi taumi banaga kaikaiyovumima. Gewagewa vavasaginama tokare ko banavina. Baninama taumi peroveta be didimana banegidima kokoagidima koi sia yaḡeyaḡedi, ³⁰ be ko riuriuna, ‘Deḡoda tauda waḡawaḡadama adi raḡanie sibo tè miana, tauda tokare nam te sagudi be peroveta tei guridi.’

³¹ Inam giudie kowai maḡatara munaḡemina da taumi vutuna peroveta tauvunuḡidima natunatudima. ³² Be taumi ami dosima gewagewa a voivoia gosena, tokare taumi ko kaiḡavutidina. ³³ Taumi mota, sarama natunatudima! Taumi tokare riukaua da ko naḡona gienae, be nam tokare koi moisiriri be teneteneḡina. ³⁴ Vutuna aubainama taugu yodi uma yà riuemina da peroveta, nuauyauya banegidima be tauwai katakatai yà riuriuporedina ḡaromie. Be ḡesaudima taumi tokare koi guridi, be ḡesaudima ko tuparatudi, be ḡesaudima ami sinagogma nopodie kwapue ko riḡedi, be ḡesaudima koi tarapiriedi be ko tavu waibabaridina meagai da meagai nopodiḡa. ³⁵ Vutuna aubainama aitauga banaga veredima a vunuvunuḡidina adi kovoḡama taumi tokare ko paḡona. Boni pakane da yodi, didimana banegidima a vunuḡidi be kosinidima a darorona. Inam Eibol na parate ya naḡo da Berekaia natunama Sakaraias ḡarone ya tavana. Sakaraias tauna olta be tempol poudie koya vunuḡina. Inam banegidima matabudi ami dosima a vunuvunuḡidina mate kosinidima taumi nimemie ta kenakenana. Vutuna aubainama taumi tokare kovoḡa ko paḡona. ³⁶ Yà riuriu kauemina, da uma kaidima matabudi taumi kintimima ḡaromie ta tubuḡana.

Yesu Jerusalem yai nuaboyena

(Lk 13:34-35)

³⁷ “O Jerusalem, Jerusalem! Taumi peroveta kowai guridina. Mamaitua banaga e riuriuporaḡana ḡaromie, be taumi ko rarau yekudina! Raḡan ya toi kauana taugu è raurubu da sibo è rawateḡeimina, kamkam natunatunama mapenama dibune e rawarawa teḡeidina maika, be taumi koya tuaḡaina. ³⁸ Vutuna aubainama Mamaitua ami tempolma tokare e gose be e kena yababana. ³⁹ Be yodi yà riuriuemina da taumi nam ko kita munaḡegu, naumeki da tokare raḡan e tavana, dabudine taumi umanama ko riuna, “Tam vutuna Bada isane kwa veraverauna, isamma ka kaisuḡusuḡuna.””

Raḡan damonama matairidima

(Mk 13:1-23; Lk 21:5-12, 16-23)

24 ¹ Yesu tempol ya gose da ya naḡonaḡo be na tauwai muriwatanama ḡarone a tavana. Dabudine taudi tempol a

kita virevire, Yesu ai katai be a basebasena. ²Be dabudine Yesu taudi ya riuedina, “Yà riuriu kauemina da uma yabedima matabudi yodi ko kitekitedina, tokare nam nama ta kena nonoġa ibewa, be matabudi tokare ta rawadabu ririġidina.”

³Yesu oya Olip debane ya miamia be na tauwai muriwatanama taudiġa Yesu ġarone a tava da ai taravire, be a riuna, “Kwa riuemai, uma kaudima aba raġanine ta tubuġa? Be abaġa matairidima ta tubuġa da ka kitedi be ka kataie da raġan damonama kaiteka maida, be mate nema ka katai bake da tam am kaba verauma raġaninama e tavatava?”

⁴Be Yesu ya riuna, “Koi kita kua da nam aitu ei kedadoka waigewemi. ⁵Baninama banaga toitoi tokare isague ta tava be ta riuna, ‘Taugu vutuna Kerisol!’ Be taudi tokare banaga toitoi tai kedadoka waigewedina. ⁶Be raġanine iġara maida guguridima ko vaie bo madanie varidima ko vaiedina, nam ko naira! Uma kaudima nama tokare ta tubuġana, be inam nam raġan damona, ibewa! ⁷Dobu da dobu tai kawa ġasiġasina, be waiguyau turanama waiguyau mate tai kawa ġasiġasina. Be dobu toitoi nopodie meġara be yoyo tai verautatena. ⁸Inam kaudima maika kaipakara gomana kaevounama e tepetepena tunimuyanama maika, inam tepa pakanama.

⁹“Inam raġanine taumi tokare ta panimi be babada nimedie ta biri nawemi da taudi ta raukivi gewegewemi be tai gurimina. Be taumi taugu kowai sumaġeguna aubainama, banaga dobu matabuna tokare ta tuaġaiemina. ¹⁰Inam raġanine banaga toitoi adi waisumaġama ta gosedi be adi banagama adi banagama ta tuaġaiedi be tai kawa biri dobiġana, ¹¹be peroveta kaikaiyovudima toitoi inam raġanine ta maġatara, be banaga toitoi tai kedadoka waigewedina. ¹²Be gewagewa e moraba, be banaga toitoi adi wainuapaġoma tokare ei kavena. ¹³Be aitauġa adi waisumaġe ta midi bagibagi be ta raudamoena, taudi tokare ta yawasanana. ¹⁴Be Mamaitua na waiguyauma varinama verenama tokare dobue banaga matabudi ġarodie ta rauguguya nawe da banaga ta vaie, muriġa da raġan damonama e tavana.

¹⁵“Taumi tausiava, uma giunama baninama ko katai kauena, Peroveta Daniel ya riuna da tokare ko kitana gewagewa waimatawarawara vavasaiġinama deġo nam sibo ya midi, be tokare e midina. Inam kauinama e tubuġana raġanine, ¹⁶taudi aitauġa Judiamo miemienidima naumeki da naira oyae sibo a naġona. ¹⁷Inam raġanine, aitu da na wagapatae^t e miamiana, nam vadama nopone e saġa be na purapurama e ragaudi. ¹⁸Be nam aitu sipie be na garama ragaudima aubaidima e munaġa vadae. ¹⁹Inam raġandie waiwaivi bogebogedima be waitatau

^t 24.17 Jius banegidima adi vadama debanama inam ‘wagapata’ maika tabatabanama. Dabudine adi kaba waimiamiana.

vaudima, taudi tokare piripiri dosidima ta banavidina. ²⁰ Be Mamaitua ḡarone ko moiragi da inam raḡandima, nam bodubodu^u bo Sabat raḡandie ta tubuḡa, baninama taumi tokare nema naira ko naḡo bako? ²¹ Baninama nuaboya inam raḡandie e gewagewa vavasagana tokare ta tubuḡana. Mamaitua dobu yawai tubuḡie da yodi, nam airaḡan uma piripiridima ti tubuḡa rubuna naumeki da yodi. Be uma piripiridima murine nam airaḡan e tubuḡa munaḡa. ²² Be deḡoda Mamaitua inam piripiri raḡandima tai tupodima ibewa, nam aitau tenaḡa tokare ya yawasana. Be na banagama vinevinedima kadi taiye, tauna uma raḡandima tokare e taitupodina. ²³ Be inam raḡandie deḡoda aitau e riuemina, ‘Keriso umanema!’ bo e riuna, ‘Keriso noanema!’ Inam baneginama nam koi sumaḡe! ²⁴ Baninama Keriso kaikaiyovudima, be peroveta kaikaiyovudima tokare ta maḡatara be mataira be anibasa kauidima ta voiedina, be ta raurubu da Mamaitua na vinevinema banegidima mate sibo ai kedadoka waigewedina. ²⁵ Vutuna aubainama ko kita kauana, yaba matabuna kaite è riu wainonoḡimina, muriḡa da inam raḡandima ta tavana.

²⁶ “Vutuna aubainama deḡoda aitau e riuemina, ‘Noanema Keriso, dobu kavakavane.’ Nam ko dobi ko naḡo! Bo deḡoda e riuemina, ‘Keriso umanema vadae.’ Nam koi sumaḡe! ²⁷ Baninama Banaga Natunama na raḡanima ei raḡantenage be keyama maika e kidi, be gunuma matabuna e yana porena. ²⁸ Deḡo musara gurinama e kenakenana, dabudine naboduba’ ta rawarawa teḡeidina.

(Mk 13:24-27; Lk 21:25-27)

²⁹ “Be inam piripiridima raḡandima muridie,
suara ei kupi, be nawaravi tokare nam e yana munaḡa.
Be gunuma rewapanidima matabudi e gusu waidaberaridi be kipora
gunume ta kuruvana.

³⁰ Inam raḡanine noḡone Banaga Natunama tokare gunume e maḡatara, da banaga ta kita be ta kataie da inam Banaga Natunama e yovoyovona. Be dobue banaga matabudi tai sosori be ta ḡabana. Be tokare taudi Banaga Natunama rewapana be neneḡara dosinama mate giyou nopone be e yovoyovona ta kitana. ³¹ Dabudine bogigi dosinama e riuriuna raḡanine, tauna na aneama e riuporedi da na banagama vinevinedima matabudi dobu isune da isune, be gunuma isune da isune, da ta rawateḡeteḡeidina.

^u 24.20 Gurik baibol nopone nam ‘bodubodu’ ima kenakenana. Be ‘winter’ e kenakenana, inam nam maika bodubodu, be inam tururu ya moraba kauana, tokare teneteneḡinama ei gurimna. ^v 24.28 ‘Naboduba’ inam maika kiu isanama ‘vulture’. Taudi musara deḡo e gurina, waigapa dabudi ta tavana. Be matabudi a kataiena da musara deḡo dabudi e kenakenana.

Bada na kaba verauma raġanima nam aítau i kataiena
(*Mk 13:28-37; Lk 21:29-33*)

³²“Naumeki da damaya kainama ko kita be ġarone ko kataina. Raġanine damaya ragedima ta kini, be rugudima ta gidagidavana, inam raġanine ko kataie da inam bodubodu raġaninama maida e tavatavana. ³³Inam kauinama teneġinama nama, raġanine taumi inam kaudima gewegewedima ta tubutubuġana ko kitedina, dabudine taumi ko kataie da Bada na kaba verauma raġaninama kaiteka maida. ³⁴Taugu yà riuriu kauemina, da uma kintinama nam ei kave, naumeki da inam kaudima tokare matabudi ta tubuġa dokana. ³⁵Mara be dobu tokare ta samoana, be taugu riuguma nam airaġan e samoa. ³⁶Nam aítau tenaġa raġan i kataiena da airaġan inam raġaninama e tava. Nam anea marae, Mamaitua Natunama mate nam i kataiena, be Tamanama marae taunaġa ya kataiena.

(*Lk 17:26-35*)

³⁷“Banaga Natunama na raġanima maika Noa na raġanie yawasana a tubutubuġana maika. ³⁸Muriġa da kabaita ya tubuġana, banaga a kanikani, a tegotego, ai naġi be awai naġidina. Nama a voivoia be Noa waga ak nopone ya saġana. ³⁹Be banaga tokare aba ġarodie e tubuġana, taudi nam ti kataiena. Naumeki da kabaita ya tubutubuġana, taudi matabudi ya karuedi be upa nopone a tonedina. Inam kauinama nama tokare Banaga Natunama na kaba veraue e tubuġana. ⁴⁰Inam raġanine tautauġoma rabui ta sipisipi be tenaġa tokare anea ta nawena, be tenaġa ta gosena. ⁴¹Be waiwaivi rabui kani ta rarau suvi, be tenaġa tokare anea ta nawena, be tenaġa ta gosena.

(*Lk 12:39-40*)

⁴²“Vutuna aubainama raġan matabuna koi neneġanana, baninama ami Badama na kaba verauma raġanima nam ko kataiena. ⁴³Uma ko noġoti, deġoda vada taupakinama sibo taudanedanene na kaba tavama raġaninama i kataiena, naumeki da tauna tokare na gaburama ya bodame, be baneginama nam na vadae ya saġa be ya danene. ⁴⁴Vutuna aubainama taumi mate ko vokaukaua be ko miamia, baninama Banaga Natunama na kaba verauma, taumi tokare ko miamia nuababaġa be e tavana.

(*Lk 12:41-46*)

⁴⁵“Ai taunoya tauna waisumeġina be nuanuauyayana, da Bada sibo tauna ya vine? Inam taunoyanama na banagama e rabedi be adi kanima e soiedina, taudi ta ġoeġoena raġanine.

46“Raḡanine na Badama e tava munaḡa be e kitana da na taunoyama na noyama e voivoiena, naumeki da nuavere dosinama inam taunoyanama ḡarone. 47Yà riuriu kauemina da Bada na purapurama matabudi tokare inam taunoyanama e ute, be tauna ei badedina. 48Be taunoya deḡoda e gewagewa be e riuna, ‘Bada bonideḡo ya naḡo be e miamia watanana.’ 49Be dabudine tauna na banagama e riḡedi be tegobua banegidima mate ta kanikani, ta tegotego buana. 50Nama e voivoia nuababaḡa be na badama e tavana. 51Inam raḡanine Bada inam taunoya gewagewanama e dourakaraka be banaga kaikaiyovudima adi gabue e boru nawena. Be dabudine tokare ta yakei be gadigadidima ta sanadidi watanedina.

Matatapu 10 wainasidima

25 ¹“Inam raḡanine tokare mara na waiguyauma inam maika umanama:

Matatapu matabudi 10 adi rampama a ragaudi be a dobi da naḡivau tauḡominama verau bodebodenama a naḡona. ²Matatapu 5 buebuedima be 5 nuanuauyeuedima. ³Matatapu buebuedima adi rampama a ragaudina be karesin nam ti ragauna. ⁴Be nuanuauyeuedima taudi rampa be karesin ḡesaudima mate a ragaudina. ⁵Be naḡivau tauḡominama nam i tava makaina, vutuna aubainama taudi matedima a yado da a kenana.

⁶“Naumeki da kupi poune be banaga a yogo be a riuna, ‘Naḡivau tauḡominama kaiteka e tavana! Ko dobi be ko verau beena.’ ⁷Dabudine matatapu matabudi a midisuḡu be adi rampama a vokaukauedina. ⁸Be matatapu buebuedima adi banagama nuanuauyeuedima a riuedina, ‘Karesin ko utemai, ama rampama ta gurigurina.’ ⁹Be taudi a paribeedi be a riuna, ‘Ibewa, karesin nam ruvana da taumi mate tà soie be teneteneḡina. Taumi ko naḡo da aitaḡa karesin ta rarau gimaredina taudi ḡarodie, be mabimie ami karesinma ko gimarana.’

¹⁰“Naumeki da taudi karesin gimerinama aubainama keda a naḡonaḡona maika, muridie naḡivau tauḡominama ya tavana. Be matatapu aitaḡa kaite a vovo kaukauana, taudi naḡivau tauḡominama mate vada nopone wainaḡi soine a saḡa, be matakeda ya guduna. ¹¹Be matatapu buebuedima taudi muriḡa a tava be a riuna, ‘Bada, Bada, matakeda kwa kaipore aubaimaima!’ ¹²Dabudine Bada ya paribeedi be ya riuna, ‘Yà riuriu kauemina da taugu taumi nam e kataiemina.’

¹³“Vutuna aubainama taumi raḡan matabuna koi neneḡanana, baninama Banaga Natunama na kaba verauma raḡaninama be na awama taumi nam ko kataiena.

Taunoya sibo ai patutu be noya verenama a voiena Bada aubainama

¹⁴“Be mate mara na waiguyauma inam maika umanama:

Banaga tenaḡa muriḡa da sibo vaḡai aubainama ya naḡona, be noḡone tauna na taunoyama ya riuedina da tauna na manema ta rabedina. ¹⁵Naumeki da na taunoyama adi noyama ruvane nama mane ya utedina. Taunoya tenaḡa 5 tausand Kina ya utena, be ḡesaunama 2 tausand Kina ya utena, be ḡesaunama 1 tausand Kina ya utena. Yodibe tauna ya naḡona vaḡai aubainama. ¹⁶Be taunoya aitau da 5 tausand ya paḡopaḡona, tauna ya naḡo da manenama ya noye da yai morebi be 5 tausand ḡesau ya paḡona. ¹⁷Be nama taunoya aitau da 2 tausand ya paḡopaḡona, tauna mate manenama ya noye da yai morebi be 2 tausand ḡesau ya paḡona. ¹⁸Be taunoya aitau da 1 tausand ya paḡopaḡona, tauna ya naḡo da dom ya keru be na badama na manema dome ya semona.

¹⁹“Taunoya adi badama ya mia gurata da tokare deḡo, be ya tava munaḡana. Be na taunoyama ya rawateḡeidina, baninama ya ḡoeḡoena da sibo ya kataiena, da na taunoyama tauna na manema ai morebidi bo ibewa. ²⁰Dabudine taunoya aitau da 5 tausand Kina paḡopaḡonama, tauna ya tavana 5 tausand ḡesaunama mate be ya riuna, ‘Bada, taugu 5 tausand Kina kuya uteguna, be yodi kwa kita 5 tausand Kina ḡesaunama mate è tavaitena.’ ²¹Dabudine Bada ya riuna, ‘O, tam taunoya veremma! Taugu yaba ḡaubonama è utemna be tam kuyai patutu be kuya noye da ya morabana. Vutuna aubainama taugu tam tokare yaba toitoi yà utem, be kwai badedina. Naumeki da yodi kwa verau be taugu mate tòi nuaverena.’

²²“Dabudine taunoya aitau da 2 tausand Kina paḡopaḡonama tauna ya tava be ya riuna, ‘Bada, taugu 2 tausand Kina kuya uteguna, be yodi kwa kita 2 tausand Kina ḡesaunama mate è tavaitena.’ ²³Dabudine Bada ya riuna, ‘O, tam taunoya veremma! Taugu yaba ḡaubonama è utemna be tam kuyai patutu be kuya noye da ya morabana. Vutuna aubainama taugu tam tokare yaba toitoi yà utem be kwai badedina. Naumeki da yodi kwa verau be taugu mate tòi nuaverena.’

²⁴“Dabudine taunoya aitau da 1 tausand Kina paḡopaḡonama tauna ya tava be ya riuna, ‘Bada, taugu è kataiena da tam banaga medimedimma. Tam nam pesi ku kumedina be kwa ragaragau yababedina. Tam nam ku sipina be kwa rarau yaba yababana. ²⁵Vutuna aubainama taugu tam è nairemna aubainama dom è keru, be am manema dome è semona. Yodi kuya kita umanema am manema ya uteute munaḡemna.’ ²⁶Dabudine Bada ya riuna, ‘Tam taunoya gewagewamma, matagayagayawimma. Tam kuya kataiena da taugu nam pesi è kumedina be yà ragaragau yababedina, be taugu nam e sipina be yà rarau yaba yababana. ²⁷Inam naumeki, tam yau manema banike sibo kuya boru be ya noyana. Be taugu è tavana raḡanine debane anitai potonama mate sibo è paḡona.

²⁸“Inam taunoyanama gewagewanama ḡarone mane ko paḡo, be taunoya 10 tausand Kina ya voivoiena, tauna ko utena. ²⁹Baninama aitau

da na noyae ei patutu be e voivoia kauena, tauna tokare yaba ḡesaudima mate debane yà taipoto be yà utena. Be aitu na noyama e voivoia waigewagewana, avedi da tauna yaba ḡaubonama ḡarone e kenakenana, be yaḡoro taugu tokare ḡarone yà kaiporena. ³⁰Be inam taunoyanama matagayagayawinama ko pore dobiḡe tadiwanawanae, be dabudine e yakei be gadigadinama e sanadididina.’

Mara etara raḡaninama

³¹“Banaga Natunama tokare na kaba waiguyauma boruborumine e mia be ma neneḡarina na aneama matabudi mate marae be ta yovona. ³²Be banaga dobu matabuna tauna noḡone ta rawateḡeidi be tauna e dariḡedina, maika tauyosi sipu be gote e daridariḡedina nama. ³³Tauna sipu kasaunama yauwane e biridina, be gote seninama yauwane e biridina.

³⁴“Dabudine guyau banaga kasaunama yauwane tokare e riuedina, ‘Taumi aitaḡa Tamaguma yawai aiainimina, ko verau be ami buderima ko paḡona. Baninama Tamaguma muriḡa da dobu ya voiena, noḡone tauna aubaimima mara waiguyaunama ya vokaukaue be ya kenakenana, vutuna yodi koi buderiena. ³⁵Baninama kani ya karakaraguna raḡanine, taumi kani koya utegu be è kanikanina. Be nuaguma ya rarau kasakasana raḡanine, taumi upa koya utegu be è tegotegona. Be taugu è vaḡavavaḡaina raḡanine, taumi koya riuegu da ami vadae è saḡasaḡana. ³⁶Be gara èwai karuwaḡewaḡena raḡanine, taumi koyawai garaguna. Be taugu è sidasidana raḡanine, taumi koya raberabe kaueguna. Taugu dibure è miamiana raḡanine, taumi koya vava kitakitaguna.’

³⁷“Inam raḡanine didimana banegidima tauna ta paribee be ta riuna, ‘Bada, airaḡan kani ya karakaratom be tauma kani kè utem? Be airaḡan nuamma ya rarau kasakasa be tauma upa kè utem? ³⁸Be airaḡan tauma kè riuem da vadae kuya saḡa? Bo airaḡan gara kuyawai karuwaḡewaḡe be tauma gara kè utem? ³⁹Be airaḡan tam kuya sida bo dibure kuya miamia, be tauma kè vava kitakitam?’ ⁴⁰Dabudine guyau taudi ya paribeedi be ya riuna, ‘Yà riuriu kauemina, da aitu tenaḡa turaguma ḡaubonama ḡarone vere kuya voiena, inam taugu ḡarogue kuya voiena.’

⁴¹“Dabudine guyau banaga seninama yauwane tokare umanama e riuedina, ‘Ko naḡo ḡavoe, taumi Mamaitua yai tara tautauemina tokare kai karakarata nonoḡinama nopone ko naḡona. Inam gabunama Mamaitua ya vovo kaukauena, Diaboro be na aneama mate aubaidima. Be taumi mate inam dabudi ko naḡona. ⁴²Baninama taugu kani ya karakaraguna raḡanine, taumi nam kani ko uteguna. Be nuaguma ya rarau kasakasana raḡanine, taumi nam upa ko uteguna. ⁴³Be taugu è vaḡavavaḡaina raḡanine, taumi nam ko riuegu da ami vadae è saḡana. Be taugu gara èwai karuwaḡewaḡena raḡanine, taumi nam koi garaguna.

Be taugu è sidasida bo dibure è miamiana raḡandie, taumi nam ko vakitakitaguna.’

⁴⁴“Inam raḡanine taudi mate ta paribee be ta riuna, ‘Bada, airaḡan kani ya karakaritim, be nuamma ya rarau kasakasa, bo kuya vaḡavaḡai, bo gara kuyawai karuwaḡewaḡe, bo kuya sida bo dibure kuya miamia, be tauma nam ke sagum?’ ⁴⁵Dabudine guyau taudi tokare e paribeedi be e riuna, ‘Yà riuriu kauemina, da aitau tenaḡa turaguma ḡaubonama ḡarone nam vere ko voiena, inam taugu mate ḡarogue nam ko voiena.’ ⁴⁶Inam raḡanine taudi tokare ta naḡona kovoga kenakena nonoḡine, be didimana banegidima tokare ta naḡona yawasana kenakena nonoḡine.”

Yesu kana kasirama a tomtomna

(Mk 14:1-2; Lk 22:1-2)

26 ¹Yesu na giuma ya kovikovina murine, tauna na tauwai muriwatanama ya riuedina, ²“Taumi koya kataiena da yodi raḡan rabui ta kenakenana, da Naḡopore soinama e tavana, be Banaga Natunama banaga nimedie ta boru nawe be ta tuparatuna.”

³Dabudine piri adi babadama be babada ḡesaudima mate, taudi piri adi badama isanama Kaiyapas na vadae a rawategeidina. ⁴Be taudi Yesu kana kasirama a tomtomna da waimoisirie deḡo sibo a vunuḡi be ai gurina. ⁵Be taudi a riuna da uma kauinama nam soi nopone sibo ya tubuḡa, baninama deḡoda iḡara e nuasarina.

Waivi upa ḡabuḡabunama Yesu debane ya ḡinina

(Mk 14:3-9; Lk 7:37-38; Jn 12:1-8)

⁶Yesu tauna Betenima, tauḡoma Saemon awai isana Kito, tauna na vadae Yesu ya miamiana. ⁷Dabudine Yesu ya kanikani be waivi upa ḡabuḡabunama maesinama dosinama duginama^w ya kiroḡi be ya tavana. Naumeki da waivi dugi vikinama ya kaipore be upa ḡabuḡabunama Yesu debane ya ḡinina. ⁸Be na tauwai muriwatanama nama kauinama a kitakitana, taudi nuedima ya karati be a riuna, “Aba aubainama upa ḡabuḡabunama ewai yakare? ⁹Uma upanama ḡabuḡabunama sibo ya raugimare da mane dosinama ya paḡo, be manenama banaga waikaruwaḡewaḡedima sibo ya utedina.”

¹⁰Dabudine Yesu ya kataie da taudi aba a giugiuena, aubainama tauna ya riuedina, “Aba aubainama uma waivinama ko kawakawa nuaboya? Tauna kawa verenama ya voiena ḡarogue. ¹¹Taumi raḡan ya toi kauana banaga waikaruwaḡewaḡedima mate ko miana. Be taugu nam uma dabudi taumi mate tà mia nonoḡa. ¹²Tauna upa ḡabuḡabunama tunigue ya ḡini wainonoḡi, be ya kawa nonoḡiguna tai kokoagiguna aubainama. ¹³Taugu yà riuriu kauemina,

^w 26.7 Taudi yeku isanama ‘Alabasta’ a voie da inam duginama ya tubuḡana.

Deḡo da deḡo dobu matabuna vari verenama ta rarau guguyena raḡanine, uma waivinama aba ya voivoiena noḡotinama mate tokare ta giu watanena.”

Judas yai aninana da tauna Yesu e boru dobiḡena

(Mk 14:10-11; Lk 22:3-6)

¹⁴Dabudine Judas Iskariot, tauna tenaḡa tauwai muriwatana 12 nopodie, tauna ya naḡo pirisi adi badama ḡarone, ¹⁵be yai taravirena, “Deḡoda taugu Yesu nimemie yà boruna, taumi aiyaba tokare taugu ko utegu?” Naumeki da taudi mane a sievi da sirin matabudi 30 be a utena. ¹⁶Inam raḡanine be nokoi ya naḡona, Judas tauna keda ya wanewanena, da Yesu taudi nime die sibo ya boru nawena.

Yesu na tauwai muriwatanama mate Naḡopore soinama a kanina

(Mk 14:12-16; Lk 22:7-13)

¹⁷Naumeki da Buredi-Nam-Sasasanina soinama raḡaninama yawai karena raḡanine, tauwai muriwatana Yesu ḡarone a tava da ai taravire be a riuna, “Deḡo dabudi kwa ḡoḡoena tauma ka naḡo be Naḡopore soinama ka vokaukaue tam aubaimma da kwa kani?” ¹⁸Be tauna ya paribeedi be ya riuna, “Ko naḡo meagaie taugoma tenaḡa ḡarone be ko riuna, ‘Tauwai katakatai umanama ya riuna: Taugu yau raḡanima boruborunama kaiteka maida ya tavana. Taugu am vadae yau tauwai muriwatanama mate Naḡopore soinama ka voiena.’” ¹⁹Naumeki da tauwai muriwatana aba Yesu ya riuriuedina nama a voiena. Taudi a naḡo be Naḡopore soinama a vokaukaue.

(Mk 14:17-21; Lk 22:14, 21-23; Jn 13:18-30)

²⁰Be ravi ya tavatavana raḡanine, Yesu na tauwai muriwatanama 12 mate a mia gogona be a kanina. ²¹Taudi a kanikani be Yesu taudi ya riuedina, “Yà riuriu kauemina da nopomie tenaḡa tokare taugu e boru dobiḡeguna.” ²²Dabudine taudi ai nuaboya kua be tenatenaḡaḡa a riuna, “Bada, agunai nam taugu, bo?” ²³Be Yesu ya riuna, “Tauna aita da rabuigu nimamaima teboe e yovo tenaḡana, inam tauna tokare taugu e boru dobiḡeguna. ²⁴Be Banaga Natunama tokare e gurina girugiruminama porane e riuriuna maika, be gewagewa vavasaḡinama tauna aita Banaga Natunama e boruboru dobiḡena ḡarone e tubuḡana. Ya verena da inam baneginama avedi da sibo ya tubuḡana.”

²⁵Be Judas tauna vutuna tokare Yesu e boru dobiḡena, tauna mate ya riuna, “Tauwai katakatai, nam taugu, bo?” Be Yesu tauna ya riuna, “Tam ḡomimma vutuna kwa riuriuna.”

(Mk 14:22-26; Lk 22:15-20; 1Ko 11:23-25)

²⁶Taudi yaḡoro a kanikani be Yesu buredi ya paḡo da yai kaiwa da ya giva be na tauwai muriwatanama ya utedi be ya riuna, “Ko paḡo be ko

kanina, uma inam taugu tubuḡiguma.”²⁷Inam kauinama murine tauna keyaka ya paḡo, yai kaiwa da ya utedi be ya riuna, “Taumi matabumi uma keyekine ko tegona.”²⁸Uma inam kosiniguma waianina aubainama, e rarau ḡinina banaga toitoi adi gewagewama aninoḡota porenama aubainama.²⁹Taugu yà riuriuemina da nam waen yà tego munaḡe, naumeki da Tamaguma na waiguyauma nopone, taumi mate tokare tà tego tenaḡana.”³⁰Dabudine taudi a saresare kovina murine, taudi a naḡona oya Olip debane.

Yesu ya riuna da Pita tokare tauna e bovienu

(Mk 14:27-31; Lk 22:31-34; Jn 13:36-38)

³¹Dabudine Yesu na tauwai muriwatanama ya riuedina, “Manaka kupine taumi matabumi tokare ko goseguna, baninama girugiruminama porane ya riuna,

‘Taugu tokare tauyosi yài guri be sipu adi kaba miama ta gosedi, be ta daberarana.’

³²Be taugu gurie be yà midisuḡu munaḡana murine, taugu yà gosemi be yà doka da yà naḡona Galilima.”³³Dabudine Pita ya paribee be ya riuna, “Banaga matabudi tokare ḡarome aba e tubutubuḡana ta kita be naira ta naḡona, be taugu tokare nam yà gosem.”³⁴Dabudine Yesu ya riuna, “Yà riuriu kauemna, manaka kupine muriḡa da kamkam e riuna, tam tokare raḡan rabuiteḡa kwa riuna da tam taugu nam ku kataieguna.”³⁵Be Pita ya riuna, “Taugu nam airaḡan tokare yà riuna, Taugu nam tam e kataiemna, be tam kwa gurigurina raḡanine, taugu tam mate tà guri tenaḡana. Be tauwai muriwatana ḡesaudima taudi mate riunama teneḡinama nama a vatona.

Yesu Getsemenima ya moimoiragina

(Mk 14:32-34; Lk 22:39-46)

³⁶Naumeki da Yesu na tauwai muriwatanama mate a naḡona dobu isanama Getsemenima, be dabudine taudi ya riuedina, “Taumi uma dabudine ko miamia be taugu yà naḡo noa dabudine yà moiragina.”

³⁷Dabudine tauna Pita be Sebedi natunatumama rabui yai dokedi, be mate a naḡona. Inam raḡanine tauna nuaboya yai kare, be nuanama ya gewagewa kauana.³⁸Be ya riuedina, “Taugu nopoguma nuaboya ya moḡavuna, be kaiteka nuaboya ei guriguna. Uma dabudi ko mia be tai neneḡanana.”

³⁹Inam raḡanine Yesu ya gosedi be tauna ya taunaḡo ḡavoe da doḡae ya raupari be umanama ya moiragina, “Mamai, deḡoda teneteneḡina bo ibewa, da ḡoraḡoranama yodi e tavana nam sibo è sigue. Be avedi, nam taugu yau ḡoanama kwa voie, be tam am ḡoanama kwa voiena.”

⁴⁰Dabudine tauna ya tava munaḡa na tauwai muriwatanama ḡarodie, da

e kitedina be taudi a kenakenana, dabudine Pita ya riuena, “Taumi tokare suara rovanama tenaḡa nopone koya mia be koyai neneḡana bo ibewa?

⁴¹Ko mia be koi neneḡana, be ko moiragi da nam raurubue ko beku!

Aruimima moiragi e goeḡoena, be tubuḡimima e vovo gwaḡagwaḡana.”

⁴²Naumeki da Bada raḡan aniwai rabuinama ya munaḡa be ya moiragina, “Mamai, deḡoda uma ḡoraḡoranama kai porenama nam kwa ḡoe, naumeki da tam am ḡoanama kwa voiena.” ⁴³Raḡanine tauna ya tava munaḡana na tauwai muriwatanama ḡarodie, da e kitedina be taudi a kena munaḡana, baninama matedima a yado kauana.

⁴⁴Naumeki da tauna ya gosedi da ya munaḡa, be raḡan aniwai rabuiteḡanama ya moiragi be giudima teneḡidima ya vatodina. ⁴⁵Be tauna na tauwai muriwatanama ḡarodie ya tava munaḡa be ya riuedina, “Taumi yaḡoro ko kena be ko sipesipere, bo? Ko kita, Banaga Natunama ta boru dobiḡena, gewagewa banegidima nimedie raḡaninama kaiteka ya tavana. ⁴⁶Ko midisuḡu be tà naḡona, tauboru dobiḡeguma kaiteka umanema ya tavana.”

Yesu banaga nimedie a boru nawena
(*Mk 14:43-50; Lk 22:47-53; Jn 18:2-12*)

⁴⁷Yesu yaḡoro ya giugiu be Judas tauna tenaḡa tauwai muriwatana matabudi 12 nopodie, tauna ya tavana. Be banaga patara ḡesaudima mate a tavana, taudi nimedie kwatikwati be kwaibubu a ragaudina. Taudi inam pirisi adi babadama, be babada dosidima a riuporedina.

⁴⁸Be tauborudobiḡa mataira aba e voiena, patara ya riuedina, “Deḡo baneginama yàwai suruvena, tauna vutuna ami ḡoanama, tauna ko pani be koi doka nawena!” ⁴⁹Naumeki da Judas tauna didimaninama ya naḡo ḡomana Yesu ḡarone, be ya riuna, “Ebom tauwai katakatai.” Naumeki da yai suruvena. ⁵⁰Be Yesu ya riuna, “Yau tura, uma dabudine kuya tavana, naumeki da am ḡoama kwa voiena.” Dabudine tautauḡoma Yesu a vunuḡi be a kaididina. ⁵¹Inam raḡanine Yesu na tauwai muriwatanama tenaḡa, kwatikwati ya kaikai suḡuna, pirisi adi badama na taunoyama beanama ya dourakana.

⁵²Be Yesu ya riuena, “Am kwatikwatima kwa kaididi, baninama aitu da kwatikwatie ta iḡaiḡarana, inam banegidima taudi tokare kwatikwatie tai guridina. ⁵³Deḡoda taugu sibo è ḡoena, tokare Tamaguma èi baḡa be tauna waiḡapa anea toitoi ya riuporaḡana saguguma aubainama. ⁵⁴Be deḡoda nama yà voiana, tokare girugiruminama porane aba ya riuriuena sibo a tubuḡana, be tokare nam a tubuḡa.”

⁵⁵Inam dabudine Yesu patara ya riuedina, “Taumi kwaibubu be kwatikwati mate koya tavana taugu ko vunuḡigu, banaga danedanenenama maika, bo? Taugu raḡan patapatanama tempol nopone è mia be èwai katakataina, be taumi nam ko vunuḡiguna. ⁵⁶Be

uma kaudidima matabudi ta tubutubuḡana, baninama boni peroveta a girugirumidina ruvane.” Dabudine tauwai muriwatana matabudi Yesu a gose, be taudi naira a naḡona.

Yesu tauwai tarapiri babadidima noḡodie ya midina

(Mk 14:53-65; Lk 22:54-71; Jn 18:12-24)

⁵⁷Be taudi aitaḡa Yesu a panipanina, naumeki da ai doka nawena pirisi adi badama Kaiyapas ḡarone. Inam dabudine tarawatu tauwai katakataidima be babada ḡesaudima mate matabudi ai rawateḡeidina.

⁵⁸Be Pita Yesu yai muriwatane be madanie muriḡa ya veraverauna, naumeki da ya saḡa ya naḡona anikaba etara gabune, pirisi adi badama na vadae. Dabudine tauna taubodama mate a mia be yawai rabana da nema sibo Yesu a etara bakena ya kitana.

⁵⁹Be pirisi adi babadama be etara babadidima matabudi, a rarau rubuna da giu kaikaiyovudima deḡo sibo a banavidi, be inam giudie Yesu sibo ai gurina. ⁶⁰Be matamata kaikaiyovudima toitoi dabudine a tavana, be yaḡoro taudi nam deḡo keda ti banavina da Yesu sibo ai guri. Dabudine banaga rabui a verau ⁶¹be a riuna, “Uma tauḡominama umanama ya riuna, “Taugu teneginama da Mamaitua na tempolma ya katiwei be raḡan rabuiteḡa nopodie ya keru munaḡena.”

⁶²Dabudine pirisi adi badama ya midisuḡu be ya riuna, “Uma banegidima tawai wavumna tokare kwa paribeedi bo ibewa?” ⁶³Be Yesu tauna nam aiyaba i riuena. Naumeki da pirisi adi badama Yesu ya riuena, “Mamaitua yawayawasaninama isane ya riuriu vavasagemna, kwa riuemai: Tam vutuna Keriso, Mamaitua Natuna, bo?” ⁶⁴Be Yesu ya riuna, “Ee, inam vutuna kuya vatona. Be ya riuemina: Tokare taumi Banaga Natunama Mamaitua wairewapaninama kasaunama yawwane e mia, be ma giyouna marae be e yovoyovona ko kitana.”

⁶⁵Dabudine pirisi adi badama taunama na garama ya sika be ya riuna, “Yodi koya vaie, tauna ewai diboḡana. Yodi nam matamata ḡesaudima ta wanedu. ⁶⁶Taumi nema kowai noḡota bako?” Be taudi a paribee be a riuna, “Tauna naumeki da e gurina.”

⁶⁷Dabudine taudi Yesu noḡonama a kaviso be a paitina. Be ḡesaudima a raunevanevakau ⁶⁸be a riuna, “Keriso kwai nasi, aitau kabe ya riḡam?”

Pita Yesu ya bovienu

(Mk 14:66-72; Lk 22:56-62; Jn 18:25-27)

⁶⁹Be Pita tauna anikaba etara gabunama diane ya miamia be taunoya waivinama ḡarone ya tava, be ya riuena, “Tam mate Galili Yesunama mate koya naḡonaḡona.” ⁷⁰Be Pita taudi matabudi noḡodie ya bovi be ya riuna, “Tam aba kwa giugiuena, taugu nam e kataiena.” ⁷¹Dabudine tauna ḡavoe ya dobi ya naḡonaḡo be waivi ḡesaunama tauna ya kita, be

na banagama ya riuedina, “Noa tauḡominama mate Nasaret Yesunama mate a naḡonaḡona.” ⁷² Be Pita ya bovi munaḡa, da ya rauseri be ya riuna, “Taugu inam tauḡominama nam e kataiena.” ⁷³ Naumeki da a mia raḡan ḡaubonaḡa be banaga aitaḡa diane a midimidina Pita a riuna, “Inam riukaua, tam mate turedima. Tam bonapakamma ewai maḡatarana ka vaivaiena.” ⁷⁴ Be Pita ya riu vavasaga be ya riuna, “Taugu ya riuriu kauana! Inam tauḡominama tauḡu nam e kataiena. Deḡoda tauḡu ya kaiyovuna, naumeki da Mamaitua tokare gewagewa ḡarogue e voiena.”

Pita nama ya giugiuna inam raḡanine kamkam ya riuna. ⁷⁵ Dabudine Yesu aba Pita ya riuriuena ya noḡotina, “Muriḡa da kamkam e riuna, tam tokare raḡan rabuiteḡa kwa bovieguna.” Dabudine Pita ya dobi ya naḡo be ya ḡaba guratana.

Yesu a verauḡena Paelat ḡarone
(*Mk 15:1; Lk 22:66; 23:1; Jn 18:28*)

27 ¹ Raḡanboiboi kupinaḡa pirisi adi babadama matabudi, be babada ḡesaudima adi ogama a taraḡina, da Yesu tai gurina. ² Dabudine taudi Yesu nimanama a panidi be ai doka nawena, be gabeman isanama Paelat nimane a boruna.

Judas taunaḡa yai guri munaḡena
(*Ap 1:16-19*)

³ Be Judas tauborudobiḡa tauna e vaiena be Yesu waigurinama a giugiuna, inam raḡanine tauna yai sosori, be yai nuaboya kauana. Naumeki da Judas ya munaḡana pirisi adi babadama, be babada ḡesaudima ḡarodie be sirin 30 taudi ya ute munaḡedi, ⁴ be ya riuna, “Taugu gewagewa è voiena. Taugu banaga verenama è boru dobiḡa yababe be tokare tai guri, be kosininama e darorona.” Be taudi a paribeena, “Inam tam am vitama, be nam tauma ama nuaboya.” ⁵ Naumeki da Judas mane tempol nopone ya yaraiedi, be tauna ya naḡo be ya sopana.

⁶ Dabudine pirisi adi badama manedima ya tama be ya riuna, “Tarawatu nam ima waianinana, da uma manedima tempol manenama nopone tà biridi, baninama uma inam vunuḡa manenama.” ⁷ Dabudine taudi ai oga da inam manene, gurewa tauvoienama na doḡama ta gimeri be dabudine vaḡavaḡai adi kokoagama tai tubuḡina. ⁸ Vutuna aubainama inam dobunama yodi tawai isana ‘Kosina Dobunama’. ⁹ Inam kaudima peroveta Jeremaia boni aba ya riuriuena, ruvane nama ya tubuḡana, inam umanama,

Israel banegidima tauna na maesama a boruna, inam sirin matabudi
30. Be inam sirindima 30 ta ragaudi

¹⁰ be gurewa tauvoienama na doḡama ta gimerina, Bada ya riuriuna
nama.

Paelat Yesu ya etarena
(*Mk 15:2-15; Lk 23:2-25; Jn 18:29-40*)

¹¹Naumeki da Yesu gabeman noḡone ya midi be tauna Yesu yai taravirena, “Tam Jius adi guyau, bo?” Be Yesu ya riuna, “Ee, inam vutuna kuya vatona.”

¹²Dabudine pirisi adi babadama be babada ḡesaudima taudi Yesu awai wavuna, be tauna nam aiyaba i giuena. ¹³Naumeki da Paelat Yesu yai taravirena, “Tam banaga tawai wavumna, kwa vaivaiedi bo ibewa?” ¹⁴Be Yesu nam aba i paribea rubudina. Vutuna aubainama gabeman tauna ya basena.

¹⁵Be gabeman tauna na vaivaima da soi nopodie banaga adi ḡoanama aitaubidure ta vinevinena, vutuna e kaikaiporena. ¹⁶Be inam raḡanine gewagewa baneginama isanama Barabas, tauna isanaḡonaḡonama dibure ya miamiana. ¹⁷Be patara awai rawateḡeidina raḡanine, Paelat yai taraviredi be ya riuna, “Taumi deḡo tauna ko ḡoḡoena yà kaipore? Barabas bo Yesu, tawai isana Keriso?” ¹⁸Paelat nama ya riuna, baninama tauna ya kataie da pirisi Yesu a unurena aubainama tauna nimane a boruna.

¹⁹Naumeki da Paelat etara gabune ya miamia, be na visarama vari ya riuporena tauna ḡarone be ya riuna, “Inam baneginama ḡarone nam tam aiyaba kwa voie, tauna banaga verenama. Baninama inam baneginama kana taiye taugu kupie rauboni gewagewa kaukauinama è kitana.” ²⁰Be pirisi adi babadama be babada ḡesaudima patara a riuedina da taudi sibo Barabas kaiporenama aubainama Paelat sibo ai baḡana, be Yesu sibo yai gurina.

²¹Be Paelat patara yai taraviredi be ya riuna, “Uma banegidima rabui be taumi deḡo tauna ko ḡoḡoena yà kaipore?” Be taudi a riuna, “Barabas kwa kaiporena.” ²²Dabudine Paelat ya riuna, “Be Yesu tawai isana ‘Keriso’, nema yà bake?” Be taudi matabudi a riuna, “Kwa tuparatuna!” ²³Be Paelat ya riuna, “Aba aubainama yà tuparatu? Tauna aiyaba gewagewanama ya voie?” Be taudi a rasa gurata be a riuna, “Kwa tuparatuna!”

²⁴Be Paelat ya raurubu be ya kita da nam keda deḡo i banavina, vutuna aubainama tauna patara matedie nimanama upae ya koḡa be ya riuna, “Taugu uma baneginama e gurina, wavunama nam taugu yà paḡo. Inam taumiḡa ami wavuma.” ²⁵Dabudine banaga matabudi a riuna, “Naumeki da tauna kosininama e rauḡini, be wavunama tauma ama sedama mate ka kiroḡina.”

²⁶Inam raḡanine Paelat tauna Barabas ya kaipore da ya naḡona, be Yesu inam na tauḡarama nimedie ya boruna da taudi ta riḡa be ta tuparatuna.

Tauigāra Yesu ai varavarana

(Mk 15:16-20; Jn 19:2-5)

²⁷Naumeki da tauigāra Yesu ai doka saḡena Paelat na kaba miae. Be dabudine tauigāra matabudi ai rawateḡeidina Yesu noḡone. ²⁸Be taudi na garama a giḡi pore, be gara ḡesau sabasabanama ai kotena. ²⁹Yodibe taudi gedara a pinou be Yesu debane ai mieni be a virididina, be diḡona nimanama kasaune ai paḡona. Yodibe taudi Yesu noḡone tuapikedie a raupari, da ai varavara be a riuna, “Ebom, Jius adi guyauma.” ³⁰Naumeki da Yesu a kaviso be diḡona nimane a paḡo, be debanama a riḡa yabayababena. ³¹Be taudi ai varavara ya kovikovina, gara sabasabanama a kaipore, be tauna na garama ai kote munaḡena. Yodibe ai doka nawena tuparatunama aubainama.

Yesu a tuparatuna

(Mk 15:21-31; Lk 23:26-43; Jn 19:16-27)

³²Be kedae tauḡoma tenaḡa a banavina, isanama Saemon, tauna Sairin meagainama baneginama. Dabudine tauigāra inam tauḡominama a segeri da Yesu na korosima ya kiroḡina. ³³Naumeki da taudi dobu isanama ‘Golgotama’ a tavana. Riu ‘Golgota’ baninama inam ‘debagarere’.³⁴Dabudine taudi waen be musara kavisonama mate a gwada tenaḡe, be Yesu a utena da sibo ya tegona. Be tauna ya remorubu da ei damina be tegonama ya tuaḡaiena. ³⁵Naumeki da taudi Yesu korosie a tuparatu be na garama ai kasiedina. Be aitu kasie yawai rewapanana, tauna deḡo garanama ya ḡoḡoena, nama ya paḡona. ³⁶Be dabudine taudi a mia be Yesu a rabe be a kitakita watanina. ³⁷Be aba aubainama Yesu a tuparatuna, vutuna kai ḡaubonama bogane umanama a girumana

UMA TAUNA YESU, JIUS ADI GUYAUMA

Yodibe Yesu debane korosi bogane kainama a tutuna. ³⁸Be inam dabudine taudi banaga danedanenedima rabui mate a tuparatudina, tenaḡa Yesu kasaune be tenaḡa senine. ³⁹Be banaga aitaḡa kedaḡa a naḡonaḡona, taudi debedima a kwadiedi da Yesu ai diboḡi, ⁴⁰be a riuriuna, “Iyo! Tam dokane kuya riuna da tempol kwa katiwei be raḡan rabuiteḡa nopodie kwa keru munaḡena. Yodi kwai yawasana munaḡem. Deḡoda tam Mamaitua Natunama, naumeki da yodi korosi boganaḡa kwa yovo be ka kitam.”

⁴¹Inam kauinama teneḡine pirisi adi babadama be tarawatu tauwai katakataidima, be babada ḡesaudima mate taudi Yesu ai varavara, be a riuna, ⁴²“Tauna banaga ḡesaudima yawai yawasanidina, be yodi taunaḡa nam tokare ei yawasana munaḡe! Deḡoda tauna Israel guyaunama, naumeki da korosi boganaḡa e yovo be tauna kai sumaḡena. ⁴³Tauna Mamaitua ewai sumaḡe be ya riuriuna, “Taugu Mamaitua Natunama.”

Yodi kabe tà kita Mamaitua tauna waiyawasaninama e gōeḡoe bo ibewa.”
 44 Be banaga danedanenedima rabui Yesu mate a tupatuparatudina, taudi mate Yesu ai dibōḡina.

Yesu ya gurina

(Mk 15:33-41; Lk 23:44-49; Jn 19:28-30)

45 Be suaratu dobu yai kupikupina naumeki da ravie 3-okoroki paratinama. 46 Be ravie 3-okoroki nama Yesu bonanama dosine umanama ya riuna, “*Eli, Eli, lema sabaktani?*” Uma giunama baninama inam umanama, “Yau Mamaituama, yau Mamaituama, aba aubainama kuya gose poreḡu?”

47 Be banaga ḡesaudima dabudine diane a midimidina nama a vaivaiena, taudi a riuna, “Koi beavaia! Tauna Elaija e yokoyokoena!”
 48 Be dabudine tauḡoma tenaḡa anitaiyo ya paḡo, be ya manini ya saḡa ya naḡo da waen ḡoraḡorane yai sonom da kai isune ya pani be Yesu sibo yai tegona, 49 be banaga ḡesaudima a riuna, “Nakarua, kwa gose! Elaija e yovoyovona ei yawasanina tà kitana.”

50 Be Yesu bonanama dosine ya yogona, naumeki da taunama aruinama ya raukaigosena. 51 Inam kauinama ya tubutubuḡana raḡanine, gara tempol nopone matakeda waisaurinama, ya nuasika poraḡa da ma nevana a kenana. Be doḡa ya gusu be yeku a nuasenana. 52 Be inam raḡanine kokoaga gayedima a nuaporaḡa be banaga babaudima guriguridima toitoi a midisuḡu munaḡana. 53 Be tauna na kaba midisuḡu munaḡama murine, taudi kokoaga a dobi pore be a naḡona meagai babaune, be banaga toitoi ḡarodie a maḡatarana.

54 Be tori matanama na tauḡarama mate Yesu a rabe be a kitakita watanina, taudi yoyo be yaba matabudi a tubutubuḡana, nama a kitekitedina, taudi a naira kaua be a riuna, “Uma tauna inam riukaua Mamaitua Natunama!”

55 Be dabudine waiwaivi mate, taudi madanie a midi be awai kitana. Inam waiwaividima taudi Galilima Yesu waimuriwatanenama ai karena, be aba tauna ya ḡoeḡoena nama a sagusaguna. 56 Be inam waiwaividima matabudi nopodie inam Meri Magdalin, Meri Jeims be Jousep tinedima, be Sebedi natunatunama tinedima.

Yesu ai kokoagina

(Mk 15:42-47; Lk 23:50-56; Jn 19:38-42)

57 Be ravi ya tavatavana paratine, waiguyau baneginama Arimatia meagaina be ya tavana, isanama Jousep. Inam baneginama tauna mate Yesu tauwai muriwatanenama. 58 Tauna ya naḡo Paelat ḡarone be yai baḡana da Yesu tubuḡinama sibo ya paḡona. Naumeki da Paelat na tauḡarama ya riuedi, da Yesu tubuḡinama Jousep a utena. 59 Naumeki da

Jousep Yesu tubuḡinama ya paḡo, be gara ḡavoḡavoridie ya sumana. ⁶⁰Be Jousep taunama na kokoagama vaunama yeku vasivasi wainonoḡinama nopone, Yesu tubuḡinama ya boruna. Yodibe yeku dosinama yai rawakui da kokoaga matakedanama yai miditom, be ya naḡona. ⁶¹Be Meri Magdalin be Meri ḡesaunama taudi kokoaga noḡone noaḡo a miamiana.

Kokoaga taurabenama

⁶²Raḡan ya tom da pomainama Sabat raḡanine, be pirisi adi babadama be Parisi a naḡo Paelat ḡarone be a riuna, ⁶³“Bada, tauma yaḡoro ka noḡonoḡotina da uma baneginama kaikaiyovunama dokane yawai yawasanana umanama ya riuna, ‘Taugu tokare raḡan aniwai rabuiteḡane yà midisuḡu munaḡana.’ ⁶⁴Vutuna aubainama kawai baḡamna da kokoaga kwa gudu kaue be taubodama kokoaga ta rabena naumeki da raḡan wairabuiteḡanama e kovina. Deḡoda na tauwai muriwatanama ta tava be tubuḡinama ta danene, be ta naḡo da banaga ta riuedina, ‘Yesu kaite ya midisuḡu munaḡana.’ Deḡoda inam nama e tubuḡana, naumeki da inam kaiyovunama tokare kaiyovu dokanama ei moraba guratena.”

⁶⁵Dabudine Paelat taudi ya riuedina, “Naumeki, tauḡara yà riuporedi da taumi mate ko naḡo be kokoaga ta rabena, be ami noḡotama ruvane nama ko gudu waikaikaina.” ⁶⁶Naumeki da taudi a naḡo da kokoaga a gudu waikaikai ya kovi, yodibe tauḡara kokoaga matakedanama a mididi ḡaḡari be kokoaga a rabena.

Yesu ya midisuḡu munaḡana

(Mk 16:1-11; Lk 24:1-12; Jn 20:1-18)

28 ¹Sabat raḡaninama murine, pomainama Sande raḡantomtom, Meri Magdalin be Meri ḡesau mate a naḡona kokoaga kivunama aubainama. ²Inam raḡanine anea ya yovoyovona, yoyo dosinama ya tubuḡana. Be anea ya naḡo kokoagae be yeku dosinama kokoaga matakedanama waimiditomnama yai rawakui ḡavoe ya naḡo, be tauna yekunama debane ya miana. ³Be anea kitanama maika keama, be na garama ḡavoḡavora tunutununama. ⁴Dabudine tauḡara taudi a naira kauana, be naira ya kawa gususudi be a guri gidavana.

⁵Naumeki da anea waiwaivi ya riuedina, “Nam ko naira! Taugu è kataiena da taumi Yesu a tuparatuna, vutuna ko wanewanena. ⁶Tauna nam uma dabudine. Tauna kaite ya midisuḡu munaḡana, boni ya riuriuna maika. Ko verau be na kaba kenama gabunama ko kita. ⁷Be waiḡapa ko naḡo da na tauwai muriwatanama umanama ko riuedina, ‘Yesu ya guri be ya midisuḡu munaḡana, be yodi ya doka be e naḡonaḡona Galilima, be dabudine taumi tokare tauna ko kitana.’ Inam vutunaḡa è riuemina.”

⁸Naumeki da waiwaivi kokoaga a gosena, nopodima naira be mosari ya moḡavuna, be a manini a naḡona tauwai muriwatanama riuedima

aubainama. ⁹Taudi a naḡonaḡo be Yesu yai raḡantenāḡe da ḡarodie ya tava be ya riuna, “Ebom.” Be waiwaivi tauna ḡarone a naḡo da tuapikiedie a raupari, be kaḡanama a kaididi be a rauduneena. ¹⁰Dabudine Yesu taudi ya riuedina, “Nam ko naira! Ko naḡo be tasitasiguma ko riuedi da ta naḡona Galilima. Be dabudine taudi taugu ta kitaguna.”

Tauḡara piriḡi adi babadama ai varidina

¹¹Naumeki da waiwaivi keda a naḡonaḡona maika, tauḡara a naḡona meagaie piriḡi adi babadama ḡarodie, be yaba matabudi a tubutubuḡana ai varidina. ¹²Dabudine piriḡi adi babadama be babada ḡesaudima mate ai boru be adi ogama a taraḡina. Yodibe tauḡara mane dosinama a utedi ¹³be a riuedina, “Ko naḡo be banaga umanama koi varidina, “Tauma kupie kè kena nuakoa, be debamaie Yesu na tauwai muriwatanama a tava be Yesu tubuḡinama a danenena.’ ¹⁴Be deḡoda gabeman uma giunama ima vaie, tokare tauma ka gwayedi da nam aba gewagewanama ko banavi.” ¹⁵Naumeki da tauḡara mane a ragaudi be aba piriḡi be babada ḡesaudima a riuriuedina nama a voiedina. Be inam gututunama Jius nopone ya daberarana, naumeki da yodi.

Yesu na tauwai muriwatanama ya riupore nawedina dobu matabuna nopodie

¹⁶Inam raḡanine tauwai muriwatana matabudi 11 a naḡona Galilima. Dabudine taudi a naḡona oyae deḡo Yesu dokane ya riuriuedina dabudine. ¹⁷Be raḡanine taudi Yesu a kitakitana, dabudine a rauduneena, be ḡesaudima taudi a noḡota bekubekuna. ¹⁸Naumeki da Yesu taudi ḡarodie ya tava be ya riuna, “Rewapana marae, be doḡue matabudi Mamaitua taugu ya uteguna. ¹⁹Vutuna aubainama ko naḡo be banaga doḡu matabuna nopone ko voiedi da yau tauwai muriwatanama ta tubuḡana. Be koi babataitodina Tamanama, Natunama be Arua Babau isedie. ²⁰Be aba è riuriu vavasāḡemina, yabedima matabudi taudi koi katakataidi da ta voteyeteyedina. Be yà riuriu kauemina da taugu raḡan matabuna taumi mate, naumeki da raḡan damone.”